

ԱՄՆ Արևմտեան թեմի
«ՈՍԿԵՂԵՆԻԿ» մատենաշար - Դ

ԿԱՐԱՊԵՏ ԱՐՔ. ՊԱԼԱՏԵՑԻ



ՏԱՐԵԿԱՆ ՔԱՐՈՉԳՐԻՔ

(Ընտրանի)

Գրաբարից աշխարհաբար փոխադրեցին՝
Նորայր Պօղոսեան
Գեւորգ Սրկ. Կարապետեան

ԼՈՍ ԱՆՋԵԼԷՍ – 2021

ԲՈՎԱՆԴԱԿՈՒԹԻՒՆ

<i>«Ճաշակեցէք եւ տեսէք, զի քաղցր է...».</i>	3
Տ. Յովնան Արք. Տէրտէրեան	
<i>Կարապետ Պատրիարք Պալատեցին եւ</i>	5
<i>«Տարեկան Քարոզգիրքը».</i>	
Նորայր Պողոսեան	
ԱՍՏԾՈՅ ՍԷՐԸ ՄԱՐԴՈՒՆԿԱՏՄԱՍԲ	11
ԱՌԱՔԻՆՈՒԹԵԱՆ ՃԱՆԱՊԱՐՀՆԵՐԸ	21
ՊԱՀՔ ԿԱՄ ՊԱՀԵՑՈՂՈՒԹԻՒՆ	30
ՔՐԻՍՏՈՆԷԱԿԱՆ ՊԱՐՏՔԸ	41
ԽՈՆԱՐՀՈՒԹԻՒՆ	53
ՈՂՈՐՄՈՒԹԻՒՆ	58
ՊԱՐԿԵՇՏՈՒԹԻՒՆ ՀԱՆԴԵՐՁԱՆՔԻ ՄԷՋ	73
ԶԳՈՒՇԱՑԻՐ ՄԵՂՔԻՑ	82
ԲԱՄԲԱՍԱՆՔ	94
ԱԳԱՀՈՒԹԻՒՆ	103
ՊԷՏՔ ԶԷ ԱՐՀԱՄԱՐՀԵԼ ՈՐԵՒԷ ՄԵԿԻՆ	114
ՄԵՂՔԸ ԱՌԱՒԵԼ ԴԺՈՒԱՐ ԳՈՐԾԵԼԻ Է,	
ՔԱՆ ԱՌԱՔԻՆՈՒԹԻՒՆԸ	125
ԱՇԽԱՐՀԻ ՄԵԾՈՒԹԻՒՆԸ ՍՆՈՏԻ Է	137
ԱՄԷՆ ՍՈՒՐԲ ՄԻ ԱՐԵԳԱԿ Է ԵՐԿՆՔՈՒՄ	147
Գրականություն	156

«ՃԱՇԱԿԵՑԷՔ ԵՒ ՏԵՍԷՔ, ԶԻ ՔԱՂՅՐ Է...»

Ներկայ Քարոզգիրքը հոգեշունչ խրատական-
ներու ընտրանի հաւաքածու մըն է, որուն գնա-
հատելի պատրաստութիւնը՝ գրաբարէ աշխարհա-
բար (արեւելահայերէն) թարգմանութեամբ յանձն
առին բանասիրական գիտութիւններու թեկնածու
դոցենտ Նորայր Պօղոսեան եւ Գեւորգ Սրկ. Կարա-
պետեանը:

Մեր սրտի փափաքն է, որ հոգեւորականներ եւ
հաւատաւոր զաւակներ մեր ս. եկեղեցւոյ ճաշակեն
քաղցրահամ խրատները եւ լուսաւորեն իրենց հո-
գիները Աստուծոյ խօսքով – Աստուածաշունչի
պատգամներով, որոնք հոգեւոր սնունդ են բոլորիս
համար:

Պալատեցի Կարապետ Պատրիարքի քարոզները
այնքան խորն են իրենց բովանդակութեամբ, որ
բոլորս հաճելի ընթերցանութեամբ հոգեկան լիցք
կ'ապահովենք անոնցմէ: Ահա թէ ինչու կը թելա-
դրենք, որ հաւատացեալը ընթերցէ Պալատեցւոյ
խրատականները:

Ճաշակեցէ՛ք եւ տեսէ՛ք Աստուծոյ ներկայու-
թիւնը Պալատեցու խրատականներուն մէջ:

Յ. Վնաս Աթ.

Տ. Յովնան Արք. Տէրտէրեան

Առաջնորդ Հիւսիսային Ամերիկայի

Արեւմտեան Թեմի



ԿԱՐԱՊԵՏ ՊԱՏՐԻԱՐՔ ՊԱԼԱՏԵՅԻՆ ԵՒ «ՏԱՐԵԿԱՆ ՔԱՐՈՉԳԻՐՔԸ»

Սիրելի ընթերցողին ենք ներկայացնում «Ոսկեղենիկ» մատենաշարի չորրորդ հատորը՝ 19-րդ դարի առաջին քառորդի Կ. Պոլսի պատրիարք Կարապետ Արք. Պալատեցու «Տարեկան Քարոզգրքից» ծաղկաքաղ, գրաբարից աշխարհաբար փոխադրութեամբ:

Կարապետ Պատրիարք Պալատեցու մասին կենսագրական տուեալներ շատ չեն պահպանուել¹: Ծնուել է 1783 թ., մանուկ հասակից հոգեւոր կեանքի կոչուելով՝ աշակերտել է Պօղոս Պատրիարք Ալեքսանդրեցուն, որ ընթերցողին յայտնի է «Խրա-

¹ Կարապետ Արք. Պալատեցու կենսագրական որոշ մանրամասներ ներկայացրել ենք «Էջմիածին» հանդեսում, 2018, թիվ Թ, էջ 72-80:

տի թանգարան» բարոյախրատական գրքով: Ուսումնառութեան մի շրջան է ունեցել 19-րդ դարի սկզբներին բացուած՝ Արմաշի վանքի դպրանոցում, տարբեր տարիների եղել է նուիրակ Վանում, առաջնորդ Ամասիայի, Մարգուանի: 1823-31 թթ. ընտրուել է եւ մօտ մէկ տասնամեակ պաշտօնավարել Կ. Պոլսի պատրիարք:

Պատմութիւնը պահպանել է Կարապետ Պալատեցու պատրիարքութեան շրջանի յատկապէս շինարարական մի քանի նախաձեռնումներ: Կարապետ Պալատեցու պաշտօնավարման շրջանում անուանի շատ հայեր կային օսմանեան արքունիքում, որոնց աջակցութեամբ պատրիարքը վերանորոգում է Կ. Պոլսի Սկիւտարի Ս. Խաչ հայոց եկեղեցին: 1826-ին Կ. Պոլսում պատահած հրդեհի հետեւանքով Ս. Աստուածածին աթոռանիստ Մայր եկեղեցին եւ պատրիարքարանը ամբողջովին հրոյ ճարակ եղան: Սուլթան Մահմուտ Բ.-ի հրովարտակով, ճարտարապետ Գրիգոր Ամիրա Պալեանի ու Կարապետ Տէօվլէթեանի պատրաստած յատկագծերով կառուցել է քարաշէն եկեղեցին, որի բացումը կատարուեւ է 1828-ին: Կարապետ Պալատեցի վախճանուել է 1850-ին եւ թաղուել Սկիւտարի գերեզմանատանը:

Կ. Պոլսի ստեղծագործող մեր այս պատրիարքից յայտնի է «Լապտեր հոգւոյ» խորագրով երկասիրութիւնը, որ քրիստոնէական պարզ ուսուցում է հարց ու պատասխանի ձեւով և տպագրուել է 1826 թ.²։ Հեղինակի մէկ այլ երկ՝ աշխարհաբարի փոխադրուած, «Ծանուցում քահանաներին՝ ապաշխարութեան խորհրդի վերաբերեալ» խորագրով, տպագրուել է վերջերս³։

Կարապետ Արք. Պալատեցու ներկայ քարոզները քաղել ենք Արեւմտեան թեմի Առաջնորդարանում պահպանուող «Տարեկան Քարոզք» ձեռագրից, որ քննելու համար սիրայօժար տրամադրեց Թեմակալ Առաջնորդ Գերշ. Տ. Յովնան Արք. Տէրտէրեանը։ Ձեռագիրը Հայաստանից կամ Կ. Պոլսից ԱՄՆ տեղափոխելու հանգամանքները դեռևս այսօր էն։ Ձեռագիրը հաստ կազմով թղթեայ գիրք է, 323 էջերով, 32x25 մեծութեան, մանր շղագիր գրութեամբ։ «Քարոզգրքի» 4 այլ ձեռագրեր պահուում են Երևանի Մաշտոցեան Մատենադարանում։

² Կարապետ Եպս., Լապտեր հոգւոյ, Կ. Պոլիս, 1826 թ., 57 էջ։

³ Կարապետ Արք. Պալաթեցի, Ծանուցում քահանաներին՝ ապաշխարութեան խորհրդի վերաբերեալ, քարզմ. և ընդ. խմբ.՝ Ա. Դիլանեան, Ս. էջմիածին, 2012 թ.։

Քարոզգիրքը գրուած է մեր եկեղեցու տօնացոյցին համապատասխան՝ ամէն մի քարոզ նուիրելով այս կամ այն տօնին կամ սուրբին, թուով 115 քարոզ: Առանձնապէս մանրակրկիտ են ներկայացուած Մեծ պահքի օրերի քարոզները՝ թուով 32, որոնցից իւրաքանչիւրը նուիրուած է բարոյական-կրօնական խնդիրների, ինչպէս՝ «Պահք կամ պահեցողութիւն», «Կոշումն ապաշխարութեան», «Զգուշութիւն ի մեղաց» եւ այլն: Աստուածաշնչական, հոգեւոր գրականութեան, մարդու հոգեկերտուածքի քաջ ճանաչումից ծնուած խրատական գրուածք է «Տարեկան քառօրեքը», այն քրիստոնեային ուղղորդում է ապաշխարութեան, ողորմածութեան, պարկեշտութեան, ուղղորդում է զերծ մնալու արատներից... Ու թէեւ գրուել են գրեթէ 200 տարիներ առաջ, սակայն կարծես մեր օրերի մարդուն են ուղղուած, այնքան որ արդիական են արծարծուող թեմաները: Միայն մէկ մէջբերում ներկայացնենք այդ առումով, տեսնելու համար, որ կարծես հէնց հիմա են գրուել եւ մեր բոլորի մասին են. «Զեռքերն ու երեսը լուանալուց առաւել հարկ է լեզուն լուանալ»: Եւ այսպիսի պատգամներով լեցուն են Կ. Պալատեցու քարոզները:

Մեծ թուով մտածող ու ստեղծագործող հոգևորականներ ունենք, որ դեռևս լիարժեք ծանօթ չեն ընթերցողին: «Ոսկեղենիկ» մատենաշարի նպատակներից մէկն է՝ նման հեղինակներին դարձնել հանրութեանն առաւել ճանաչելի, նորովի հրատարակել նրանց ստեղծագործութիւնները: Վստահ ենք՝ Կարապետ Արք. Պալատեցին իր կարեւոր տեղը պիտի ունենայ հայ հոգեւոր գրականութեան, քարոզխօսութեան անդամատաններում: Եւ մատենաշարի այս հատորը իր չափով կարող է նպաստել Կարապետ Արք. Պալատեցուն ստեղծագործող հոգևորականների շարքում տեսնելու համար:

ՆՈՐԱՅՐ ՊՕՂՈՍԵԱՆ

Բանասիրական գիտ. թեկնածու դոցենտ

Տարեկան փարոզքի

Զեաւքայ իւնիս քոյ եւ ի խորհիւս եւ ի խորհիւս քոյ

Խառն Զեաւքիւ

Զփարոզքի Մասի Զոյգի Կան խորհիւս Եւ ի խորհիւս

Կարապետ Արք. Պալատեցու «Տարեկան Քարոզգրքի»՝
Արեւմտեան թեմի Առաջնորդարանի ձեռագրի
տիտղոսաթերթը:

1. ԱՍՏԾՈՅ ՍԷՐԸ ՄԱՐԴՈՒ ՆԿԱՏՄԱՄԲ

*«Աստուած այնքան սիրեց աշխարհը, որ մինչև իսկ
Իր Միածին Որդուն տուեց»։ (Յովհ. 3. 16)*

1. Նիկողեմոս անունով մի մարդ՝ փարիսեցի գիտնական և օրենքի վարդապետ ու հրեայ իշխանաւոր, ցանկանում էր տեսնել Յիսուսին և լսել Նրա վարդապետութիւնը, սակայն բացայայտօրէն Յիսուսի մօտ գնալ չհամարձակուեց՝ երկիւղ ունենալով տեղի փարիսեցիներից, և գնաց գիշերը՝ Նրան հարցնելու և Նրանից լսելու համար։ Բարեխնամ Յիսուս քաղցրութեամբ ընդունեց Նիկողեմոսին և գիտենալով, որ նա Սուրբ Գրքի գիտակ է, նրան աւանդեց սուրբ խորհուրդների բարձրագոյն վարդապետութիւնը, մասնաւորապէս՝ մկրտութեան մասին, որն աւելի վաղ Ինքը՝ Յիսուսը սահմանել էր կատարել ջրով և հոգով։ Յիսուս ասաց

նաև Իրեն սպասուող չարչարանքների և մարդկանց փրկութեան համար Իսաչի վրայ մահուան մասին՝ բերելով պղնձե օձի օրինակը, որը Մովսեսը կանգնեցրեց՝ թունաւոր մահաբեր օձերից խայթուածների բժշկութեան համար: «Նոյնպէս և Ես, - ասաց Յիսուս, - Իմ կանքով պիտի Իսաչը բարձրանամ»: Եւ քանի որ դա երկնաւոր Հօր՝ մարդկանց նկատմամբ ունեցած սիրոյ պտուղն է, Յիսուսը յաւելեց. «Աստուած այնքան սիրեց աշխարհը, որ մինչև իսկ Իր Միածին Որդուն տուեց»:

2. Մարդու նկատմամբ Աստծոյ սէրը նախաւառաջ արարչութեամբ ակնյայտօրէն երևաց, քանի որ արարածները միայն խօսքով ստեղծուեցին, իսկ մարդը՝ ամենակարող Աստծոյ ձեռքով: Կենդանի Էակների համար Աստուած ասաց. «Թող երկիրն արտադրի կենդանի շունչ» (*հմմտ. Ծննդ. 1. 24*), իսկ մարդուն ստեղծելիս Ի՛նքը՝ «Աստուած նրա դէմքին կենդանութեան շունչ փչեց» (*Ծննդ. 2. 7*): Ուրիշ արարածները որևէ խորհրդով չստեղծուեցին, իսկ մարդուն ստեղծելիս ամենասուրբ Երրորդութեան խորհուրդը յայտնուեց՝ ասելով. «Մարդ ստեղծենք մեր պատկերով»:

Յայտնի է, որ արարածները բաժանում են երեք կարգի: Առաջինն անշունչ իրերն են՝ քարերը, փայտը և այլն: Երկրորդն անխօս կենդանիներն են, իսկ երրորդը բանականները՝ հրեշտակները և մարդիկ: Բանականությունը երկու գերագոյն զօրութիւն ունի՝ միտքը և կամքը: Միտքը այնպիսի զօրութիւն է, որ մշտապէս միտուած է դէպի ճշմարտութեան գիտութիւնը, իսկ կամքն ազատօրէն յանգում է բարուն, խորշում է չարից և իշխանութիւն ունի իր արարածների նկատմամբ, սակայն միաժամանակ կամքը չի բռնանում ու ինքն-իշխան է, և ահա այդ պատճառով է ասում «մարդը արարուեց ըստ Աստծոյ պատկերի»:

Արդ, առաջին արարչութեան ժամանակ Աստուած Իր սերը հաւասարապէս ցոյց տուեց հրեշտակների և մարդկանց նկատմամբ՝ իմացական բնութիւն պարգևելով նրանց: Իսկ երկրորդ արարչութեան ժամանակ Նրա սերը առաւելապէս դրսևորուեց մարդկանց նկատմամբ, քանի որ թէև առաջինի ժամանակ իւրաքանչիւրին տուեց Իր պատկերը, սակայն երկրորդի ժամանակ Ինքը՝ Բանն Աստուած առաւ մարդկութեան պատկերը՝ մարդանալով, որի համար ասում է սուրբ Պօղոսը.

«Նա օգնելու համար երբեք հրեշտակներին ձեռք չերկարեց» (Եբր. 2. 16):

3. Ծննդոց գրքի սկզբում գրուած է, որ այս աշխարհի ստեղծումից առաջ «Աստծոյ Հոգին շրջում էր ջրերի վրայ»՝ Իր համար հաճելի բնակարան փնտրելով, իսկ երբ մարդը ստեղծուեց, Աստուած բնակուեց նրանում՝ իբրև Իր տաճարում, և այս մասին է սուրբ Պօղոսն ասում. «Արդարև, կենդանի Աստծոյ տաճար էք դուք» (Բ Կորնթ. 6. 16): Իսկ թէ որքանով է հաճելի այս տաճարը Հոգի Աստծուն, յայտնի է դառնում նրանից, որ երբ ջրհեղեղի ժամանակ Աստծոյ հոգին վերացաւ մարդկանցից մեղքերի պատճառով, այդժամ որևէ հանդիսաւոր բան տեղի չունեցաւ, այլ միայն, ինչպէս գրուած է. «Տէր Աստուած ասաց. Իմ ոգին յաւիտեան թող չմնայ այդ մարդկանց մէջ, որովհետև նրանք մարմնաւոր են» (Ծննդ. 6. 3):

Իսկ երբ Բանը մարմին առաւ և վճարեց մարդկանց մեղքերի համար, որով և Սուրբ Հոգին վերադարձաւ մարդկանց մէջ, տեսէ՛ք, թէ այդժամ ինչպիսի՛ մեծ հանդիսաւորութեամբ Նա եկաւ, քանի որ գրուած է. «Եւ յանկարծակի երկնքից հնչեց մի ձայն՝ սաստիկ հողմից եկած ձայնի նման, և լցրեց

ամբողջ այն տունը, ուր նստած էին: Եւ նրանց երևացին բաժանուած լեզուներ, նման բոցեղէն լեզուների, որոնք և նստեցին նրանցից իւրաքանչիւրի վրայ» (*Գործք 2. 2-3*): Սրանք մարդու հանդէպ սիրոյ նշաններն են: Սրանով է նաև, որ ճանաչում ենք Աստծոյ սէրը, քանի որ մեղանչեցին հրեշտակները, մեղանչեցին նաև մարդիկ, բայց Աստուած միայն մարդկանց փրկեց, որի պատճառով Աստուած մարդասէր է կոչւում և ոչ երբեք՝ հրեշտակասէր:

4. Թեպէտ Աստուած սիրում է Իր արարած ամեն բան, սակայն մարդուն առաւել է սիրում: Մարդու հանդէպ այս մեծագոյն սէրը Աստծոյ Որդին բացայայտօրէն ցոյց տուեց Իր մարդեղութեամբ, մանաւանդ երբ ասաց. «Եթէ ցորենի հատիկը հողի մէջ ընկնելով չմեռնի, միայն հատիկն ինքը կը մնայ, իսկ եթէ մեռնի, բազում արդիւնք կը տայ» (*Յովհ. 12. 24*): Քրիստոս Իրեն անուանում է ցորենի հատիկ և կամենում է ասել, որ եթէ ցորենի հատիկը չսերմանուի հողում, արդիւնք չի տայ կամ էլ միայնակ կը մնայ, «ըստ այսմ և Ես,- ասում է Քրիստոս,- եթէ իբրև ցորեն չսերմանուեմ գերեզմանում, միայն Ես կը մնամ, իսկ եթէ սերմանուեմ, բազում արդիւնք կը

տամ»: Ի՞նչ արդիւնք է այս, ո՛վ Փրկիչ, ո՛վ է մարդը, որ Դու յիշում ես նրան:

Բայց դուք սիրոյ ուրիշ նշանների մասին ևս լսե՛ք: Երբ Յուդան դուրս եկաւ վերնատնից՝ հրեաների մօտ գնալու և Նրան մատնելու համար, այնժամ Յիսուսն ասաց Իր աշակերտներին. «Այժմ մարդու Որդին փառաւորուեց» (*Յովհ. 13. 31*): Տեսե՛ք, փոխանակ ասեր. «Ահա այժմ ես Յուդայի ձեռքով պիտի մատնուեմ հրեաներին՝ Իմ թշնամիներին, և նրանք պիտի խաչեն Ինձ», ասում է՝ «Այժմ մարդու Որդին փառաւորուեց», և այս կերպ ցոյց է տալիս Իր անպատմելի խոնարհութիւնը, որով Նա փրկեց մարդկային սերունդը: Ուստի և Գեթսեմանում, երբ մօտ էր մատնուելուն, ասաց Իր աշակերտներին. «Հոգիս տխուր է մահու չափ» (*Մատթ. 26. 38*), կարծես թէ ասեր. «Այս Իմ տրտմութիւնը յաւերժ չի տևելու, այլ մինչև Իմ մահը: Իսկ երբ Իմ մահուամբ փրկեմ մարդկային ազգը, այնժամ ուրախութիւն կը լինի ե՛ւ Ինձ, ե՛ւ ձեզ համար»:

5. Ուրիշ խօսքերով ևս Յիսուս պարզորոշ ցոյց է տալիս Իր աստուածային սերը, որ ունի մարդու նկատմամբ, քանի որ, յիրաւի, ո՛վ է տեսել, ո՛վ է լսել երբևէ, որ տերն իր ծառային պարտապան չդարձ-

նելու համար իր սիրելի որդուն պարտապան դարձնի կամ իր ծառաներին ապրեցնելու համար իր որդուն տանջանքների ու մահուան մատնի: Բայց ահա երկնաւոր Հայրն արեց դա՝ մարդկանց փրկութեան համար Իր Միածին Որդուն ուղարկելով: Արդարև, չափազանց զարմանալի է Աբրահամի պատմութիւնը, որը իր սիրելի որդի Իսահակին կամենում էր Աստծուն պարգևել, բայց կայ դրանից առաւել զարմանալին, այն՝ որ երկնաւոր Հայրն է Իր Միածին սիրելի Որդուն մահուան մատնում: Ի՞նչն է առաւել մեծ ու սքանչելի թում, ո՛վ Աստծոյ սիրելիներ, այն, որ Աբրահամն իր միակ որդուն կամեցաւ մահուա՞ն մատնել, թե՛ այն, որ Հայր Աստուած Իր Միածին Որդու՞ն մահուան մատնեց:

Այնքա՞ն տարբերութիւն կայ այս երկուսի միջև. Աբրահամն իր որդուն յանձնում էր Արարչի սիրուն, այն դէպքում, երբ ամենքն են պարտաւոր իրենց անձերը Աստծուն յանձնել, մինչդեռ Հայր Աստուած Իր Որդուն նուիրեց յանուն մարդկութեան հանդէպ ունեցած սիրոյ, որին, սակայն, երբևէ պարտական չէր: Աբրահամը կամենում էր իր որդուն մատուցել Աստծուն մի առանձնական վայրում, որպէսզի

մայրն անկարող լինէր տեսնելու դա, մինչդեռ Աստուածահայրն Իր Որդուն մատուցեց Գողգոթայում, որտեղ Նրա ամենասիրելի մայրը ևս ականատես եղաւ այդ իրադարձութեանը: Նաև՝ Աբրահամն իր որդուն յօժարութեամբ մատուցեց Տիրոջը, մինչդեռ երկնաւոր Հայրը դա արեց Իր սիրելի Որդու՝ Քրիստոսի ուսերին դնելով մարդկութեան մեղքերի ծանրութիւնն ու դրա հետևանքով առաջ եկող բազում պատուհասները, որպէսզի այդկերպ Քրիստոսը վճարի մեր փոխարէն և քաւի մեր մեղքերը: Իսահակը, պարանով կապուած, դրուեց սեղանի վրայ, մինչդեռ Քրիստոսը մեխերով գամուեց խաչափայտին: Նաև տարբերութիւնն այն էր, որ Իսահակը խոյի հետ փոխանակուեց, իսկ Քրիստոսն Ինքը մեզ համար ողջակէզ եղաւ: Այս պատճառով է մի իմաստուն վարդապետ ասել. «Ապրեց Իսահակը, և մորթուեց խոյը. մեռաւ Քրիստոսը, որպէսզի ապրի մեղաւորը: Աստծոյ Որդին մեռաւ մարմնապէս, որպէսզի մարդու որդին ապրի հոգեպէս»:

6. Արդ, Աստծոյ այս բարձրագոյն և մեծագոյն սիրոյ դիմաց մենք ինչպէ՞ս կարող ենք հատուցել: Թեև Նա մեզնից ոչինչ չի պահանջում, այլ միայն որ

սիրենք Նրան, որի համար էլ առաջին այս պատուիանը տուեց. «Քո Տէր Աստծուն պիտի սիրես քո ամբողջ հոգով, քո ամբողջ էութեամբ ու քո ամբողջ ուժով» (*ԲՕր. 6. 5*): Ծանր չէ բնաւ այս պատուիրանը. Աստուած սիրեց ու արարեց մեզ, սիրեց մեզ ու փրկեց, մի՞թէ մեծ բան է, որ մենք սիրենք Նրան մեր ողջ հոգով, ողջ էութեամբ ու ողջ ուժով: Այսպէս էր սիրում Աստծուն մարգարեն, որն ասում է. «Միրում եմ քեզ, Տէ՛ր, զօրութի՛ն իմ. ո՛վ Տէր, պահպանի՛չ իմ, ապաւե՛ն իմ և փրկի՛չ» (*Մաղմ. 17. 2*): Զգո՛յ՛ջ լինենք, որպէսզի պայման չդնենք Աստծուն սիրելու համար, քանի որ Նա առանց պայմանի սիրեց մեզ:

«Աստուած այնքան սիրեց աշխարհը, որ մինչև իսկ իր միածին Որդուն տուեց»: Ուրեմն մենք ևս առանց որևէ պայմանի սիրենք Նրան՝ սիրելով ողջ հոգով, ողջ էութեամբ ու ողջ ուժով: Տե՛ս, թէ մեզնից ինչպիսի՛ սէր է պահանջւում, որի մասին այս խօսքն է ասում իմաստունը. «Որոյա՛կ, տու՛ր ինձ քո սիրտը» (*Առակ. 23. 26*): Միրտն է սիրոյ աթոռը. այն խնդրելով՝ Աստուած մարդու ո՛ղջ սէրն է խնդրում, իսկ սատանան կամենում է այդ սիրոյ կէսն իրեն վերցնել. չարը գիտի, որ սիրոյ միայն կէսը Աստծուն հաճելի չէ: Այս իմաստով յարմար

օրինակ կայ Սողոմոնի առաջին դատաստանում (*Չ. Թագ. 3. 16*), երբ կենդանի մանկան մայրը չի կամենում, որ իր երեխային մեջտեղից կիսեն, իսկ մեռածի մայրն ասում է՝ «կտրեցե՛ք մեջտեղից», այսպես նաև Աստուած մարդու սերն ամբողջապես է ցանկանում, և ոչ թե՛ կեսը միայն:

Այժմ գուցե հարց ծագի, թե Աստուած ինչու՞ մարդկանց փրկութեան համար հրեշտակներին չուղարկեց, ինչպես արեց Ղովտի դեպքում և փրկեց նրան Սողոմից: «Ո՛չ,- ասում է Եսային:- Մեր Աստուած... Ի՞նքը պիտի գայ ու փրկի մեզ» (*Եսայի 35. 4*): Իսկ թե ինչու է այսպես, պատասխանում են իմաստուն մեկնիչները այսպես. «...Որպեսզի մարդու միակ սերը երկուսի չբաժանուի, մեկը՝ Աստծուն, իբրև իր ստեղծողի, և միւսը հրեշտակին, իբրև իր փրկչի, այլ որպեսզի մեր ողջ սերը Աստծուն մնայ»:

Նա, որ ստեղծեց մեզ, Ի՞նքն էլ փրկեց մեզ, և Աստծուն ճշմարտապես սիրողը նա է, ով սիրում է Նրան ամենայն կերպ և ամբողջովին:

ԱՌԱՔԻՆՈՒԹԵԱՆ ՃԱՆԱՊԱՐՀՆԵՐԸ

*«Բարեպաշտների ճանապարհներն ուղիղ են»:
(Եսայի 26. 7)*

1. Մարդն այս աշխարհում ճանապարհ է ընկել ոչ միայն իր ծննդից դեպի մահն ընթանալու, այլ մանաւանդ երկրից երկինք բարձրանալու համար, քանի որ ամեն քանի վախճանը մարդու համար ամենաբարի արարիչ Աստուածն է: Բայց դե մարդն ի՞նչ, հազիւ արքունքի հասած՝ տեսնում է իր առաջ երկու ճանապարհ. մեկը դեպի վեր՝ երկինք է տանում, իսկ միւսը վար է իջեցնում, այսինքն՝ մեկը դեպի Արքայութիւն է բարձրացնում, միւսը՝ հեշտասիրութեան մէջ ընկղմում:

Առաքինութիւնը, որ դեպի վեր՝ երկինք է տանում մարդուն, դժուարին է թւում, քանի որ ինչպէս ասում են, առաքինութեան ճիւղերը քրտինքով և չարչարանքով են ծլարձակում: Իսկ հեշտասիրու-

թիւնը, թէև դէպի դժոխք է իջեցնում, սակայն իր դէմքին մեղմ կերպարանք տալով՝ իրեն դիւրին է ցոյց տալիս:

Ըստ այդմ, ո՞ր ճանապարհին ընտրի մարդը, ո՞ր ճանապարհով գնայ՝ դժուարի՞ն, թե՞ դիւրին: Արդարև, շատերն են կամենում դիւրին ուղիով ընթանալ, բայց նրանք, որոնք խելամիտ են ու նաև լուսաւորուած են Սուրբ Գրքով, ճանապարհորդներիս անցած ուղու ոչ թէ արտաքին տեսքին են նայում, այլ ներքին հանգամանքներին և դրա վրայ հենուելով են իրենց առաջ նպատակ են դնում, թէ ո՞ր ճանապարհին ընտրեն, որով առաջ ընթանան: Այս է ասում սուրբ մարգարէ Եսային. «Բարեպաշտների ճանապարհներն ուղիղ են, հարթ ու դիւրին են աստուածապաշտների ճանապարհները» (*Եսայի. 26. 7*):

2. Իսկապէս, առաքինութեան ընթացքը մեծ ջանք է պահանջում, քանզի «նեղ է ճանապարհը, որ տանում է դէպի կեանք» (*Մատթ. 7. 14*), սակայն ով փափագում է այդ նպատակին հասնել, նրա համար նեղ ճանապարհին անգամ դիւրին է դառնում: Յակոբն Ասորիք գնալիս կամեցաւ մայրամուտին մի տեղ քուն մտնել և, ըստ Սուրբ Գրքի, «առաւ

այնտեղի քարերից մեկը, դրեց գլխի տակ ու քնեց այնտեղ» (*Ծննդ. 28. 11*): Եւ քարեղէն բարձի վրայ քաղցր քուն մտաւ: Ասում են «քաղցր», քանի որ նա երագում տեսաւ մի սանդուղք, որը մինչև երկինք էր հասնում, և հրեշտակներ, որոնք ելնում ու իջնում էին դրա վրայով: Քարը, որը Յակոբը դրեց իր գլխի տակ, նշանակում է չարչարանք, որին առաքինի մարդը պետք է համբերի յանուն Արքայութեան: Եւ ինչպէս Յակոբը քարի վրայ քաղցր քուն մտաւ, նոյնպէս և քաղցր են դառնում բոլոր ջանքերն առաքինի մարդու, որը կամենում է դէպի երկինք՝ հրեշտակային դասը մտնել:

Ի՞նչ չի անի վաճառականը իր նիւթեղէն առևտրի համար. ծովի միջով կ'անցնի, օտար երկիր կը մեկնի, քաղցի ու ծարաւի կը դիմանայ: Ի՞նչ չի անում զօրականը անցաւոր պսակի արժանանալու համար. ծանր զէնք է կրում, նախալարձակ է լինում պատերազմի դաշտում, մարտնչում է թշնամու դէմ:

Եւ եթէ այսպիսի դժուարութիւնները տանելի են յանուն առօրեայ շահի կամ յանուն անցաւոր փառքի, ի՞նչը կարող է անհնար լինել յանուն Արքայութեան և յանուն անվախճան երկնային փառքի:

Եւ ուրեմն մարգարէն իրաւամբ է ասում, թե՝ «Ամբարիշտների ճանապարհներն ուղիղ չեն»:

3. Չափազանց շատ ուժ են վատնում բարեպաշտներն իրենց ճանապարհին, մինչև իսկ դառն տանջանքներն են համբերութեամբ տանում: Տեսէ՞ք, օրինակ, արեգակը ձեր աչքերին լոյս է բերում, և յայտնի է, որ նա իր լոյսի պայծառութիւնը բարեգթօրէն պահպանում է միշտ. թո՛ղ որ երկինքն ամպի ու շանթեր արձակի, նա, միևնոյն է, մշտապէս լուսաւորում է և վեհանձնօրէն բազմատեսակ շողարձակումներով ընթանում է իր ճանապարհով: Բարեպաշտները ևս, արեգակի օրինակով, երբ սկսում են շողալ, այլևս երբեք չեն շեղւում իրենց ուղուց, ինչ խոչընդոտ էլ պատահի, քանզի համբերութեամբ դիմանում են ցաւերին ու վշտերին, կախարդանքին և թշնամութեանը, սովին, չքաւորութեանը և մնացեալ բոլոր պատուհասներին:

Պատահական չէր, որ արեգակն իբրև օրինակ բերեցի բարեպաշտներին բնութագրելու համար, քանի որ բարեպաշտներն արեգակի նման ծագելով ու իրենց ուղիղ ճանապարհով ընթանալով՝ հասնում են իրենց նպատակին, որի համար ասում

Է մեր Տեր Յիսուս Քրիստոսը. «Այն ժամանակ արդարները երկնքի արքայութեան մէջ կը ծագեն ինչպէս արեգակը» (Մատթ. 13. 43):

Ինչու՞ ուրիշ օրինակով յայտնեմ ճշմարտութիւնը, երբ ահա նրանք՝ արդարները, մեր աչքի առաջ են: Քարքարոտ չէ՞ր սուրբ Ստեփանոս Նախավկայի ճանապարհը, սակայն որքա՞ն դիւրացաւ այդ ճանապարհը նրա համար, որ մինչև իսկ տեսաւ իր երանելի նպատակը. «Ահա տեսնում եմ, - ասում է նա, - երկինքը բացուած և մարդու Որդուն, որ կանգնած է Աստծու աջ կողմը» (Գործք 7. 55): Փշոտ չէ՞ր մեր Լուսաւորչի ճանապարհը խորից Էլ խոր վիրապի մէջ, սակայն այնքա՞ն դիւրացաւ այդ ճանապարհը, որ նա միշտ տեսնում էր Տիրոջ հրեշտակին: Ահա, տեսէ՛ք, թէ որքա՞ն դիւրին ու անցանելի են աստուածապաշտների ճանապարհները:

4. Իսկ եթէ մէկին անտանելի թուայ այն ճանապարհը, որով գնացին սուրբ Ստեփանոսն ու մեր սուրբ Գրիգոր Լուսաւորիչը և ուրիշ սրբեր, ապա թող իմանայ, որ ուրիշ ճանապարհներ Էլ կան, որոնց վրայ եթէ յայտնուի, կարող է հեշտութեամբ առաջ ընթանալ, եթէ կամենայ:

Առաջին, ամենահաստատուն ճանապարհը ճշմարտության ճանապարհն է, որն ընտրեց նախամեծար Դավիթը. «Քո ճշմարտության ճանապարհն ընտրեցի» (Սաղմ. 118. 30):

Կայ երկրորդ ճանապարհ, որը շատ յարգի է. դա գթության ճանապարհն է, որի մասին մեր Տերն ասում է. «Ողորմութիւն եմ կամենում և ոչ զոհ» (Մատթ. 9. 13):

Կայ նաև աւելի ապահով ճանապարհ, այն է՝ անմեղության ճանապարհը, որի մասին ասում է Դավիթը. «Երանի նրանց, ովքեր անբիծ ուղի են բռնել և ընթանում են Տիրոջ օրէնքով» (Սաղմ. 118. 1):

Միւս ճանապարհը, որն աւելի կարճ է, աղքատության ճանապարհն է, որով եթէ մեկն ընթանայ, աւելի նուազ կը սխալուի, քան միւսները, և ամենքից աւելի շուտ կը հասնի նպատակակետին, ըստ այն խօսքի, թէ. «Երանի՛ հոգով աղքատներին, որովհետև նրանցն է երկնքի արքայութիւնը» (Մատթ. 5. 3):

Յաջորդ ճանապարհն աւելի խաղաղ է. դա սիրոյ ճանապարհն է, որը ձգւում է դէպի Աստուած, որը և՛ ընկերոջը, և՛ թշնամուն իբրև բարեկամ է

ընդունում, ուստի արդարև կարելի է այս ճանապարհը խաղաղ կոչել: Եւ այս մասին է մեր Տերն ասում. «Ով Ինձ սիրում է, պիտի սիրուի իմ Հօրից. Ես էլ նրան պիտի սիրեմ և Ինձ պիտի յայտնեն նրան» (*Յովհ. 14. 21*): Կան սրանց նման ուրիշ ճշմարիտ ճանապարհներ, որոնցով ընթանալով՝ բարեպաշտները հասնում են երանաւետ կեանքի ու օթևանում այնտեղ:

5. Սակայն կան այնպիսի մարդիկ, որոնք այսպիսի ուղիղ ու դիւրին ճանապարհները թողած՝ գնում են հոգեմաշ ճանապարհով և ընկնում դժոխքի խորխորատը: Իսկ ովքե՞ր են նրանք:

Նախ՝ հպարտները, որոնք ցանկանում են վեր ելնել լեռնային, զառիվեր ճանապարհով: Կը հարցնեք, թէ ու՞մ են նման հպարտները. նրանք նման են նապաստակին, որ շատ ակելի հեշտութեամբ բարձրանում է զառիվերը, քան թէ այնտեղից իջնում, քանի որ նրա առջևի ոտքերն ակելի կարճ են, քան հետևինները: Այդ կերպ նաև հպարտները հպարտութեան լեռից դժկամութեամբ են իջնում, քայց սրընթաց բարձրանում են դէպի անագութեան տեղերը: Եւ նապաստակի առջևի ոտքերի նման՝ հպարտների փափագն առ Աստուած կարճ

Ե հետին «ոտքերից»՝ անցողիկ աշխարհի ձգտումից: Չէ՞ որ զուր չի ասում, որ «ով բարձրացնում է իր անձը, պիտի խոնարհուի»:

Հոգեմաշ ճանապարհը նախընտրողների երկրորդ խումբը ազահներն են, որոնց ցանկացածը Տերը աշխարհի մեծությունն է կոչում: Իսկ թե ուր է այս փշոտ ճանապարհն ազահին հասցնում, պարզորոշ ցոյց է տալիս սուրբ առաքեալը, երբ ասում է. «Ովքեր հարստանալ են ուզում, ընկնում են փորձութեան, որոգայթի և բազում անմիտ ու վնասակար ցանկությունների մեջ, որոնք ընկղմում-տանում են մարդկանց դեպի կործանում և դեպի կորուստ» (*Մ Տիմ. 6. 9*):

Կան այնպիսիք էլ, որոնք ախորժում են գնալ տղմոտ ճանապարհով. նրանք անառակ կեանք վարողներն են, որոնց մասին ասում է. «Մշտապես պիղծ են նրա ճանապարհները» (*Սաղմ. 9. 5*):

Կան նաև այնպիսի մարդիկ, որոնք սիրում են գնալ խաւարի ճանապարհով, սրանք նախանձներն են, որոնց «վա՛յ» է կանխագուշակում Սողոմոնը. «Վա՛յ նրանց,- ասում է,- ովքեր ուղիղ ճանապարհը թողած՝ կը գնան խաւարի ճանապարհով, ովքեր կուրախանան չարիքներ գործելով

և կը խնդան դեպի չարը խոտորուելով» (*Առակ. 2. 13-14*): Նրանց նպատակակետը դժոխքի բանտն է, քանզի գրուած է. «Ամբարիշտների ճանապարհները նման են խաւարի, և նրանք չգիտեն, թէ ինչպէս պիտի սայթաքեն» (*Առակ. 4. 19*): Իսկ մենք պիտի իմանանք, որ ամբարիշտները սայթաքելով դժոխքի խորխորատը պիտի ընկնեն, մինչդեռ բարեպաշտների ճանապարհները ու անցանելի և անվրէպ հասցնում են Երկնքի արքայութեանը:

ՊԱՀՔ ԿԱՄ ՊԱՀԵՑՈՂՈՒԹԻՒՆ

*«Եւ քառասուն օր ու քառասուն գիշեր ծոմ
պահեց»։ (Մատթ. 4. 2)*

1. Երբ Աստուած ստեղծեց մարդուն, կամեցաւ նրան աստիճանաբար բարձրացնել ու Երկնքի արքայութեան բարիքները վայելելու պատուին արժանի դարձնել և իբրև այդ վերելքի առաջին աստիճան սահմանեց պահքը՝ այն կարգելով բոլոր պատուիրաններից առաջ։ Եւ եթէ առաջին մարդն ի սկզբանէ պահէր այդ պատուիրանը, Աստուած նախ նրան իրաւունք կը տար ուտելու կենաց ծառից և ապա՝ կը բարձրացնէր նրան Երկնքի արքայութիւն։ Սակայն քանի որ մարդն առաջին աստիճանին բարձրանալ չկամեցաւ, Աստուած երկրորդին էլ թոյլ չտուեց մօտենալ, այլ արտաքսեց նրան դրախտից և կենաց ծառը յանձնեց սերովբէների պահպանութեանը։ «Գուցէ,- ասաց Տէրը,- նա ձեռ-

քը երկարի, քաղի կենաց ծառի պտղից և ուտի ու յաւիտենապէս ապրի»:

Իսկ մեր ամենագուր Փրկիչ Յիսուս Քրիստոսը երբ աշխարհ եկաւ, կամենալով մարդուն վերադարձնել իր նախկին փառքը՝ վերստին սահմանեց պահքը՝ ոչ միայն խօսքով, այլև գործով՝ Իր օրինակով, և «քառասուն օր ու քառասուն գիշեր ծոմ պահեց»: Եւ ինչպէս ուսուցիչն է իր աշակերտին ցանկանում գրել սովորեցնել, ինքն է գրում նրա առաջ ոչ թէ իր համար, այլ իր աշակերտի, որպէսզի նա սովորի, նոյնպէս և Քրիստոսը ոչ թէ Իր համար ծոմ պահեց, այլ մեզ համար, որպէսզի մեզ սովորեցնի: Նա Իր մկրտութիւնից յետոյ անմիջապէս շտապեց անապատ՝ ծոմ պահելու, որպէսզի մենք, որ մկրտուած ենք յանուն Հօր և Որդու և Սուրբ Հոգու, սովորենք սահմանուած օրերի պահեցողութեանը:

2. Քրիստոսը պահեցողութեամբ յաղթեց փորձողին և մեզ էլ նոյնը պատուիրեց, քանի որ մեր կեանքի պատերազմում մենք Քրիստոսի զինուորն ենք: Սուրբ Աւետարանի ոչ մի հատուածում չենք կարող ընթերցել, թէ սատանան յանդգնեց մերձենալ Տիրոջը, երբ Նա իր առաքինութիւնների գոր-

ծերն էր կատարում, այլ միայն այնժամ մօտեցաւ, երբ Տէրը ծոմ էր պահում, քանի որ նա՝ ամենաչարը, յիշում էր, թէ ինչպէս առաջին մարդը որկրամոլութեան պատճառով վտարուեց, և ուրեմն պահքն է մարդու ազատութեան գրաւականներից մէկը, ուստի պահեցողութեան ժամանակ է մօտենում: Եւ արդարեւ. «Կերակուրը մեզ դրախտից դուրս հանեց, իսկ պահքը մեզ վերստին վերադարձնում է այնտեղ»: Այս մասին է ասում նաև սուրբ Եկեղեցին. «Պատուիրանը չպահելով՝ մեռանք, բայց դու Քո օրինակը շնորհեցիր, որպէսզի պահելով կենդանանանք»:

Մեծ է աղօթքի զօրութիւնը, սակայն պէտք է պահքը նրան ընկեր դարձնել, որպէսզի աղօթքի այդ զօրութիւնն իրականանայ. «Այս տեսակ դեւը այլ կերպ դուրս չի ելնում, եթէ ոչ աղօթքով ու ծոմապահութեամբ» (*Մատթ. 17. 20*):

Տեսե՛ք, թէև աղօթքն է հրաշքներ գործում, բայց պահքն է նրա գործակիցը: Եւ **եթէ աղօթքը հոգևոր կեանքի նաւի առագաստն է, ապա պահքը նրա դէկն ու խիղճն է:** Եթէ աղօթքն իբրև բժիշկ ենք առաքում, ապա պահքը դեղն է բժշկութեան: Մովսէսը պահեցողութեամբ արժանի եղաւ Աստուած-

տեսութեանը, Եղիան Ենովքի հետ դասուեց. շատ Էին Հին Կտակարանի առաքինի սրբերը, բայց Քրիստոսն Իր այլակերպութեան օրը միայն այս երեքին թափոր կազմել տուեց և Իր հետ պայծառացրեց, քանի որ միայն նրանք պահեցողութեամբ Իրեն ընկերակից եղան: Երեք երիտասարդները բարելոյնեան հնոցի մէջ պահքի շնորհիւ անկիզելի մնացին: Դանիէլը պահքով իրենից հեռացրեց առիւծների կատաղութիւնը և անվնաս մնաց նրանց ժանիքներից:

Այլ պատեհ օրինակ ևս կայ՝ նինուեացիների պահքը, որի շնորհիւ նրանք փրկուեցին յանկարծահաս պատուհասից: Տարբերութիւնն այն է միայն, որ նրանք իրենց թագաւորի հրամանով պարտաւորուեցին պահք պահել, իսկ մենք՝ մեր երկնաւոր Թագաւորի հրամանով: Չէ՞ որ պահեցողութեան պատուերը ո՛չ թէ մարդը կամ հրեշտակը, այլ Ի՛նքը՝ Աստուած տուեց՝ նախ դրախտում ասելով Ադամին. «Բարու և չարի գիտութեան ծառից չուտէ՛ք», և ապա մարդացած Աստուած պահքը սահմանեց Ի՛ր օրինակով, նաև խօսքով՝ ասելով. «Կգան օրեր, երբ որ փեսան նրանցից կը վերցուի, ապա այդ օրերին ծոմ կը պահեն» (*Ղուկ. 5. 35*):

Ուրեմն, նինուէացիներից առաւել մե՛նք են պարտաւոր խստօրէն պահք պահել:

3. Խորամանկ է սատանան, մարդու դէմ պատերազմելու համար նախ նրա թոյլ կողմին է դիմում, որպէսզի դիւրութեամբ կարողանայ յաղթել: Երբ Յիսուսի թոյլութեամբ սատանան մօտեցաւ Նրան փորձելու, սկզբից չառաջարկեց երկրպագել իրեն, այլ նախ ասաց. «Ասա՛, որ այս քարերը հաց դառնան»: Երբ տեսաւ, որ իր այդ ջանքը ի դերն ելաւ, շարունակեց. «Քեզ այստեղից ցա՛ծ գցիր», և միայն յետոյ ասաց. «Ընկի՛ր ու երկրպագի՛ր ինձ»: Այս օրինակով սատանան նաև մեր առաջ է նախ որկրամոլութիւնն իբրև որոգայթ լարում, որի մէջ եթէ ընկնենք, նա այնուհետ մեզ ազահութեան խորխորատի մէջ կը քաշի, իսկ յետոյ էլ կը գցի հպարտութեան վիհի մէջ, ու այդպիսով մեղաւորը կը սկսի արհամարհել փրկութեան դէղը: Այս մասին է ասել իմաստունը. «Ամբարիշտն արհամարհում է չարիքները, երբ հասնում է դրանց խորքերը» (*Մտակ. 18. 3*):

Ուստի հենց սկզբից է պէտք պահքը պահել: Գուցէ քեզ աննշան թուայ պահքի պատուիրանը, քանի որ եթէ համեմատես միւս պատուիրանների

հետ, գուցե այն փոքր համարես և արհամարհես, սակայն այդ դեպքում քո այդ փոքր բացը քեզ թոյլ կը տայ արհամարհել նաև մեծագոյն պատուիրանները: Սա իմ խօսքը չէ, այլ Տիրոջ, որն ասում է. «Քչի մէջ անիրաւը շատի մէջ էլ անիրաւ է» (Ղուկ. 16. 10): Գող սատանան, քեզ արթուն տեսնելով, չի համարձակուում մեծամեծ մոլութիւններ քո մէջ մտցնել, իսկ երբ անհոգ քնած ես, մի փոքր մոլութիւն քո մէջ զգելով՝ բացում է դուռը առաւել մեծ մոլութիւնների համար: Եթէ այդ փոքրը տուն մտած չլինէր, դուռը փակուած կը մնար, և գողը դիւրին կերպով չէր կարողանայ տուն մտնել ու թալանել քեզ: Ուրեմն տե՛ս պահեցողութիւնն արհամարհելու վնասները և զգուշութեա՛մբ պահիր այն:

4. Նաև այս էլ իմանաք, որ պահքը երկու տեսակի է լինում՝ մարմնաւոր և հոգևոր: **Մարմնաւոր պահքը զգուշութիւնն է կերակուրներից, իսկ հոգևորը՝ զգուշութիւնը մեղքից:** Մէկն ամուր պարիսպ է ընդդէմ թշնամիների, իսկ միւսը՝ այդ պարիսպը պահպանող քաջարի զօրք: Պարիսպն առանց զօրքի հնարաւոր չէ պաշտպանել, և ոչ էլ զօրքն է կարող ապահով պատերազմել առանց պարսպի: Մարմնաւոր պահքը նաւ է, իսկ հոգևորը՝

ղեկ: Նաւն առանց ղեկի չի կարող ուղիղ ընթանալ, և ոչ էլ ղեկն առանց նաւի կարող է որևէ օգտակար գործ անել:

Այլ կերպ ասած՝ մէկը մարմինն է, միւսը՝ հոգին, և մարդն էլ ո՛չ սոսկ մարմին է և ո՛չ սոսկ հոգի, այլ կազմուած է երկուսի միութիւնից. ո՛չ մարդու հոգին կարող է առանց մարմնի որևէ բան անել, ոչ մարմինը՝ առանց հոգու: Կամենում եմ ասել, որ ո՛չ պահքն է ընդունելի առանց ուրիշներին բարեգործութիւն անելու, և ո՛չ բարեգործութիւնը՝ առանց պահքի: Եթէ քրիստոնէական վարքը հայելու նմանեցնենք, մարմնաւոր պահքն ապակին է, իսկ հոգևորը՝ արծաթը. այս երկուսից է կազմուած բարեպաշտութեան հայելին, և մէկն առանց միւսի ոչինչ չի կարող արտացոլել: Արդարև, հարկաւոր է մարմնաւոր պահքը, քանի որ եթէ դրախտում եղած ժամանակ այն անհրաժեշտ եղաւ, որքա՛ն առաւել՝ դրախտից դուրս եղած ժամանակ: Եթէ պատերազմից առաջ անգամ շէշտում է զենքի կարևորութիւնը, որչա՛փ առաւել այն կարևոր է պատերազմի ժամանակ: Եւ եթէ արդար Ադամին պահքը անհրաժեշտ էր իբրև կանխարգելիչ դեղ, առաւել ևս մեզ՝ մեղաւորներին է այն հարկաւոր

իբրև բժշկութեան դեղ: Սակայն մարմնաւոր պահ-
քը կատարեալ չէ, եթէ չզուգակցուի հոգևոր պահե-
ցողութեամբ, որն է՝ Աստծոյ պատուիրանները
պահպանելը:

Գրուած է. «Սրբիցէ՛ք պահս» (*Յովել 1. 14*): Իսկ
յայտնի է, որ պահքը մաքրում է աղօթքով և ողոր-
մութեամբ, քանի որ այս երեքը միասին են արժանի
Տիրոջ տաճարի սպասաւորութեանը. լոյսը ա-
ղօթքն է, իւղը՝ ողորմութիւնը, լապտերը՝ պահքը:
Յիմար կոյսերը լապտեր ունէին, սակայն իւղ և լոյս
չունէին, քանի որ իմաստուններից էին խնդրում և
ասում. «Ահա՛, մեր լապտերները հանգչում են»
(*Մատթ. 25. 8*): Այդ պատճառով էլ նրանք չկարո-
ղացան մտնել երկնային խորաններ, իսկ իմաս-
տունները, այդ երեքը միասին ունենալով, ներս
մտան: Այս մասին է գրուած. «Բարի են աղօթքները՝
պահեցողութիւններով և ողորմութիւններով» (*Տըք.
12. 8*):

Կառքը չորս անիւ ունի, երեքը որ կողմ
պտտուեն, չորրորդն էլ նոյն ուղղութեամբ պիտի
ընթանայ, եթէ անգամ հակառակ շրջուի: Հինգ
զգայարան ունի մարդը, եթէ չորսը մոլութեան մէջ
ընկնեն, ապա բերանն էլ նոյն մոլութեան մէջ

կընկնի, եթէ անգամ կերակուրներից խստագոյնս պահք պահի: Եւ ի՞նչ օգուտ, եթէ մէկը հրաժարուի մսից, բայց հայիոյի, սուտ խօսի ու չարութեամբ վարկաբեկի իր ընկերոջ անունը:

5. Իսրայէլացիները, երբեմն տրտնջալով Աստծոյ դէմ, ասում էին. «Ինչպէ՞ս է, որ մենք ծոմ պահեցինք, և դու չտեսար» (*Ես. 58. 3*): Այս նոյնն է, թէ ասես. «Ինչու՞ մեր պահքը Քո առաջ ընդունելի չեղաւ», ինչին պատասխանում է մարգարէն՝ Աստծոյ առաջ ասելով. «Ձեր ծոմապահութեան օրերին ձեր ցանկութիւններն էք կատարում», որով կամենում է ասել, որ «Ա՛յն է ձեր պահքի անգօր լինելու պատճառը, որ պահքի օրերին շարունակում էք կատարել ձեր չար կամքը»: Եւ մարգարէն սկսում է մէկ առ մէկ թուել նրանց չար արարքները՝ ասելով. «Կսկիծ էք պատճառում բոլոր նրանց, ովքեր ենթակայ են ձեզ: Հակառակութեան և կռիւների մէջ էք պահում և հարուածում էք տկարին» և այլն: «Այսպիսի պահեցողութիւն չընտրեցի ես,- ասում է Տէրը,- այլ դու քանդի՛ր անիրաւութեան հանգոյցը և հանի՛ր քո սրտից դիակալութիւնն ու յանցանք մի՛ գործիր քո եղբօր դէմ. խորտակի՛ր քո վաճառականական խարդախութիւնն ու բռնու-

թիւնը՝ հատուցելով քո պատճառած բոլոր վնասները, ների՛ր ու արձակի՛ր նեղեալներին և պատռի՛ր բոլոր անիրաւ մուրհակները, այսինքն՝ խոստովանութեամբ արձակի՛ր հոգիդ մեղքերի շղթաներից: Քաղցածների՛ն բաժանիր քո հացը, այսինքն՝ քաղցածներին կերակրի՛ր քո կերակուրներից, աղքատներին ու անտուններին տա՛ր քո տուն և հագցրո՛ւ մերկերին»: Այդժամ քո պահքն ընդունելի կը լինի և Աստուած կը լսի քեզ, քանի որ հենց դա՛ է կատարեալ պահքը, որ պէտք է պահել:

Արդ, բարեպաշտութիւն փափագե՛ք, որպէսզի ձեր պահքն արդիւնաւետ լինի, ուստի պահե՛ք այս օրինակով՝ զգուշանալով մեղքից և փութալով բարեգործութիւն անել՝ ըստ աստուածահաճոյ բարի կամքի:

ՔՐԻՍՏՈՆԷԱԿԱՆ ՊԱՐՏՔԸ

*«Երկինքների երկինքը Տիրոջն է, բայց երկիրը նա
տուեց մարդկանց որդիներին»։ (Սաղմ. 113. 16)*

1. Այս աշխարհում երկու բան կայ, որ մարդիկ պետք է ուսանեն՝ գիտությունը և արհեստը։ Գիտությունն ասելի նուրբ է, քան որևէ արհեստ, ընդ որում եթե արհեստ կարող են սովորել պարզ մարդիկ, գիտությունը հասանելի է միայն ազնուական և հանճարեղ մտքին։ Իսկ աստուածաբանությունը, իբրև գիտություն, առաել քան նուրբ է, քանի որ եթե բնական գիտությունները զգայարաններով են ճանաչելի, ապա աստուածաբանությունը, որ գիտություն է գերբնականի մասին, ըմբռնելի է միայն հաւատով։ Եւ այդ գիտութեան գանձարանը՝ Աստուածաշունչ Սուրբ Գիրքը, ոչ ամէն մտքի համար է ըմբռնելի։ Անգամ առաքեալները դեռևս Տիրոջ չարչարանքներից առաջ չէին կարողանում հասկանալ գրուածքները, և միայն Իր Յարութիւ-

նից յետոյ Յիսուս «բացեց նրանց մտքերը, որ հասկանան գրուածքները» (*Ղուկ. 24. 45*):

Արդ, եթէ Սուրբ Գիրքն այդչափ նուրբ է, ապա ուրեմն ինչու՞ է Դաւիթն այս դիւրին խօսքը գրել Սաղմոսներում. «Տիրոջն է երկիրն իր ամբողջութեամբ» (*Սաղմ. 23. 1*): Ո՞վ չգիտի, որ Տիրոջն է երկիրն իր ամբողջութեամբ, այսինքն՝ ողջ տիեզերքը, և կամ ո՞վ կարող է երկմտել, թէ Տէրն է, որ բաժին է տալիս Իր արարածներին: Ինչու՞ է, ուրեմն, սուրբ մարգարէն ակնյայտը աղաղակելով քարոզում. քանի որ նա ոչ թէ աստուածապաշտներին, այլ կռապաշտներին՝ է քարոզում, նրանց, ովքեր ապստամբելով Աստծոյ ճշմարտութեան դեմ՝ Տիրոջ երկիրը բաժանում էին և երկրի ամեն մի կողմը մի կուռքինն էին համարում: Ու միայն Հրեաստանի կողմն էին ճշմարիտ Աստծունը կարծում, քանի որ համարում էին, թէ «Իսրայէլի Աստուածը լեռների Աստուած է և ոչ թէ դաշտերի Աստուած» (*Գ. Թագ. 20. 23*):

Նաև Ասորեստանի Սենեքերիմ արքայի զօրապետ Ռափսակն էր աղաղակելով դիմում Երուսաղէմի ամեն մի բնակչի. «Թող ձեզ չխաբի Եգեկիան՝ ասելով, թէ «Աստուած պիտի փրկի ձեզ». արդեօք

ազգերի աստուածները կարողացա՞ն Ասորեստանի արքայի ձեռքից փրկել իրենց այս կամ այն երկիրը, որ ձեր Աստուածը կարողանայ իմ ձեռքից փրկել Երուսաղէմը» (Ես. 36. 18, 20): Տեսէ՛ք, թէ ինչպէս է անօրէն Ռափսակը իւրաքանչիւր երկրին մի աստուած «բաժին» հանում, իսկ ճշմարիտ Աստծուն տալիս է միայն Երուսաղէմը:

Այնպէս, ինչպէս ապստամբներից իւրաքանչիւրը, բռնութեամբ մտնելով ուրիշների թագաւորութիւնը, իրեն է հպատակեցնում գրաւած երկիրը և բնակիչներից հարկեր է վերցնում, այդպէս էլ հեթանոսները, մտնելով Տիրոջ աշխարհը, ամէն մէկն իր համար մի հատուած է կորզում և բնակիչների կողմից երկրպագութիւն է ստանում: Այս տեսնելով՝ սուրբ մարգարէն բողոքով դիմում է մոլորեալներին. «Ինչու՞ էք,- ասում է,- մոլորուած շրջում, ինչպէ՞ս էք կարողանում պէս-պէս աստուածներին վերագրել երկրի կողմերը. իմացէ՛ք, որ Տիրոջն է երկիրն ամբողջութեամբ»: Արդարև, արժանաւոր խօսք է գրի առնուած Աստուածաշունչ գրքում, սակայն այս խօսքից առաւել զարմանալի է, երբ լսում ենք, թէ «Աստուած այս երկիրը տուեց մարդկանց որդիներին», քանի որ նոյն սուրբ մարգարէն դար-

ձեռք առնում է. «Երկինքների երկինքը Տիրոջն է, բայց երկիրը նա տուեց մարդկանց որդիներին»:

2. Ամենաբարի Արարիչ Աստուած ինչպես Իր պատկերը շնորհեց մարդկանց որդիներին, նոյնպես և, իբրև տիեզերապետություն, երկիրն է տալիս նրանց: Առաջինի մասին Սուրբ Գիրքն ասում է. «Աստուած մարդուն ստեղծեց Իր պատկերով» (*Ծննդ. 1. 26*): Իսկ երկրորդի մասին ասում է Աստուածը. «Տիրեցէ՛ք դրան», - այսինքն՝ ողջ երկրին: Արդ, ինչպես Աստուածն է Տերը ողջ երկրի, նոյնպես և մարդն է տեր, սակայն ի՞նչ տարբերություն կայ Աստծոյ և մարդկանց միջև: Գիտցէ՛ք, որ եթէ Աստուած ինքնիշխան Տեր է, ապա մարդը տեր է Աստծոյ իշխանութեան ներքոյ. Աստուած ինչպես կամենում է, այնպես է տիրում երկրին, իսկ ահա մարդը պարտաւոր է տիրել ըստ Աստծոյ կամքի, այս պատճառով է Աստուած Եսայու գրքում ասում. «Քեզ Իմ անունով պիտի կոչեն՝ Իմ կամքը» (*Եսայի 62. 4*):

Այս դժուարըմբռնելի խօսքը Իր քարոզի ժամանակ պարզաբանեց Աստծոյ Որդին՝ մի պարզ առակի միջոցով՝ ասելով. «Մի տանուտեր կար, որ այգի տնկեց... և այն տուեց մշակներին» (*Մատթ. 21. 33*):

Այդ մարդը Աստուած է, որ աշխարհի՝ այգու իրական Տէրն է, իսկ մշակները մարդիկ են, որոնք Աստծոյ կողմից այգու տէր կարգուեցին, այդ պատճառով նաև Աւետարանում Աստուած անուանուում է մեծատուն, իսկ մարդը՝ տնտես: Մեծատուն Աստուածն ըստ Իր կամքի տիրում է աշխարհին: Տնտես մարդը պարտաւոր է տիրել ըստ Աստծոյ կամքի, իսկ մի օր Էլ նրանից հաշիւ պիտի պահանջուի, ինչպէս անիրաւ տնտեսից պահանջուեց: Յիմար է նա, ով հաշիւ տալ չի կարողանայ կամ Էլ կը մեծամտանայ՝ յամարձակուելով սեփականացնել իրեն հանձնուածը, ինչպէս արեցին հին մշակները, որոնք ասում էին. «Մերը կը լինի ժառանգութիւնը»: Այդ պատճառով նրանք զրկուեցին այն պատուից, որ ունէին. այգին ուրիշ մշակների յանձնուեց, որպէսզի նրանց խնամածութեան ներքոյ լինելով՝ ճիշտ ժամանակին պտուղ տար, որով Էլ մշակները Երկնքի արքայութեանը կարժանանային:

«Երկինքների երկինքը Տիրոջն է, բայց երկիրը նա տուեց մարդկանց որդիներին», սակայն ո՛չ նրա համար, որ նրանք յաւիտեան երկրի վրայ մնան, այլ որ պատեհ ժամին Երկինք բարձրանան: Երկիրը

տուեց և Երկնքի՛ն հաղորդակից դարձրեց, Տէրը երկիրը տուեց առանց վարձի, սակայն Երկինքը՝ ոչ առանց վարձի, այլ՝ վարձով: Երկիրն ինքնին մարդկանց ուսուցանում է Աստծուն վարձ տալ ու աղափսով Երկինքը ժառանգել, քանի որ ինքը՝ երկիրը, տալիս է մարդկանց իր պտուղը (*Սաղմ. 66. 7*): Արդ, երեք բան ունի մարդը, որոնցից մարդը պարտաւոր է հասոյթ տալ Արարիչ Աստծուն. դրանք են՝ հոգին, մարմինը և ունեցուածքը:

3. Նախևառաջ մարդը պարտաւորւում է Աստծուն հասոյթ տալ իր հոգուց, քանի որ մարդու հոգին է, որ իր ազատ կամքով կարող է գործել բարին և չարը: Հոգու բարեգործութիւններն են, ինչպէս յայտնի է՝ աղօթքը, բարի մտածմունքը, սրտի սրբութիւնը, կարիքաւորների նկատմամբ ցաւակից վերաբերմունքը և սրանց նման այլ ոչ նիւթական բարեգործութիւններ: Իսկ ահա հոգու չարագործութիւններն են ատելութիւնը, հայհոյութիւնը, չարամտութիւնը, սրտի անմաքրութիւնը, աղքատների նկատմամբ անգթութիւնը և հոգու այլ այսպիսի մեղքեր:

Ըստ այդմ, քրիստոնեան պարտաւոր է հասոյթ տալ Աստծուն իր հոգուց, այսինքն՝ սիրել Աստծուն

և իր ընկերոջը, աղօթքի կանգնել ջերմեռանդօրէն, իրագործել բարի մտքերը, սուրբ սիրտ ունենալ և ողորմած լինել կարիքաւորների նկատմամբ: Առաւելևս պարտաւոր է եղբայրասիրութիւն ունենալ, քանի որ այն լրացնում է բոլոր օրէնքները, որի մասին ասում է սրբազան Պօղոս առաքեալը. «Ամբողջ օրէնքը այս մէկ խօսքի մէջ է ամփոփուում. «Պիտի սիրես քո ընկերոջը, ինչպէս՝ ինքդ քեզ»» (*Գաղ. 5. 14*): Այս կանոնը սուրբ առաքեալն իրենից չի յօրինում, այլ յիշեցնում է Տիրոջ պատուիրանը, քանի որ Ինքը՝ Տէ՛րն է ասում Սուրբ Աւետարանում. «Պիտի սիրես քո ընկերոջը, ինչպէս քո անձը» (*Ղուկ. 10. 27*):

Եւ արդ, սերը մեզ կրկնակի բարիք է բերում. նախ՝ վանում է չարը, որը մենք մեզ, բնականաբար, չենք կամենում, և երկրորդ՝ մեզ մղում է դիմացինի համար գործել ա՛յն բարիքը, որը մենք ինքներս այդքան փափագում ենք ստանալ: Ըստ առաջինի՝ հարկաւոր է սիրել ընկերոջը, այդ մասին է ասում Տօբիթը. «Ինչը դու ատում ես, ուրիշին չանես» (*Տօբ. 4. 16*): Իսկ երկրորդի մասին ասում է մեր Տէրը. «Այն ամէնը, ինչ կը կամենաք, որ մարդիկ ձեզ անեն, այդպէս և դո՛ւք արեք նրանց» (*Մատթ. 7. 12*): Սա՛ է

եղբայրասիրութեան օրէնքը. ոչ միայն որևէ չար քան չանել ու չցանկանալ եղբօրը, այլև փափագել ու ջանք գործադրել դիմացինին բարիք գործելու համար: Իսկ եթէ ուզում ես իմանալ, թէ որն է այդ ամենի վարձը, լսիր սուրբ Յովհաննէս Աւետարանչին. «Ով սիրոյ մէջ է ապրում,- ասում է առաքեալը,- բնակւում է Աստծոյ մէջ, և Աստուած բնակւում է նրա մէջ» (*Ա Յովհ. 4. 16*):

4. Երկրորդ՝ քրիստոնեան պարտաւոր է հասոյթ տալ Աստծուն իր մարմնից: Մարդու զգայարաններն այն դռներն են, որոնց միջոցով մարդը գործում է, քանի որ մարդն աչքով տեսնում է, ականջով՝ լսում, բերանով՝ խօսում և ձեռքերով՝ գործում: Ուստի մարմնի հասոյթներն են՝ աչքով Աստծոյ գործերը տեսնելը և Նրանից գոհանալն ու ձեռքերով բարիք գործելը, իսկ մարմնի չարագործութիւններն են՝ պազշոտաբար նայելը, անվայել խօսակցութիւններ լսելը, ամօթալի բաներ խօսելը և չարիք գործելը: Արդարութեան կամ չարութեան իրաքանչիւր գործ զգայարանների միջոցով է գործւում: Օրինակ՝ լեզուի մասին գրուած է. «նրանց լեզուները ինչպէս սուսեր են» (*Սաղմ. 56. 5*): Նաև՝ «Լեզուս նման է արագ գրող դպրի գրչի»

(Մատթ. 44. 2): Բայց ի՞նչ ընդհանրություն կայ սրի ու գրչի միջև: Սուրը սպանութեան գործիք է, իսկ գրիչը գործիք է գրչութեան, սակայն լեզուն այս երկու գործառոյթն էլ կարողանում է իրականացնել, քանի որ ոմանք լեզուով սպանում են՝ ուրիշի համբաւի մասին բամբասելով, իսկ ոմանք էլ լեզուով օրհնում ու փառաւորում են Աստծուն: Նայեք մի գործին և ապա միւսին ու տեսեք, թե որքան հակառակ են այդ երկու գործերը իրար:

Բերանի մասին գրուած է. «Անէծքով, դառնութեամբ ու նենգութեամբ լի է բերանը նրա» (Մատթ. 9. 7), և թէ՛ «Բերանն իմ իմաստութիւն պիտի խօսի» (Մատթ. 48. 4): Այսինքն՝ մէկն իր բերանով անիծում է, իսկ միւսն իմաստուն բաներ է ասում: Միևնոյն «գործիքով» կրկին հակառակ գործեր են կատարւում:

Ձեռքերի մասին գրուած է. «Նրանց աջը լի է կաշառքով» (Մատթ. 25. 10), և թէ՛ «Ձեռքերիս կարկառումն իբրև երեկոյեան պատարագ թող լինի» (Մատթ. 140. 2): Այդպէս մէկն իր ձեռքերը կաշառքով է լցնում, իսկ միւսը՝ առ Աստուած բարձրացնում:

Գրուած է նաև ականջների մասին. «Ասէս օձի, վիշապ օձի թոյնով խցանուած են նրա ականջ-

ները» (*Մատթ. 57. 5*), և թե՛ «Առականերին պիտի ա-
կանջ դնեն» (*Մատթ. 48. 5*): Տեսնու՛մ ես՝ մեկը փա-
կում է իր ականջները, որպեսզի չլսի Աստծոյ պատ-
գամներն ու չքաղցրացնի իր սիրտը, իսկ միւսն իր
ունկը խոնարհեցնում է Աստծոյ առակաւոր խօս-
քերը լսելու համար: Արդ, հարկ է, որ քրիստոնեան
հասոյթ տայ Աստծուն իր զգայարանների աստ-
ուածահաճոյ գործերի միջոցով:

5. Եւ երրորդ՝ մարդ պարտաւոր է հասոյթ տալ
Աստծուն նաև իր ունեցուածքից: Ամէն ինչ, որ ունի
մարդ, իրենից չէ, որ ունի, այլ Աստծուց է ստացել:
Այս մասին ասում է սրբազան առաքեալը. «Ի՞նչ
ունես, որն Աստծուց ստացած չիինես» (*Ա. Կոր. 4. 7*):
Աշխարհի թագաւորներն իրենց զօրքին վարձ են
տալիս ըստ նրանց թուաքանակի, սակայն երկնա-
ւոր թագաւորը՝ Աստուած, այդպէս չի վարում, այլ
ոմանց պէտք եղածից աւելին, իսկ ոմանց էլ՝ չափա-
զանց քիչ է տալիս, քանի որ ամենքին կամենում է
վարձատրել հանդերձեալ կեանքում: Որպեսզի
ովքեր պէտք եղածից աւելին ստանան, կարեկից
լինելով աղքատներին՝ երկնային վարձն ընդունեն,
իսկ ովքեր աւելի պակաս ստանան, համբերելով

աղքատութեանը՝ նոյնպէս երկնքից վարձ ստանան՝ արդէն յարկ եղածի չափով:

Երկուսն էլ՝ հարուստ թէ աղքատ, երկնաւոր վարձատրութեան միևնոյն ճանապարհով են ընթանում, սակայն աղքատների ճանապարհն աւելի դիւրին է, և թերևս այդ պատճառով մեր Տէր ու Փրկիչ Յիսուս Քրիստոսն ասաց, թէ «հարուստը դժուարութեամբ կը մտնի Երկնքի արքայութիւն» (*Մատթ. 19. 23*): Բայց Տէրը նաև, գրաւով հարուստներին, հեշտացրեց նրանց ճանապարհը՝ պատուիրելով ողորմութիւն անել կարիքաւորներին՝ համարելով, որ հենց Իրեն՝ Տիրոջն են անում, «քանի որ,- ասում է,- իմ այս փոքր եղբայրներից մէկին արեցիք այդ, ի՛նձ համար արեցիք» (*Մատթ. 25. 40*): Այս պատճառով դատաստանի ժամանակ Նա պիտի ասի ողորմածներին. «Քաղցած էի, և ինձ ուտելիք տուիք, ծարաւ էի, և ինձ ջուր տուիք խմելու, մերկ էի, և ինձ հագցրիք», - և այսպէս՝ ըստ կարգի:

Այս ամենից պարզ երևում է, որ երբ մէկը աղքատի համար ինչ-որ մի բան է անում, Քրիստոսը դա համարում է Ի՛ր համար արուած, որի մասին ասում է նաև իմաստունը. «Աղքատին ողոր-

մութիւն տուողը փոխ է տալիս Աստծուն» (*Առակ. 19. 17*): Իսկ ահա Սուրբ Աւետարանն էլ մի մութիակ է, որում գրուած է. «Տուէ՛ք, և պիտի տրուի ձեզ» (*Ղուկ. 6. 38*): Մենք արժանահաւատ մարդկանց առանց որևէ կասկածի փոխ ենք տալիս և նրանց մութիակն էլ զգուշութեամբ պահում ենք. Աւետարանը հենց այդ մութիակն է, որ մենք պետք է պահենք մեզ մօտ, քանի որ Քրիստոսից աւելի արժանահաւատ որևէ մէկը չկայ: «Երկինք և երկիր պիտի անցնեն,- ասում է Նա,- բայց իմ խօսքերը չպիտի անցնեն» (*Մատ. 24. 35*), իսկ Նրա խօսքը ա՛յս է. «Տուէ՛ք, և պիտի տրուի ձեզ»: Ուրեմն, իմ սիրելի՛ ունկնդիրներ, մեր հոգուց, մարմնից և ունեցուածքից նուիրե՛նք որևէ բանի անկարօտ Աստծուն, որպէսզի նաև մենք, երբ ժամանակը գայ, ողորմութիւն գտնենք Նրանից:

ԽՈՆԱՐՀՈՒԹԻՒՆ

«Նա չէ՛ր նտրեալը, որ ինքն իրեն է գովաբանում»:
(Բ Կոր. 10.18)

1. Ովքեր ցանկանում են ոսկի կամ մարգարիտ փնտրել, խորը խոնարհում են. մեկը հողի մեջ, իսկ միւսը՝ ծովի: Ըստ Տիրոջ մեկնաբանության՝ Երկնքի արքայությունը թաքնուած գանձ ու գեղեցիկ մարգարիտ է, որը գտնելու ընդամենը մեկ միջոց կայ՝ խոնարհությունը:

Բոլոր ամբարտաւանները դուրս պիտի նետուեն, և միայն խոնարհները պիտի արժանանան Երկնքի արքայութեանը: Եթէ խոնարհությունը մեղաւորներին արդար է դարձնում, ինչպէս մաքսատրի դէպքում, ապա որքան առաւել արդարներին կատարեալ արդար

կը դարձնի, չէ՞ որ ճշմարիտ արդարները խոնարհութեամբ էին կենցաղավարում:

Երեք երիտասարդները, որ առաքինի էին, երբ հնոցի մէջ նետուեցին, ջիշեցին իրենց առաքինութիւնների մասին, այլ ասացին. «Մեղանչեցինք ըստ ամենայնի, անօրէնութիւն ու յանցանք գործեցինք», և այս ասելու շնորհիւ դասակից եղան հրեշտակին: Իսկ հրեշտակները երբ հպարտացան, դևերի վերածուեցին: Երբ մարդիկ խոնարհուեցին, ոչ միայն դասակից եղան հրեշտակին, այլև իրենք հրեշտակացան, և հնոցը, ինչպէս հրեշտակին, այնպէս էլ երիտասարդներին չկարողացաւ վնասել:

Սուրբ Պետրոսը խոնարհութեամբ ասում է Տիրոջը. «Հեռու՛ գնա ինձնից, Տէր, քանի որ ես մեղաւոր մարդ եմ»: Նոյնպէս և սուրբ Պօղոսն է խոնարհութեամբ ասում. «Արժանի չեմ առաքեալ կոչուելու», սակայն նա Փեսային բարեկամ դարձաւ, և Բրիստոսն Իր ձեռքը դրեց նրա գլխին: Պետք չէ ասել, թէ ով ի սկզբանէ արդէն սուրբ էր, խոնարհուելով առաւել պայծառացաւ: Տե՛ս, հեթանոսների հարիւրապետը նոյնպէս խոնարհուելով ասաց. «Արժանի չեմ, որ իմ տուն

մտնես», և այդպես բոլոր հրեաներից աւելի զարմանալի գտնուեց: Այս ամենին նայելով՝ սուրբ Պօղոսն ասում է. «Ոչ թէ նա է ընտրեալը, ով ինքն իրեն է գովաբանում, այլ նա, ում Տէրն է գովում» (Բորնթ. 10. 18):

2. Ինքն իրեն գովաբանելը նշանակում է պատուել, մեծարել և փառաւորել սեփական անձը, բայց դու լսի՛ր ինձ ու տե՛ս, որ իր անձը գովաբանող հրեշտակի վախճանը սատանայի վերածուելն է, քանի որ նա մտքում ասում էր. «Ամպերից էլ վեր ելնեմ, նմանուող լինեմ Բարձրեալին»: Բայց նա այլ պատասխանը լսեց. «...ահաւասիկ դժոխք ես իջնելու և երկրի խորքերը» (Ես. 14. 15): Բարձրեալին նմանուել կամեցաւ, բայց անարգուեց ամենքից առաւել. այս է, ահա՛, սեփական անձը պատուելի համարողի ու գովաբանողի վախճանը: Իսկ ում Տէրն է գովում, նա ընտրեալ է դառնում, իրապէ՛ս է պատւում և իսկապէս՝ փառաւորւում:

Տէրը ուրիշ մէկին չի գովաբանում, այլ միայն խոնարհութեան ճանապարհով ընթացողին: Յայտնի է, որ Տէրը գովաբանեց Չաքեոսին, և երբ տեսաւ, որ վերջինս ելել է ժանտաթզենու վրայ,

հրամայեց նրան իսկոյն իջնել. «Չաքոն՝ս,- ասաց,- շտապի՛ր, իջի՛ր այդտեղից» (*Ղուկ. 19. 5*): Իսկ ինչո՞ւ է հրամայում իջնել ծառից, եթե Չաքոնը ծառի վրայ էր, հնարաւո՞ր չէր խօսել նրա հետ: Մի իմաստուն այսպէս է մեկնաբանում. «Քրիստոս նրան ծառից իջեցնելով, նախ նրա խոնարհութեան մէջ համոզուեց, քանի որ Յիսուս ունի ընտրում էր, նախ խոնարհութեամբ էր փորձում, ուստի նաև Չաքոսին հրամայեց իջնել ծառից»: Այդպէս նաև մինչև Յովսէփին Եգիպտոսի իշխանութիւնը յանձնելը նախ նրան կոփեց ստրկութեամբ և նոր միայն տէրութեան գահին նստեցրեց: Մովսէսին բարձրացրեց՝ Իսրայէլի առաջնորդութիւնը նրա ուսերին դնելով, բայց նախ նուաստ վիճակի միջով անցկացրեց՝ կարգելով ոչ բանական արարածների՝ ոչխարների հովիւ, և յետոյ միայն կարգեց բանական Էսկների՝ մարդկանց հովիւ: Եւ այսպէս իր համար խոնարհ բաժին խնդրող ամէն ոք լսում է Տիրոջից. «Բարեկա՛մ, աւելի վե՛ր մօտեցիր» (*Ղուկ. 14. 10*):

Փառքի հասնելու միակ եղանակը փառքից փախչելն է: Եթե կամենում ես փառքի հասնել, մի՛ ձգտիր փառքի: Ով պատիւ չի փնտրում, նրան

ամենքը պատում են, իսկ ով փնտրում է, արհամարհում է ամենքից:

3. Թեև խոնարհությունն ըստ իր իմաստի որոշակի ցածրություն է ենթադրում, սակայն սուրբ Յովհան Ոսկեբերանն այն առաքինությունների գլուխ է անուանում՝ Քրիստոսի խօսքին հետևելով, որ ասում է. «Երանի՜ հոգով աղքատներին» (*Մատթ. 5. 3*): Հոգով աղքատները խոնարհներն են: Որևէ մեկն իր գլխին չի կարող աւելի գեղեցիկ զարդ ունենալ, քան խոնարհությունն է, քանի որ Նա, ով երկինքների երկնքում է բնակում՝ Աստուած, ցանկանում է նայել ա՛յդ զարդին, որի մասին ասում է ամենասուրբ կոյս Մարիամի դեպքում. «Որովհետև Նա իր հայեացքը դարձրեց իր աղախնի խոնարհության վրայ» (*Ղուկ. 1. 48*):

Խոնարհների դեմքերն աստուածային շնորհներով այնպե՛ս են գեղեցկացած, որ որևէ նկարիչ անկարող է նմանօրինակ մի բան պատկերել, եթե անգամ հազար երանգներ իրար խառնի:

Խոնարհների աչքերն այնքա՛ն են հեզահայեաց, որ միչև իսկ Աստծուն կարող են տեսնել՝ «Երանի՜

նրանց, որ սրտով մաքուր են, որովհետև նրանք Աստծուն պիտի տեսնեն» (*Մատթ. 5. 8*):

Խոնարհների շուրթերը հոգևոր օրհնությիւն են բարբառում առ Աստուած և մարդասիրութեան խօսքեր՝ մտերիմների նկատմամբ:

Խոնարհների ձեռքերն ու ոտքերն իրենց լաւ գործերն են ի ցոյց դնում:

Խոնարհների սրտերը պատարագ են Աստծոյ համար, քանի որ «խոնարհ հոգին է պատարագն Աստծոյ» (*Մաղմ. 50. 19*):

Ահա սրա՛նք են խոնարհների զարդերը:

4. Իսկ հպարտների զարդերն են պայծառ հանդերձանքը, շքեղ տունը, ձիերն ու ջորիները, ոսկեզարդ կառքերը, որոնց միջոցով հպարտօրէն կամենում են շլացուցիչ երևալ, որովհետև մարդ լինելու պատիւը կորցրած լինելով՝ ձգտում են այլ կերպ իրենց վրայ վերցնել գոնէ ուրիշների խօսքերն ու փառքը: Այս ախտով հիւանդացաւ Նաբուգոդոնոսորը, քանի որ ոսկեծոյլ արձան կանգնեցնել տուեց ու կամեցաւ այդ ոսկու միջոցով փառքի հասնել և ո՛չ իր կենդանի պատկերի միջոցով, և այդ պատճառով կենդանու կերպարանք ստացաւ:

Չուր է մարդ հպարտանում իր մարմնի շնորհներով. եթե նա ուժեղ է, ուրեմն աւելի պիտի խոնարհուի, քանի որ գազաններն իրենից ուժեղ են, ուստի մեծ ամօթ է գազանների շնորհով պարծենալը: Եթե գեղեցիկ է, ապա սիրամարգից աւելի գեղեցիկ չէ, որի գոյնզգոյն փետուրները մահուանից յետոյ անգամ պայծառ փայլում են, իսկ մարդկային գեղեցկութիւնը դեռ մահից առաջ խամրում է: Եթե փորենք մեռածների՝ խորը փոսում գտնուող մարմինները, երբեք չենք կարող տարբերել գեղեցիկը տգեղից, քանի որ գեղեցիկներն ու տգեղները միանման հող են դարձել:

Ինչպէս իր մարմնի շնորհներով, այնպէս էլ աշխարհիկ հարստութեամբ զուր է հպարտանում մարդը, քանզի եթե հարստութիւնը ոսկին, արծաթը և պատուական քարերն են, ապա դրանք մարդու սեփականութիւնը չեն, այլ՝ աշխարհի: Մենք ոչինչ չենք բերել աշխարհ և ոչինչ չենք կարող աշխարհից տանել: Ոչ ոք իր ունեցած որևէ բան աշխարհից դուրս կիրառել չի կարողանայ և դեռ կենդանուց էլ ստորին վիճակում է յայտնուելու: Նրա համար լաւ կը լինէր բնաւ բանական չլինել,

քան թե, կոչուած լինելով թագաւոր լինել, սպասաւորից աւելի վատը լինել: Լաւ կը լինէր, եթէ նա բնաւ իր գլխին թագ չդնէր, քան թէ նման վատ բանական մարդ լինէր:

5. Գրուած է. «Հովիտներն առատ ցորեն պիտի բերեն» (Սաղմ. 64. 14): Հովիտները՝ բլուրներից ցած գտնուող հարթավայրերը, այն բանի շնորհիւ են առատ ցորեն տալիս, որ անձրևների ջրերը, անկարող լինելով մնալ լեռների վրայ, իջնում ու պտղաբեր են դարձնում դրանք: Լեռներն օրինակն են հպարտների, որոնց վրայ չի իջնում Աստծոյ շնորհների անձրևը. «Տէրը հակառակ է ամբարտաւաններին. Նա շնորհ է տալիս խոնարհներին» (Առակ. 3. 34): Իսկ հովիտներն օրինակն են խոնարհների, որոնց վրայ միշտ իջնում է Աստծոյ շնորհը, քանի որ Նա «շնորհ է տալիս խոնարհներին»: Այս պատճառով էլ **խոնարհները բազում առաքիւնութիւններ են ունենում:** Ծառերը, որոնք տնկուած են հովիտներում, այնքան հողմակոծութեան չեն ենթարկւում, որքան այն ծառերը, որոնք լեռների վրայ են: Ըստ այս օրինակի՝ խոնարհներն աւելի անվրդով են հողմերի փորձութիւններից, քան

հայարտները: Եւ ինչպէս մանր ձկները դիւրութեամբ են ճողորպում ցանցից կամ ուռկանից, իսկ աւելի մեծերը՝ ոչ, նոյնպէս և նրանք, որ խոնարհեցնում են իրենց անձը, յաղթող են դուրս գալիս սատանայի փորձութիւններից: Եւ սրան հակառակ, ինչպէս կայծակներն առաւել յաճախ հարուածում են բարձրադիր, քան ցածրադիր վայրերին, նոյնպէս և ամբարտաւանները մի՛շտ վտանգի են ենթակա:

Յայտնի է, որ Յոբը, բազմիցս պատերազմելով սատանայի դէմ, միշտ յաղթող գտնուեց, իսկ ինչպէ՞ս. ըստ Սուրբ Գրքի՝ նա յաղթեց սատանային՝ լինելով աղբանոցում (*Յոբ. 2. 8*): Չարմանալի է, որ Յոբը, աղբանոցում նստելով, սատանայի բոլոր որոգայթները կորստեան մատնեց, և այդ ա՛յն բանի շնորհիւ, որ աղբանոցում նստածի համար ներքև ընկնելու տեղ չկայ, այլ հակառակը՝ նա կարող է վեր բարձրանալ Նրա՛ օգնութեամբ, ով «բարձրացնում է աղքատներին գետնից և տառապեալներին վեր քաշում աղբանոցից» (*Սաղմ. 112. 7*):

Գրուած է. «Գաբրիէլ հրեշտակը Աստծոյ կողմից ուղարկուեց Գալիլիայի մի քաղաքը, որի անունը

Նազարեթ էր» (Ղուկ. 1. 26): Արդ՝ ինչու՞ է Տերը Նազարեթն ընտրում Յիսուսի մարդեղության համար, և ոչ թե մեկ այլ քաղաք: Ըստ մի իմաստունի՝ դրա պատճառն այն է, որ Նազարեթն անպարհապ ու փոքրիկ մի քաղաք էր: Եւ ի՞նչ է սա ենթադրում: Մեկ ուրիշ իմաստուն յաւելում է, որ Քրիստոս փոքրիկ Նազարեթ քաղաքում է ծնւում ու մեծանում, իսկ Երուսաղէմ մեծ քաղաքում՝ չարչարում և խաչ բարձրացում: Տեսե՛ք, որ մեր փրկութիւնը խոնարհութեան մէջ է թաքցուած, իսկ մեր ամբարտաւանութեան, հպարտութեան մէջ այն վտանգուած է: Ամենասուրբ կոյս Մարիամը Նազարեթում է յղանում Յիսուսին, Երուսաղէմում՝ կորցնում. այսպէս և մեր փրկութիւնը հպարտութեամբ վտանգում է, իսկ խոնարհութեան մէջ ապահով է մնում: Ապա ուրեմն՝ խոնարհութիւն ունենանք մեր անձերում, որպէսզի կարողանանք փրկութեան հասնել մեր Տէր Յիսուս Քրիստոսով: Ամէն:

ՈՂՈՐՄՈՒԹԻՒՆ

«Ողորմութիւն եմ ուզում և ոչ թէ զոհ»:
(Մատթ. 12.7)

1. Սուրբ Աւետարանի պատմութիւններից մէկն այն մասին է, որ երբ Յիսուս շաբաթ օրով աշակերտների հետ քայլում էր արտի միջով, աշակերտները, որ քարոզի պատճառով քաղցած էին մնացել, սկսեցին հասկեր պոկել և ուտել, իսկ փարիսեցիներն այս տեսնելով, յանդիմանեցին Յիսուսին՝ ասելով. տե՛ս, Քո աշակերտներն անում են մի բան, որը թոյլատրելի չէ անել շաբաթ օրը: Յիսուսն էլ երկու օրինակով արդարացրեց Իր աշակերտներին: Նախ՝ Դաւթի օրինակով, որն իր հետ եղած մարդկանց հետ մտաւ Աստծոյ տունն ու կերաւ առաջաւորութեան հացը (Աթագ. 21. 6): Բայց քանի որ նա այդպէս արեց, որպէսզի յագեցնի իր

քաղցը, այդ արարքն անմեղադրելի համարուեց, «ապա ուրեմն նաև Իմ աշակերտներն են անմեղադրելի,- ասում է Յիսուս,- քանի որ, ինչպես Դավթի դեպքում էր, քաղցի պատճառով այդ արեցին»:

Իսկ իբրև երկրորդ օրինակ՝ Յիսուսը բերում է քահանաներին, որոնք շաբաթ օրերին տաճարում զանազան ողջակիզություններ են անում: Բայց քանի որ դա կրօնի գործ էր, այդ պատճառով նրանք անմեղ էին համարվում, «ապա ուրեմն նաև Իմ աշակերտները,- ասում է Նա,- անմեղ են, քանի որ պաշտօնեաներն են նոր՝ բարձրագույն կրօնի», որի մասին է նաև այս խօսքը. «Բայց ես ասում եմ ձեզ, որ տաճարիցն էլ մեծն է այստեղ»: Ապա Յիսուսը յաւելեց այն խօսքը, որը Օսէե մարգարեն նախապես ասել էր. «Ողորմություն եմ ցանկանում և ոչ թե զոհաբերում» (*Օսէե 6.6*): Չէր կամենում զոհաբերություն, քանի որ ողորմություն առաւել շատ էր կամենում. ահա այս մասին է մեր այս ատենաբանությունը:

2. Ողորմածությունը հոգևոր արհեստ է, որի ուսուցիչը Քրիստոսն է: «Ողորմություն եմ կամենում», - ասում է Նա: Այս արհեստի

արհեստանոցը երկնքում է, իսկ նրա ստեղծագործություններն էլ ոչ թե երկաթից ու պղնձից են, այլ բարի կամքից ու բարեմտությւնից: Իսկ նրա վաստակը երկնային ու երկրային բարիքներն են: Այս արհեստը բոլոր արհեստներից ազնուագոյնն է, քանի որ այն ոչ թե ոտքերին հագնելու մի բան է ստեղծում, այլ դեպի երկինք է ուղղում մեր ոտքերը, ոչ թե կտաւից հանդերձներ է կարում, այլ երկնային հարսանիքի համար պատշաճ լուսեղէն պատմունճան է հագցնում, ոչ թե քարե տներ է շինում, այլ երկնքում՝ Աբրահամի գոգում է հանգչեցնում, և ոչ թե միայն մարմինն է բժշկում հիւանդություններից, այլ նաև հոգին է ամբողջովին ապաքինում մեղքից: «Ողորմություն տուէք, և ահա ամեն բան սուրբ է ձեզ համար» (Ղուկ. 11. 41):

Տեսնու՞մ ես այս արհեստի գործունը: Արհեստը մէկն է, բայց նրա գործերը՝ բազում: Հող մշակելը կերակրում է միայն, ջուլհակութիւնը միայն զգեստաւորում է, հիւանդութիւնը միայն պատսպարում է: Իսկ ողորմածութիւնն անում է ամեն բան՝ կերակրում է երկնային հացով, զգեստաւորում է լուսեղէն պատմունճանով և

բնակեցնում է երկնքում՝ լուսեղեն ապարանքների մեջ:

Հող մշակելը չափազանց դժուար գործ է, քանի որ հարկաւոր է եզներ լծել, հողը հերկել, ձմռանը պայքարել ցրտի դէմ, ամռանը պաշտպանել շոգից: Իսկ ահա ողորմութիւնը բաւականին դիւրին է, քանզի այն չունի այսպիսի դժուարութիւններ. ո՛չ եզների կարիք կայ, ո՛չ հերկելու, ո՛չ ձմռան ցրտից կամ որևէ այլ վնասակար բանից պաշտպանելու: Թէև երկրում ես սերմանում ողորմութիւնը, սակայն հաւաքում ես երկնքում, ուր ո՛չ գողն է գալիս գողանալու, և ո՛չ ցեցն է ապականում այն: Նաև՝ երկրում սերմանուածը միայն այստեղ է մեզ պիտանի, իսկ ողորմածութեան արհեստը և՛ այստեղ, և՛ հանդերձեալ կեանքում է պետք գալու. այստեղ սերմանում ես, իսկ հանդերձեալ կեանքում՝ հնձում: Այս ոչ թէ իմ խօսքն է, այլ սուրբ Պօղոսի, որի միջոցով Հոգին էր խօսում. «Իսկ բարին գործելուց,- ասում է նա,- չձանձրանանք, որովհետև յարմար ժամանակին պիտի հնձենք» (Գաղ. 6. 9):

Մնացեալ արհեստները կապուած են իրար հետ, ինչպես մշակութիւնը՝ դարբնութեան, քանի

որ եթե դարբինը մշակին խոփ և մանգաղ չտայ, վերջինս չի կարող մշակել հողը: Այդպես նաև ջուկիակը բազում ուրիշ արհեստներ է ծառայեցնում իր գործին, այլապես անգործ կը մնայ: Այսպես նաև միւսները, իսկ ահա ողորմութիւնը կախուած չէ որևէ այլ բանից, այլ միայն՝ մեծ կամքից և բարի մտքից:

3. Եւ թող ոչ ոք չասի, թէ ողորմութիւն անելու համար ունեցուածք է յարկաւոր: Ընթերցի՛ր սուրբ Աւետարանի պատմութիւնը և տե՛ս, որ մի չքաւոր այրի երկու լումայ գցեց գանձանակի մէջ, ու դա մեծ ողորմութիւն համարուեց նրա կողմից, քանի որ այդ տեսնելով՝ Յիսուսն Իր մօտ կանչեց Իր աշակերտներին և ասաց. «Ճշմարիտ եմ ասում ձեզ, որ այդ չքաւոր այրին աւելի շատ գցեց, քան գանձանակի մէջ միւս բոլոր դրամ գցողները» (*Մրկ. 12. 43*): Ուստի եթէ դու ոսկու մեծ ձուլակտոր չունես, բայց մի բաժակ սառը ջուր ես տալիս ծարաւներին, այս արհեստի գազաթնակետին հասած կը լինես: Կեանքի պայմանները յաճախ ողորմութիւն են պահանջում, ուրեմն տու՛ր դիմացինիդ նրան անհրաժեշտը և կը կուտակես անկողոպտելի գանձ, անմահ կեանք և յաւիտենական տուն:

Եթէ մէկը քեզ սովորեցնէր մի հմտութիւն, որով կարողանայիր պահպանել ունեցուածքդ առանց որևէ կորստի, մարմինդ՝ առանց հիւանդութեան, և դու էլ միանգամայն երջանիկ լինէիր, արդեօք ամէն բան չէի՞ր տայ՝ այդ արհեստը ուսանելու համար: Եւ ահա ողորմածութիւնն է այդ արհեստը, որ անկորուստ պահպանում է ունեցուածքդ. «Գանձեր դիզեցէ՛ք ձեզ համար երկնքում, որտեղ ո՛չ ցեց և ո՛չ ժանգ չեն ոչնչացնում, և ո՛չ էլ գողերը պատերն են ծակում ու գողանում» (*Մատթ. 6. 20*): Այն անմահ է դարձնում մարմինդ. «Ողորմութիւնը փրկում է մահից» (*Տըք. 12. 9*): Եւ լիովին երջանկացնում է անձդ՝ քեզ Աստծուն նմանեցնելով. «Գթասի՛րտ եղէք, ինչպէս որ ձեր Հայրը գթասիրտ է» (*Ղուկ. 6. 36*):

4. Արարիչը մեզ հրամայեց ողորմած լինել ոչ միայն այն պատճառով, որ այս արհեստը շատ օգտակար է, այլև մեզ խնամելու նպատակով այն սերմանեց մեր մէջ: Քանզի մենք մեր աչքով ակնյայտ տեսնում ենք, թէ ինչպէս են ծնողները խնամում զաւակին, եղբայրները՝ եղբայրներին, ազգակիցները՝ ազգակիցներին և մարդը՝ մարդուն: Երբ տեսնում ենք կեղեքուած մէկին,

զայրանում ենք կեղեքողի վրայ, երբ տեսնում ենք կարիքի մեջ եղող մեկին, վշտանում ենք, սգալորին տեսնելով՝ արտասուում, իսկ «ամբարիշտները անողորմ են» (*Առակ. 12. 10*): Ուստի մենք երախտապարտ ենք աղքատին օգնելիս, երբ վարձ ենք ստանում մեր աշխատանքի համար, քանի որ **երբ մենք աղքատին քիչ ենք տալիս, Աստուած հատուցում է մեզ բազմապատիկը**: Այս «առևտուրը» չափազանց շահաւետ է, քանի որ ոչ թէ հարիւրի վրայ քսան կամ երեսուն ենք աւելացնում, այլ անցաւորի միջոցով անանցն ենք ձեռք բերում՝ մեծ առաւելութեամբ, և երկրաւորի միջոցով՝ երկնայինը:

Արդարեւ, այս ամենը հենց այդպէս է լինելու, և Տէրն Ինքն է դա յայտնի դարձնելու դատաստանի ժամանակ, քանզի այնժամ Նա արդարներին հրաւիրելու է Իր արքայութիւն՝ ասելով. «Քաղցած էի, և ինձ ուտելիք տուիք, ծարաւ էի, և ինձ ջուր տուիք՝ խմելու, օտար էի, և ինձ ձեր մէջ առաք, մերկ էի, և ինձ հագցրիք...» և այսպէս շարունակ (*Մտթ. 25. 35-36*): Եւ բոլոր յիշատակուածները ողորմութեան գործերն են: Իսկ ձախակողմեաններին տէրը պիտի ուղարկի դէպի անշէջ հուրը՝ ասելով.

«Քաղցած էի, և ինձ ուտելիք չտուիք, ծարաւ էի, և ինձ ջուր չտուիք...» և այսպէս շարունակ:

Ի՞նչ է սա նշանակում: Մի՞թէ միայն ողորմութիւնն է առաքինութիւն, և մեղք է միայն անողորմութիւնը: Ինչու՞ Տէրը արդարների այլ առաքինութիւնները չի յիշատակում, չի ասում, թե՛ եղբայրասէր էիք, խոնարհ էիք, համբերող էիք և այլն: Որովհետև **ողորմութեան մէջ ամփոփուած են մնացեալ բոլոր առաքինութիւնները**: Նոյնկերպ նաև մեղաւորներին չի յանդիմանում՝ ասելով, թէ եղբայրատեաց էիք կամ հպարտ և կամ ամբարիշտ, քանի որ անողորմութեան մէջ պարունակւում են մնացեալ բոլոր մեղքերը:

5. Ողորմութիւնը ոչ միայն տուողին է օգուտ, այլև նրա ժառանգներին, ուստի եթէ մէկը կամենում է իր ժառանգների համար բարիք գործել, թող որ բազում ողորմութեան գործեր անի, քանի որ ողորմածների զաւակները որևէ բանի կարօտ չեն մնայ, որի մասին ասում է Դավիթը. «Մանուկ էի ես և ծերացայ, բայց արդարին արհամարհուած չտեսայ կամ նրա զաւակին՝ հաց մուրալիս» (*Սաղմ. 36. 25*): Օրինակով բացատրենք սա: Յայտնի է, որ ողորմած Էր Աբրահամը, դրա

շնորհիւ որքա՛ն շատ օգուտ եղաւ նրան. մնացեալ մեծութիւնները դեռ մի կողմ, նաև նրա գոգում արդարների հանգիստը սահմանուեց: Եւ ոչ միայն այսքանը, դեռ նրա ժառանգների վրայ էլ բարիք տարածուեց, քանզի թէև Աբրահամի որդիները՝ իսրայելացիները, ամբարտաւան ժողովուրդ էին, բայց և այնպէս իրենց ողորմած հօր շնորհիւ Աստծոյ զանազան ողորմութիւններին արժանացան:

Ինչու՞ Աստուած անապատում իսրայելացիներին հրեշտակների հացը պարգևեց, որի մասին ասում է Դաւիթը. «Չհաց հրեշտակաց կերին մարդիկ» (*Սաղմ. 77. 25*): Որովհետև Աբրահամը՝ նրանց հայրը, կերակրեց հրեշտակներին: Աբրահամն իր ծառի հովանու ներքոյ բազում աղքատների էր պատսպարում, ուստի և անապատում ամպը հովանի եղաւ նրա որդիներին:

Աբրահամը «բաժանեց ու տուեց աղքատներին. նրա արդարութիւնը կը մնայ յաւիտեան» (*Սաղմ. 111. 9*): Տեսէ՛ք այս անգին ժառանգութիւնը և նման ժառանգութիւն թողէք ձեր որդիներին: Եւ ամենն իմանալով՝ մենք և մեր որդիները մեզ քարոզուած

ողորմածութիւնը կրենք մեր մէջ, ուսուցանենք այս
օգտակար արհեստը: Սովորե՛նք ողորմութիւն
անել, քանի որ մենք ևս կարիք ունենք Աստծոյ
ողորմութեանը՝ այստեղ և հանդերձեալ կեանքում,
սակայն այդ ողորմութեանը չենք կարող
արժանանալ ուրիշ կերպ, այլ միայն՝ աղքատներին
բաժին տալով. «Տուէ՛ք, և պիտի տրուի ձեզ» (*Ղուկ. 6.
38*):

ՊԱՐԿԵՇՏՈՒԹԻՒՆ ՀԱՆԴԵՐՁԱՆՔԻ ՄԷՋ

*«Զգո՛յ՛շ եղէք այդ օրէնսգէտներից, որ ուզում են
շքեղ զգեստներով ման գալ»։ (Մարկ. 12. 38)*

Յայտնի է, որ մարդուն երեք տեսակի՝ հոգևոր, մարմնական և արտաքին բարիքներ են պատշաճում:

Հոգևորը հոգու առաքինություններն են, որ ճշմարիտ բարիք է, քանզի անկորուստ են մնում և երկնքում են գանձում:

Մարմնականը մարմնի գեղեցկությունն է և ոյժը, որ թէև ներքին երևոյթ են, բայց կերպարանք ունեցող բարիք են, քանզի դիւրաւ և արագ անցնում-գնում են:

Իսկ արտաքին բարիք են ունեցուածքը, ինչքը, որոնցից ամենամօտիկը մարմնի համար հագուստն է: Արտաքինը կարելի է և բարիք

չհամարել, քանզի ստանալիս տանջում է տիրոջը և հետզհետե հոգու վրայ հոգսեր աւելացնում:

Բայց արի ու տես, որ հպարտութեան անիրաւ մեղքը ոչ միայն հոգևոր ու մարմնաւոր բարիքների մէջ է կարողանում մտնել, այլ նաև արտաքին բարիքների մէջ է սպրդում և մտնում: Գիտէ՞ք, քանի՜ հոգևոր անձինք են հպարտութեան ախտով վարակուել և իրենց հոգևոր բարիքներն ունայնացրել: Բացայայտ տեսնում ենք, որ այն թագաւորում է նաև մարմնական բարիքի վրայ:

Իսկ ի՞նչ տեղ ունի արտաքին բարիքը, որ թէև մարմնից դուրս է, սակայն նրա վրայ նոյնպես յաճախ թագաւորում է հպարտութիւնը, ինչպես Իսրայելի դպիրների դէպքում, երբ նրանք կամենում էին շրջել երևելի հանդերձանքով, որոնցից Իր աշակերտներին զգուշանալ է յորդորում երկնաւոր վարդապետ Յիսուս Քրիստոսը՝ Սուրբ Աւետարանի միջոցով ասելով. «Զգուշացէ՛ք օրէնսգէտներից, որոնք ուզում են պատմունճաններով շրջել և սիրում են ողջոյններ ընդունել հրապարակներում» (*Ղուկ. 20. 46*):

2. Երևելի ու թանկարժէք հագուստները պաճուճուած են տեսակ-տեսակ զարդերով:

Սակայն դրանք, լինեն թանկարժեք, թե էժան, նոյն կերպ են ծածկում մեր մերկութիւնը և նոյն կերպ տաքացնում: Եւ ի՞նչ առաւելութիւն ունի թանկը կամ էժանը:

Ամեն առարկայ մի նպատակի է կոչուած, և երբ փոխւում է այդ նպատակը, մոլութեան է վերածւում: Հագուստի նպատակն է՝ ծածկել մերկութիւնն ու պահպանել մարմինը ցրտից: Իսկ եթէ փոխւում է դա, սնապարծութեան ու մահացու մեղքի է վերածւում: Հագուստն այնքան պետք է լինի, ասում է Սուրբ Պօղոսը, որքան կարիքն է պահանջում՝ չպետք է «գարդարուել մարգարտով ընդելուզուած ոսկեայ հիւսքերով կամ պճնագարդ զգեստներով» (Ա Տիմ. 2. 9): Ինչ կերակուր կամ հագուստ ունենք, ասում է Սուրբ Պօղոսը, նրանով պիտի բաւարարուենք, որով նա կամենում է ասել, որ հագուստն այնպիսին պետք է լինի, որ ընդամենը հագնել կարողանանք:

Պարկեշտութիւնը փայլ է ստանում հագուստի ընտրութեամբ: Այն աչք է շոյում արտաքինից. նախ՝ նիւթից, որը պետք է յարմար ու գործածելի լինի, ոչ ասելին: Երկրորդ՝ ձևից, որ պարզ լինի և ոչ թէ ձևաւոր՝ տեսնողներին ցոյց տալու համար:

Երրորդ՝ մաքրութիւնից, որ վայելուչ լինի և ոչ թէ աղտոտ, իսկ սրանցից աւելին մոլութիւն է:

Բայց գուցէ ոմանք ասեն, թէ ամօթ է անզարդ, Ժժան զգեստներ հագնելը, քանզի երբ մարդիկ տեսնեն, կը պախարակեն: Հարց տամ՝ ո՞վ է ստիպում, որ իրեն շատ նայեն. նա, ով երևելի հագուստներ է կրում, թե՛ նա, ով հասարակ է հագնուում: Յայտնի է, որ հասարակ զգեստ հագած մարդուն նայում են ու անցնում. երևելի հագուստ հագած մարդուն ակնապիշ նայում են ու հետաքրքրում. «Տեսնես ո՞վ է այս մարդը, որտեղի՞ց է...»:

Արդ՝ ո՞րն է աւելի ամօթալի, երբ ամենքը նայում ու քննարկման նիւթ են դարձնում անձդ, թե՛ երբ որևէ մէկը չի նայում և անցնում է: Ուրեմն եթէ ոչ ամօթի, ապա ինչի՞ համար է պճնուելը: Ընդունի՛ր, քեզանից աւելի անմիտ ես համարում քեզ նայողին, սթափուի՛ր անմտութիւնից. եթէ չես կամենում որսալ, ինչու՞ ես զարդարանքովդ որոգայթ լարում:

3. Ի՞նչ է հագուստը: Յստակ է՝ մեր աղքատութեան նշանն է, քանզի երբ մարդը երջանկութեան մեջ էր դրախտում, նրա հագին

կար միայն լուսեղէն պատմունճան, իսկ երբ մեղք գործեց, այնժամ հագուստի կարիք ունեցաւ: Տեսաւ Աստուած մարդուն մեղքերի մէջ և որպէս մեղաւորութեան նշան՝ նրան կաշուեայ հագուստներ հագցրեց, որպէսզի նա տեսնի, ճանաչի իր մեղքերն ու ապաշխարի: Ուստի հագուստն ինքնին մարդկանց որդիների անարգանքի յաւերժական յիշատակն է, քանզի տրուեց՝ որպէս պատիժ մեղքերի համար, և ինչպէս մեղքերը, այնպէս էլ հագուստ կրելու կարիքը փոխանցուեց մարդու որդիներին:

Յիմար է այն պարծենկոտը, որ ուրախանում է իր ոսկեայ շղթաներով, որ թէև ոսկեայ են, բայց միևնոյն է՝ կապանքներ են: Իր ողջ ունեցուածքից զրկուած և ծառայի սեղանի փշրանքներին անգամ կարօտ մնացած հարուստը կարո՞ղ է արդեօք պարծենալ, թէ ոսկի ունի իր բերանում: Բայց ահա այդպիսի մի բանով է պարծենում մարդկութիւնը, քանի որ զրկուելով լուսեղէն պատմունճանից՝ հողի սողունների և վայրի կենդանիների կարիքն է ունենում, որպէսզի դրանց մաշկը ծածոց դարձնի իր մարմնի համար:

Խոհեմ մարդն իր համար փառք է համարում ոչ շքեղ հանդերձանքը, իսկ ով կամենում է յարգանքի արժանանալ հազուստի շնորհիւ, ցոյց է տալիս, թէ չունի յարգանքի արժանի մէկ այլ բան: Դու ի՛նքդ զարդ դարձիր հազուստին, և ոչ թէ հազուստը՝ քեզ: Սաղափը, որից մարգարիտ է ծնւում, ողորկ լինի, թէ խորդուբորդ, վնասակար չէ մարգարտին, քանզի դրանից մարգարտի գինը վաճառելիս չի նուազում:

4. Դաւիթ մարգարէն ասում է. «Արքայադստեր ողջ փառքը իր մէջ է» (*Սաղմ. 44:14*): Արքայադուստրը նոյնպէս մարդ է, որ ստեղծուած է ամենամեծ թագաւոր Աստծոյ պատկերով, ուրեմն նրա ամբողջ փառքը, այսինքն՝ զարդեղէնը, գեղեցկութիւնը պէտք է ներսում՝ հոգում լինեն, ոչ թէ մարմնի վրայ: Իսկ եթէ հակառակն է լինում, անարգութեան է վերածւում, ըստ գրուածի, որ ասում է. «Ես ծառաներ եմ տեսել, որ ձի հեծած են շրջել, և իշխաններ, որոնք երկրի վրայ քայլել են ծառաների նման» (*Ժող. 10:7*): Ոչ մէկի համար ընդունելի չէ այդպիսի անկարգութիւնը: Երկիրը, որ ամեն ինչ անտրտունջ կրում է իր վրայ, դա չի՛ տանի, որի մասին գրուած է. «Երեք բան կայ,

որոնցից դողում է երկիրը, և մի չորրորդն էլ կայ, որից չի կարողանում հանդարտուել. ծառան է դա, երբ թագաւոր է դառնում» (*Առակ. 30. 21-22*):

Երբ Աստուած ստեղծեց մարդուն, նրա ներսում պատուական հոգին դրեց, ինչպէս բնութիւնը հողի ներսում պահում է ոսկին, արծաթն ու պատուական քարերը, կամ ինչպէս դառն կեղևի տակ պահում են անուշահամ պտուղները: Իսկ պճնասէր մարդը իր բեհեզեայ հագուստի տակ պահում է միս ու ոսկոր, արիւն ու այլ բաներ, ինչպէս դպիրներն էին, որոնց Տէրը նմանեցնում է մեռելների գերեզմաններին, քանի որ զարդարուած գերեզմանի պէս արտաքինից գեղեցիկ են, բայց ներսից լի են զարշուրեամբ: Այդպէս դպիրները արտաքուստ զարդարուած էին երևելի հանդերձանքով, բայց ներքուստ լցուած էին մեղքերի զարշահոտութեամբ:

5. Պարկեշտութեան այս առաքինութիւնը ոչ միայն հագուստով, այլ ձեր բոլոր զգայարաններով պէտք է փայլի: Գիտէք, որ մկրտութեան պահին մեր զգայարանները օծւում են հոգու իւղով, ուրեմն՝ դրանցից պէտք է անուշահոտութիւն բուրի առ Աստուած՝ ըստ Սուրբ Պօղոս առաքեալի ասածի.

«Քրիստոսի բուրմունքն ենք Աստծոյ առաջ» (Բ Կոր. 2. 15): Ուրեմն՝ եթէ ձեր զգայարանները պարկեշտութեան զարդեր չունենան, անուշահոտութեան փոխարէն գարշահոտութիւն կը գայ դրանցից, և ինչպէ՛ս Աստուած կը հոտոտի:

Դու մարդ ես, որնէ գարշահոտ բան ձեռքդ չես առնում, աւելին՝ զգում ու երես ես դարձնում դրանցից: Իսկ Աստուած ինչպէ՛ս պետք է Իր ձեռքերում ընդունի քեզ, եթէ քաղցր չես բուրում: Չէ՛ որ գրուած է. «Արդարների հոգիներն Աստծոյ ձեռքին են» (Իմաստ. 3. 1): Իսկ գարշահոտութիւն բուրողները կ'ընկնեն Աստծոյ ձեռքերից, որի մասին դարձեալ գրուած է. «Նրանք քո ձեռքից մերժուեցին»:

Եթէ կամենում եք անուշահոտութիւն լինել Աստծոյ համար, ձեր բոլոր զգայարանները զարդարե՛ք պարկեշտութեամբ: Պարկեշտ առաքիւնութիւնները հայելու պէս ցոյց են տալիս մարդու ներսը, քանի որ դրանց միջոցով երևում է մարդու բնոյթը: Ինչպէս ժամացոյցի սլաքի աշխատանքը անիւների՝ կարգաւորուած լինելու նշան է, այնպէս էլ զգայարանների՝ աչքերի, լեզուի, ձեռքերի և այլ անդամների շարժումները նշան են

կարգաւորութեան, երբ պարկեշտութեամբ են կարգաւորուած: Իսկ եթէ զուրկ լինեն պարկեշտութիւնից, յոռութեան նշան են, քանզի գրուած է՝ «Մարդու հագուստը, երեսի ծիծաղը և ոտքի քայլքը պատմում են նրա մասին» (*Միքայ. 19. 27*):

ԶԳՈՒՇԱՑԻՐ ՄԵՂՔԻՑ

*«Խուսափի՛ր չարից և բարիք գործի՛ր»:
(Սաղմ. 33. 15)*

1. Մեղքը լինում է երկու տեսակի. Այն ծնւում է նախ՝ ինչ-որ բան անելու և ապա՝ ինչ-որ բան չանելու պատճառով: Եւ այդպէս կարող ենք մէկը կոչել մեղք, միւսը՝ յանցանք: Եւ քանի որ արգելուածն անելը մեղք է, իսկ պատուիրուածը չանելը՝ յանցանք, ուստի այս երկուսն էլ հաւասարապէս դատապարտելի են: Սուրբ Աւետարանում երկու չար ծառաներ են յիշատակւում. մէկն իր մտքում ասաց. «Իմ տէրը ուշանում է գալ» (*Մատթ. 24. 48*), և սկսեց հարուածել ծառայակիցներին, ուտել ու խմել հարբեցողների հետ: Իսկ միւսն առաւ իր տիրոջ արծաթը, գնաց, հողը փորեց և թաքցրեց այն (*Մատթ. 25. 18*): Այն

առաջինն ինչ-որ մի բան անելով մեղք գործեց, երբ վնասեց իր ծառայակիցներին, կերաւ-խմեց զեխութեամբ, իսկ երկրորդը զանցառութեամբ մեղք գործեց, քանի որ չաւելացրեց իր տիրոջ արծաթը, այլ թաքցրեց հողի տակ: Եւ երկուսն էլ նոյն կերպ պատժուեցին. մէկին տէրը հարուածեց սպանեց ու կեղծաւորներին բաժնեկից դարձրեց: Միւսին էլ հրամայեց տանել արտաքին խաւարը, այսինքն՝ դատապարտեալների բնակավայրը:

Տեսէք, մեղաւորն ու յանցաւորը նոյն կերպ պատժուեցին, այդ պատճառով է Դաւիթ մարգարէն խրատում աստուածապաշտներին հաւասարապէս զգուշանալ և՛ մեղքից, և՛ յանցանքից: Առաջինի մասին ասում է. «Խուսափի՛ր չարից», իսկ երկրորդի մասին՝ «Բարիք գործի՛ր». այս երկուսի մասին խօսենք աւելի մանրամասն:

2. Մարգարէն ասում է՝ «Խուսափի՛ր չարից», և չի ասում՝ «Մի՛ գործիր չարը», որով կամենում է մատնանշել, թէ մարդը որքա՛ն պէտք է զգուշանայ չարից, ոչ միայն չարիք չգործի, այլև ընդհանրապէս չմօտենայ չարին, իսկ եթէ զգայ, որ այս կամ այն գործը չար է, ինքնակամ հեռանայ դրանից,

որովհետև գուցե մեկը վատահ է, որ չար բան չի անում, սակայն հնարաւոր է, որ մօտենալով անգամ մեղանշելու առիթ ունենայ:

Ինչու՞ է այսքան զգուշացնում՝ հեռու մնալ չարից. որովհետև այս զգուշութիւնն է բարի գործերի սկիզբը: Ու նաև, եթե մեկը կամենում է բարիք գործել, ապա պետք է նախ խուսափի ու փախչի չարից: Այս կերպ ամենաբարի Արարիչ Աստուածը, երբ կամեցաւ երկիրը ծաղիկներով ու ծառերով զարդարել, նախ մաքրեց այն՝ ջրերը մի տեղում հաւաքելով. «Թող երկնքի տակ գտնուող ջրերը,- ասում է,- հաւաքուեն մի տեղ, և երևայ ցամաքը»: Ջրերը նախատիպն են մոլութիւնների, որոնք անհրաժեշտ էր նախ հեռացնել, որպէսզի երևար ցամաքը. այդպէս՝ մեղքից մաքրուած մարդու հոգում ծլարձակում են առաքինութիւնների ծառերն ու ծաղիկները:

Այդպէս են անում նաև հողագործները. նախ հողը մաքրում են փշերից ու քարերից, ապա տնկում են որթը կամ ցանում սերմերը: Եւ ուրեմն, եթե մեկը կամենում է արդիւնաւետ բարեգործութիւն անել, պետք է նախ մեղքի փշերից և քարերից սրբուի: Աբրահամը հաւատքի

հայր եղաւ՝ կատարելով աստուածային այս հրամանը. «Հեռացի՛ր քո երկրից, քո ցեղից ու քո հօր տնից» (*Ծննդ. 12.1*): Աբրահամը չէր ընդունի փրկութեան աւետիսը, եթէ չհեռանար կռապաշտների երկրից, այդ կերպ մենք ևս չենք կարող մեր փրկութեան աւետիսը ստանալ, եթէ նախ չհեռանանք մեր մեղքերից: Մովսեսն աստուածախօս եղաւ, բայց մինչ այդ նա նախ հեռացաւ փարաւոնի տնից, ինչպէս սրբազան առաքեալն է ասում. «Հաւատո՛ւ է, որ Մովսէսը երբ մեծացաւ, մերժեց փարաւոնի դստեր որդի կոչուել» (*Եբր. 11. 24*): Այսպէս մենք ևս Աստծոյ հետ դաշն կը կապենք, եթէ մեղքի տնից հեռանանք դէպի ապաշխարութեան անապատները:

Մանանան չէր իջնի եբրայեցիների բանակի վրայ, եթէ մինչ այդ Եգիպտոսի ալիւրը սպառուած չլինէր: Եգիպտոսի ալիւրը մեղքի նախօրինակն է, իսկ մանանան նախատիպն է սուրբ Հաղորդութեան, որին արժանի չենք լինի, եթէ չսպառենք մեր բոլոր մեղքերը: Աստուած իսրայելացիներին Քանանի երկիրը պարգևելիս նրանց նախ պատուիրեց ոչնչացնել այդ երկրում եղած ամեն բան, որպէսզի այնտեղի մարդիկ իրենց

չար գործերով խորայելացիների համար մեղքի մեջ ընկնելու առիթ չդառնային: Աւետեաց երկիրը մեր հոգին է, որը մենք այստեղ ծառայեցնում ենք մեր թշնամիներին, այսինքն՝ մարմնին, աշխարհին և սատանային: Այժմ, սակայն, Աստուած կամենում է այն դարձնել պարզելի մեզ, միայն թե հենց սկզբից պատուիրելով, որ վերացնենք այնտեղի բոլոր չար բնակիչներին, այսինքն՝ մեղքը և մեղք գործելու ցանկութիւնը, որպէսզի մեզ համար այլևս մեղքի մեջ ընկնելու առիթ չլինի: Երբ Իսրայելը պարտութիւն կրեց Գայիի մարդկանցից, Աստուած Յեսուի միջոցով ասաց Իսրայելին. «Նզովք կայ ձեր մեջ, դուք չէք կարող կանգնել ձեր թշնամիների առաջ, մինչև որ նզովքը ձեր միջից չվերացնէք» (*Յեսու 7. 13*): Այս խօսքով նաև մե՛զ է դիմում, որպէսզի մեզնից վերացնենք մեղքի նզովքը: Ու քանի որ ինչքան բեռնաւորուած լինենք մեղքով, այնքան անկարող կը լինենք մարտնչել հոգևոր թշնամիների դէմ, ուստի մեզ մեծ զգուշութիւն է հարկաւոր մեղքից հեռու մնալու համար:

3. Սուրբ մարգարէ Դաւիթն ասում է. «Ով սիրում է մեղքը, ատում է իր անձը» (*Սաղմ. 10. 6*), քանի որ մեղքը մեծ չարիք է հասցնում այն գործողին: Նախ,

տակնուվրայ է անում մեղաւորի կեանքը, քանի որ մեղքը թունաւոր մեղր է. ճաշակելիս քաղցր է թւում, սակայն աստիճանաբար թունաւորում է, ու եթէ այն սիրում և ուտում ես, նշանակում է՝ ատում ես ինքդ քեզ:

Երկրորդ՝ մեղքը տակնուվրայ է անում խիղճը, կատաղի է դարձնում մեղաւորին, չարութեամբ քացում է իր բերանը և դառը խօսքերով անդադար ներքուստ տանջում է նրան: Եւ եթէ, ըստ իմաստունի, «լաւ է քնակուել անապատում, քան թէ անզգամ, լեզուանի և բարկացկոտ կնոջ հետ» (*Առակ. 21. 19*), ապա ի՞նչ ասել չար լեզուի ու դահիճ խղճմտանքի հետ քնակուելու մասին. ահա թէ ինչու՝ ով սիրում է մեղքը, ատում է իր անձը:

Երրորդ՝ մեղքը կորստեան է մատնում շնորհները, այդ թւում և՝ Աստծոյ որդի լինելը և Արքայութիւնը ժառանգելը, ու մեղաւորին իր իսկ ատելութեան գերին է դարձնում: Նաև մեղաւորին մատնում է չար գազանների՝ մոլութիւնների ձեռքն ու ապականում է նրա հոգին, ուստի եթէ կամենում ես սիրել քեզ, մի՛ սիրիր մեղքը և մի՛ մօտեցիր, մի՛ հպուիր մեղքին, այլ հեռացի՛ր նրանից: Թիթեռն այնքա՛ն է սիրում ճրագի բոցը, որ մինչև անգամ

յարձակում է նրա վրայ և ցանկանում ճաշակել, սակայն այրում է հրից. և այդպես, սիրելով կրակի բոցը, նա ատում է իր անձը: Երբ Եւան տեսաւ, որ պտուղը գեղեցիկ ու ախորժելի է ուտելու համար, ցանկութեամբ առաջնորդուեց, մօտեցաւ ու կերաւ և կորստեան մատնուեց: Այնպես, ինչպես Եւան սիրեց մեղքն ու այդպիսով ատեց իր անձը, այդպես էլ բոլոր նրանք, ովքեր հարում են մեղքին, ատելով ատում են իրենց անձը:

Չորրորդ՝ մեղքը մարդուն Աստծոյ բարկութեան առջև է կանգնեցնում և դժոխքի յաւիտենական պատիժների բաժին է դարձնում: Այնտեղ՝ դժոխքում, մեղաւորի մեղքերը նրան կանգնեցնում են Աստծոյ առջև, և այդժամ մարդը ինչը սիրել է, դրանից էլ տանջւում է: Ուրեմն, միանգամայն ճշմարիտ է այն խօսքը, որն ասում է. «Ով սիրում է մեղքը, ատում է իր անձը»: Չէ՞ որ այն հիւանդը, որը սիրում է վնասակար կերակուր ուտել, ատում ու կորստեան է մատնում իր անձը, իսկ նա, ով ժուժկալ է վնասակար բաներ ուտելիս և ըմպելիս ու յօժարութեամբ է դառը դեղ ընդունում, սիրում և փրկում է իր անձը: «Ով կամենայ իր անձը փրկել, այն կը կորցնի» (*Մատ. 16. 25*). նա իրեն կը փրկի

օգտակարը ուտելով, չի կորցնի իր անձը՝ չարը սիրելու պատճառով: Դու ևս սիրի՛ր քո ախտը, ինչպես քո փտած ոտքը, որը, եթե չկտրես, կը մեռնես: Ճիշտ այդպես, որքան էլ սիրես քո դրամը, եթե այն չտաս հաց գնելու համար, քաղցած կը մնաս, իսկ քեզ դրամից զրկելով՝ կապրեցնես անձդ՝ կերակուր ունենալով: Այսուհետև, ուրեմն, զգուշացի՛ր մեղքից և այդպես իսկապե՛ս կը սիրես ինքդ քեզ:

4. Զգուշութեան մի գեղեցիկ օրինակ է սուրբ Յովհաննէս Մկրտչի կեանքը. յայտնի է, որ նա մանուկ հասակում, հեռանալով աշխարհից, մեկուսացաւ անապատում, ինչու՞, որպեսզի հեռու լինի մեղքի պատրանքից: Մի՞թե նա, որ մօր արգանդից իսկ սուրբ էր և ոչ մի մեղք չէր գործել, անապատում ապաշխարելու կարիք ուներ, այն էլ՝ ոչ թէ մէկ կամ երկու, այլ շուրջ երեսուն տարի: Մարիամ Մագդաղենացու ապաշխարելն, օրինակ, զարմանք չի առաջացնում, քանի որ նա մեղանչել էր, սակայն այս արդարն ինչու՞ ապաշխարեց: Որևէ մէկը թող չասի, թէ մանկակոտոր Հերովդէսի երկիւղից Յովհաննէսը մնաց անապատում, որովհետև եթէ այդպես լինէր, ապա կարող էր

այնտեղից վերադառնալ Հերովդեսի վախճանից յետոյ, ինչպես որ Յիսուսը վերադարձաւ Եգիպտոսից:

Ուրեմն ճիշտ է այն, որ, ինչպես ասացի, Յովհաննէսը անապատ հեռացաւ մանուկ հասակում և երկար ժամանակ մնաց այնտեղ, որպէսզի հեռու լինի մեղքի պատրանքից: Դուք մի՛ զարմացէք Յովհաննէսի այսպիսի զգուշութիւնից, այլ հիացէ՛ք Փրկչի այն արարքից, որ երբ կամեցաւ ծոմ պահել, գնաց անապատ և այնտեղ ծոմապահութեան դիմեց: Ձեր մտքում միշտ վա՛ռ պահէք Սրբութեան այս վարմունքը, քանի որ պահեցողութեան նպատակով անապատ գնալով՝ Փրկիչը մեզ օրինակ է տալիս, որ մենք ևս, մանաւանդ պահք պահելիս, առաւել զգուշանանք մեղքից ու մեղքի պատրանքից:

5. Մեղքից զգուշանալու երկու հնար կայ. մէկը մտքի միջոցով է, միւսը՝ գործերի: Մտքի շնորհիւ մեղքից զգուշանալու առաջին հնարը Տիրոջ չարչարանքների մասին մտածելն է, ինչպես խրատում է մեզ սրբազան առաքեալ Պօղոսը՝ ասելով. «Ապա ուրեմն՝ մտաբերեցէ՛ք Յիսուսին, որ այսպես համբերեց իր հանդէպ մեղաւորների

ունեցած հակառակութեանը» (Եբր. 12. 3): Այս խորհուրդն էր ամփոփուած, երբ անապատում իսրայելացիները, նայելով ձողի վրայի պղնձե օձին, ազատուում էին խայթող օձերի թոյնից, որի մասին է Տէրն ասում. «Եւ ինչպէս որ Մովսէսը անապատում բարձրացրեց օձը, այնպէս էլ մարդու Որդին պէտք է բարձրանայ, որպէսզի ով Նրան հաւատում է, յաւիտենական կեանքն ընդունի» (Յովհ. 4. 14-15): Այս պատճառով է սուրբ Եկեղեցին Մեծ պահքի օրերին մեր առջև դնում Տիրոջ խաչելութեան պատկերը, որպէսզի մտաբերենք ամենը:

Մեղքից զգուշանալու երկրորդ հնարը Աստծոյ ներկայութեան մասին մտածելն է՝ յիշելով, որ Նա ամենուր է, և մենք որտեղ էլ մեղանչենք, մեղանչած պիտի լինենք Նրա ամենատես աչքի առաջ, ինչպէս անառակ որդին, որը խոստովանելով ասաց. «Հայր, մեղանչեցի Երկնքի դէմ և Քո առաջ» (Դմկ. 15. 25): Իսկ մինչ այժմ ո՞վ է արդեօք, որ մեղանչել է թագաւորի առաջ և չի պատժուել: Այս մտածումը շատ զօրաւոր է, քանզի ըստ Դաւթի՝ եթէ «չկայ Աստուած նրա աչքերի առջև, մշտապէս պիղծ են նրա ճանապարհները» (Սաղմ. 9. 21): Ուրեմն ով

Աստծուն մշտապես իր աչքերի առաջ ունի, նրա վարքի ճանապարհը մաքուր կը լինի:

Երրորդ հնարը մարդու վախճանի մասին մտածելն է, որ կարող է լինել մահը, դատաստանը, դժոխքը և Արքայութիւնը. այս բոլորը եթէ մարդ միշտ իր մտքում ունենայ, ազատ կը լինի մեղքից: «Յիշի՛ր քո վախճանը, և յաւիտեան չես մեղանչի» (Միքայ 7. 40):

Իսկ ահա գործերի միջոցով առաջին հնարը կատարեալ հնազանդութիւնն է Աստծուն և, հետևաբար, աստուածայիններին, որոնք հոգևոր և մարմնաւոր ծնողներ են, նաև՝ բարի դաստիարակներ, քանի որ գրուած է. «Խոնարհ մարդը խօսում է զգուշութեամբ» (Առակ. 21. 28): Երկրորդ հնարը հանապազօրեայ աղօթքն է, ինչպէս ասում է Տէրը. «Այդ տեսակը ուրիշ բանով չի ելնի, եթէ ոչ ծոմապահութեամբ ու աղօթքով (Մարկ. 9. 28): Երրորդ հնարը Սուրբ Գրքի ընթերցանութիւնն է կամ յօժարութեամբ լսելը, քանի որ երբ աղօթում ենք, մե՛նք ենք Աստծոյ հետ խօսում, իսկ երբ ընթերցում ենք, Աստուած է մեզ հետ խօսում: Իսկ ինչպե՛ս կարող է սատանան մօտենալ մեզ, եթէ մենք մտերիմ լինենք Աստծոյ

հետ: Չորրորդ հնարն էլ մեղքի պատրանքից փախչելն է: Եւ ահա այս հնարներո՛վ է, որ մարդը կարող է զգուշանալ մեղքից՝ ըստ սուրբ մարգարէի կարևոր խրատի. «Խուսափի՛ր չարից ու բարի՛ք գործիր»:

ԲԱՄԲԱՍԱՆՔ

*«...Եւ ապա Յիսուս բռնեց նրա լեզուից»:
(Մարկ. 7. 33)*

1. Չենք սխալուի, եթե Տէր Յիսուսին, ում տարբեր անուններով են կոչում, նաև բժիշկ անուանենք: Մեծագոյն աստուածաբան սուրբ Յովհաննէսն է Նրան այդպէս անուանում՝ ասելով. «Բժիշկ, որ ձրի ես բժշկում»: Դիւրութեամբ էր բժշկում Յիսուս, քանի որ բորոտին սրբում էր՝ «Կամենում եմ, սրբուի՛ր» ասելով, անդամալոյծին ստիպում էր քայլել՝ «Վե՛ր կաց, վերցրո՛ւ մահիճդ և գնա՛ քո տուն» ասելով, դներին հալածում էր՝ միայն հրաման տալով, մահացածին յարութիւն էր տալիս ձայնով միայն:

Այս ամենը զարմանալի չէ, որովհետև հենց իսօսքն ասուեց, եղան երկինքն ու երկիրը,

երկնաւորներն ու երկրաւորները: Չարմանալին այն է, որ ինչպէս սուրբ Աւետարանն է պատմում, երբ Յիսուսի առաջ բերեցին խուլ ու յամր մէկին, որպէսզի բժշկի, Յիսուս «Բռնեց նրա լեզուից, դէպի երկինք նայեց, հոգոց հանեց և ասաց՝ «Եփփաթա», որ նշանակում է՝ «բացուի՛ր»: Եւ ապա բացուեց յամրի լեզուն:

Այս ի՞նչ նոր ու սքանչելի օրինակ է, ի՞նչ կարիք կար բռնելու նրա լեզուից, նայել երկինք, հոգոց հանել և ապա միայն ասել՝ բացուի՛ր: Ինչու՞ Տէրը բացուելու հրաման տուեց ոչ թէ միանգամից, այլ այդքան գործողութիւններից յետոյ միայն: Յիսուս դա արեց ոչ թէ այն պատճառով, որ Իր համար դժուար էր բանալ յամր մէկի լեզուն, այլ քանի որ լեզուն բոլոր անդամներից աւելի վտանգաւոր է, այդ պատճառով է հոգոց հանելով և տարբեր գործողութիւններով լեզուն բացում, որպէսզի զանազան չարախօսութիւնները վերացնի: Դրա համար է նաև, որ Տէրը դեռ արարչագործութեան ժամանակ հոգաց և երկու «դուռ» տուեց լեզուին՝ ատամնաշարն ու շրթունքները՝ այդպիսով ուսուցանելով, որ մեծագոյն զգուշութիւն պէտք է ունենալ լեզուի

նկատմամբ: Ահա թե ինչու այս դրուագում յամրի լեզուն բանալիս Յիսուս «բռնեց նրա լեզուից, դեպի երկինք նայեց, հոգոց հանեց և ասաց՝ եփիպթա»:

2. Արդարև, **երթե լեզուն ճշտութեամբ տնօրինենք, երկնքի բանալին է, իսկ երթե թիւր կերպով՝ բանալին է դժոխքի:** Եգիպտոսի Ամասիա անունով թագաւորը Պիանդոսին՝ իր իմաստասերներից մէկին, պատուի արժանացրեց՝ խնդրելով իր համար պատրաստել մի այնպիսի կերակուր, որը միաժամանակ և՛ լաւ բան լինէր, և՛ վատ: Իմաստունը նրան լեզու մատուցեց, քանի որ լեզուն լաւ բան է, երբ բարին ես խօսում, և վատ բան է, երբ խօսում ես չարը: Այս մասին նաև Սողոմոնն է ասում. «Մահն ու կեանքը լեզուի իշխանութեան տակ են» (*Առակ. 18. 21*): Իսկ լեզուն ոչ թէ իր բնութեամբ է շարժւում, այլ՝ ըստ մեր կամքի, քանի որ մեզնից է կախուած՝ մենք այն ամբողջովին մեղքի՞ գործիք կը դարձնենք, թե՛ արդարութեան:

Եւ արդ, լսե՛ք, թե ինչպէս են ոմանք լեզուն իբրև մեղքի գործիք ծառայեցնում, իսկ ոմանք՝ իբրև արդարութեան գործիք: Առաջինի մասին Դաւիթն ասում է. «Նրանց լեզուներն ասես սուր սուներ են»

(Մատթ. 56. 5): Իսկ երկրորդի մասին ասում է. «Լեզուս նման է արագ գրող դպրի գրչի» (Մատթ. 44. 2): Տեսե՛ք, «սուսեր» լեզուով սպանութիւն գործեցին, իսկ դպիրը աստուածային գրքերի օրէնքները գրի առաւ, առաջինների լեզուներն իբրև սուսեր եղան, իսկ սրանը՝ իբրև գրիչ, այսինքն՝ ո՛չ ըստ լեզուի բնութեան, այլ ըստ այն տնօրինողների ընտրութեան, քանզի այլ բան է լեզուի բնութիւնը, մէկ այլ բան՝ նրա գործը:

Արդ, սուր է բամբաստողի լեզուն, այն վիրաւորում է բոլոր նրանց, որոնց մասին խօսում է, միևնոյն ժամանակ անկարող է այդ վերքերը բժշկել: Բամբաստողի լեզուն կարող է անգամ իր աղանի եղբօրը բամբասել, թե նա օձ է, բայց չի կարող օձ կարծեցեալին իբրև աղանի ներկայացնել, քանի որ լեզուն ունակ է պարկեշտին վատահամբաւ դարձնել, մինչդեռ անկարող է վատ համբաւը հեռացնել: Լեզուն կարող է ջերմեռանդի մասին ասել, թե նա կեղծաւոր է, սակայն չի կարող կեղծաւոր կարծեցեալին ներկայացնել իբրև Աստծուց երկիւղ ունեցողի:

3. Բամբաստողի լեզուն շատ նման է օձի լեզուին. ըստ բնագէտների՝ օձի լեզուն փափուկ է,

երկսայրի, երկար ու գարշահոտ: Այդպիսին է նաև բամբաստողի լեզուն. փափուկ է, քանի որ մեղմութեամբ է խօսում, երկսայրի է, քանի որ կրկնակի վերքեր է առաջացնում՝ նախ՝ բամբաստողի հոգին է մահացու վիրաւորում չար մեղքերով, և յետոյ՝ լսողի միտքն է թունաւորում: Երկար է բամբաստողի լեզուն, քանի որ հասնում է մինչև իսկ հեռուներում գտնուող մարդկանց՝ թե՛ ողջերին, և թե՛ անգամ մեռածներին: Ի վերջոյ, գարշահոտ է բամբաստողի լեզուն, քանի որ ուրիշ ոչինչ չի ախորժում խօսել, այլ միայն՝ գարշութիւն: Որքան գարշելի ու զազիր են այն որդերը, որոնք ապրում են վերքերի տակ, նոյնքան գարշելի ու նողկալի է լեզուն բամբաստողների, որոնք այն մշտապէս ծառայեցնում են ուրիշների թերութիւնները յիշատակելու համար, իսկ մարդկանց թերութիւնները հենց հոգևոր վերքեր են:

Աղտեղութիւնը հարկ է ծածկել և ոչ թէ յայտնի դարձնել: Որևէ մէկը չի կարող հպուել աղտեղութեանը՝ առանց ինքն իրեն աղտոտելու: Իսկ աղտոտուածը շարժում և գարշահոտութիւն է տարածում: Ի՞նչ օգուտ կարող է լինել հին վերքերը

նորոգելուց, ինչպես անում են բամբասող լեզուները՝ խորը խոցելով եղբայրներին: Ուրեմն ինչպես օձի ու բամբասողի լեզուներն են նման, նոյնպես նման են նրանց պատիժները: Օձի մասին գրուած է. «Անիծեալ լինես երկրի բոլոր անասունների ու գազանների մէջ» (*Ծննդ. 3. 14*): Իսկ բամբասողի մասին գրուած է. «Ինչպես 10 մարդու մարմնի մէջ մխրճուած նետն է, այնպես էլ խօսքն է անմիտ մարդու սրտում» (*Սիր. 18.10*):

4. Թէև բոլոր մեղքերի համար վրէժխնդիր եղողը Աստուած է, բայց բամբասանքի մասին աւելին է ասում Սողոմոնը. «Նախանձախնդիր ականջը լսում է ամէն բան» (*Իմաստ. 1. 10*): **Բամբասողը կարծում է, թէ իր խօսքերը անյայտ պիտի մնան, բայց Աստուած լսում է ամէն բան**, քանի որ Տէրը «նախանձախնդիր ականջ» ունի: Եւ Նա ոչ միայն լսում ու իմանում է բամբասողների մտքերը, այլև տեսնում է նրանց գործերը: Այս մասին է գրուածը. «Ահա՛ նա կանգնած է մեր պատի հետևում» (*Երգ. 2. 9*): Յայտնի է, որ Նա ունկնդիր է մեր խօսքերին, նաև, «ձգուելով դէպի պատուհանները, նայում է ճաղերից ներս», որպէսզի նաև տեսնի մեր գործերը, ուրեմն ամէն ինչում զգոյշ պիտի լինենք,

ինչպես չարագործութեան, նոյնպես և չարախօսութեան մէջ:

Աստուած մարդուն լեզու է տուել ո՛չ թէ իր եղբօր մասին բամբասելու, այլ նրան ուսուցանելու համար. ուստի եթէ եղբայրդ սխալուեց, խրատի՛ր նրան, ապա թէ ոչ՝ լու՛ռ մնայ: Երկինքն ու երկիրը և նրանցում եղած ամեն բան քեզ խօսելու քի՜չ նիւթ են տալիս, չե՛ս բաւարարում, որ այդ ամենը թողած, այնպիսի բաների մասին ես խօսում, որ պատուաբեր չէ քեզ: Հանցաւորի համար Դատաւոր կայ, որը Աստծոյ Միածին Որդին է, և քանի որ Նա է դատաւորը թե՛ ողջերի, և թե՛ մեռեալների, դու մի՛ փորձիր յանձն առնել Միածնի այդ պատիւը: Իսկ եթէ այնքան ժուժկալութիւն չունես քո մէջ և կամենում ես խօսել, քո յանցանքների մասին խօսիր Աստծոյ առաջ, և այդժամ ոչ թէ յանցանք, այլ յաղթութիւն կը համարուի քո այդ «բամբասելը»:

5. Եւ յիշելով այն խօսքը՝ թէ «Քրիստոս բռնեց յամրի լեզուից», դուք նո՛յնպես բռնեք ձեր լեզուն՝ երբևէ ձեր եղբօր մասին չբամբասելու համար: Օրինակ վերցրեք Փրկչից, որ Իրեն լքած աշակերտներին եղբայր անուանեց. «Գնացե՛ք

ասացէք Իմ եղբայրներին, որ գնան Գալիլիա և այնտեղ Ինձ տեսնեն» (Մատթ. 28. 10): Այսպէս և դուք, եթէ անգամ ձեր դէմ մեղանշած լինի ձեր եղբայրը, մի՛ վատաբանէք նրան, յիշէ՛ք, որ դուք ևս շատ թերութիւններ ունէք Աստծոյ առաջ, բայց Նա ներում է ձեզ և համբերում, ուրեմն դուք ևս ներէք ձեր եղբօրը: Իմացէ՛ք, որտեղ բամբասանք է եղել, այնտեղ բազում չարիքներ են ծնունդ առել, տներ կործանուել, բարեկամութիւններ քանդուել, և որ ամենից սարսափելին է՝ բամբասանքը բարկացնում է Աստծուն ու մոլորեցնում մարդկանց: Ինչպէ՛ս պիտի բամբասողները վճարեն այսքա՛ն պատճառած վնասների դիմաց: «Մի՛ դատէք, որ չդատուէք» (Մատթ 7. 1): Բայց եթէ քեզ համար սովորութիւն է դարձել դատելը, նախ քո ա՛նձը դատիր, և այդ դէպքում չի լինի մէկը, որ կը մեղադրի քեզ: Եթէ տեսնես ճանապարհից շեղուած մէկին, իսկոյն մտաբերիր քո յանցանքները, և այդժամ ինքդ քեզ ազատած կը լինես բամբասանքի մեծ մեղքից: Ոչ միայն խօսելը, այլև ուրիշների թերութիւնների մասին լսելն անգամ չար ախտ է և արժանի է կշտամբանքի: Բամբասողը սատանային է կրում իր լեզուի վրայ,

իսկ ունկնդրողը՝ իր ականջի մեջ: Եթե չար լեզուն
բամբասում է, դու տե՛ր եղի՛ր քո ականջներին և մի՛
լսիր բամբասանքի այդ խօսքերը, այլ, ինչպես
իմաստունն է ասում. «Խցի՛ր ականջներդ փշերով,
չարախօս լեզուին ականջ մի՛ դիր»:

ԱԳԱՀՈՒԹԻՒՆ

*«Ապա ժողովրդին ասաց. «Տեսէ՛ք, որ զգոյշ լինէք
ամէն տեսակ ագահութիւնից, որովհետեւ մարդու
կեանքը իր կուտակած հարստութեան մէջ չէ»:
(Ղուկ. 12.15)*

1. Ինչպէս թռչունները երկնքում և ձկները ջրում են կարողանում պոչի միջոցով ուղղորդել իրենց ընթացքը, այդպէս էլ մարդիկ կարող են երկրի վրայ, մահուան մասին խորհելով, բարի վարքով ընթանալ: Քրիստոնէական վարդապետութիւնն ուսուցանում է, որ չորս բան է մարդուն ուղղութիւն տալիս՝ անխուսափելի մահը, անհեղ դատաստանը, անհաւոր դժոխքը և անճառելի Արքայութիւնը: Այս չորսն էլ նախազգուշացնում են մարդուն մեղքերից հեռու մնալու մասին: Բայց առաւելաբար զգուշացնում է մահուան մասին մտածումը, քանի որ մահը միւս երեքից ամենամօտն է մարդուն և

ամենքի դռանն էլ մօտենում ու համարձակ ներս է մտնում՝ ինչպես աղքատ խրճիթներին, այնպես էլ թագաւորների պալատներին: Այդ պատճառով մահուանը «անխուսափելի» բնորոշումը տուեցինք: Այս առնչութեամբ մեր երկնաւոր վարդապետ Յիսուս Քրիստոսը, իր ունկնդիրներին յորդորելով զգուշանալ ազահութիւնից, միաժամանակ յիշեցնում է մարդու կեանքի կարճատև լինելու մասին: «Տեսէք,- ասում է,- և զգոյշ եղէք ամեն տեսակ ազահութիւնից, որովհետև մարդու կեանքը իր կուտակած հարստութեան մէջ չէ» (*Ղուկ. 12.15*): Իր այս խօսքով Յիսուսը կամենում է ասել, որ մարդու կեանքը կախում չունի նրա ունեցուածքի մեծութիւնից, և այնպես չէ, որ ով շատ հարստութիւն ունի, ուրեմն երկար պիտի ապրի՝ այն վայելելու համար, այլ ինչպես աշխարհն է անցաւոր, նոյնպես էլ մարդու կեանքն է կարճատև:

2. Մեր Տէրը յորդորում է մեզ զգուշանալ ազահութիւնից, ինչպես խելագարութիւնից, քանի որ ազահութիւնը հենց խելագարութիւն է, իսկ ազահն էլ նման է այն յիմար մարդուն, որն իր տունը աւազի վրայ է շինում, և այդ տան

կործանումը շատ մեծ է լինում (*Մատթ. 7.26*): Ով այս աշխարհում գանձ է կուտակում կամ այն թաքցնում է իր ծոցում, երբևէ չի կարող զերծ լինել հոգսերից: Իսկ նրանք, որոնք երկնքում են գանձեր կուտակում, ապահով կեանքով են ապրում: Հողագործների մեջ առաել հարուստ կարող է լինել նա, ով իր սերմերը շտեմարանում կուտակելու փոխարեն ցանում է հանդերում: **Չկայ առաել բերրի մի անդաստան, քան աղքատների ձեռքերը. այնտեղ ցանուած սերմերը երբեք անպտղաբեր չեն լինում**, այլ առատ բերք են տալիս և՛ այս, և՛ հանդերձեալ կեանքում: Իսկ ազահները սերմացու ցորենը բերրի հողի փոխարեն անմտօրեն տանում և փոսի մեջ են լցնում, որտեղ այն, անշուշտ, դատապարտուած է անպտղութեան:

Եթե կամենում էք տեսնել, թե ինչ տեսք ունի նման յիմար ազահ մարդը, ապա նայե՛ք գեհենի գուրի մեջ և կը տեսնեք անգույթ հարուստին, որն իր երկրային կեանքի ընթացքում ծիրանի և այլ թանկարժեք հագուստներ ուներ, ամեն օր ճոխ ուրախութիւն էր անում, բայց իր դռան առջև ընկած աղքատ Ղազարոսին ողորմութիւն չէր

տալիս (*Ղուկ. 16.19*): Իսկ այժմ ու՛ր են չքացել նրա թանկարժեք հագուստները, ու՛ր է ամենօրեայ ուրախութիւնը. աղքատութեան մէջ է այդ յիմարը երկնքում: Եւ ի՞նչ ասեմ աղքատութեան մասին այս աշխարհում. որքան էլ մարդ աղքատ լինի, կարող է անվճար ջուր խմել ինչքան ցանկանայ, այնինչ այն հարուստը մի կաթիլ ջրի կարօտից տանջւում էր դժոխքում, և Աբրահամը դա՛ էլ չտուեց նրան:

Ազահի այդպիսի խաւար պատկեր կարելի է նշմարել դժոխքի մթին խորքերում: Նայե՛ք հիմա մէկ այլ պատկերի՝ այն արձանին, որը կանգնեցրեց Նաբուգոդոնոսոր արքան Բաբելոնի Դուրա դաշտում: Այդ արձանը ոսկեղէն էր՝ իբրեւ աշխարհի հարստութեան խորհրդանիշ, սակայն հողի վրայ էր կանգնեցուած՝ իբրեւ մարդկային կեանքի կարճութեան խորհրդանիշ:

Այնքան կարճատև է մարդու այս կեանքը, որ Փիլիմոն իմաստասէրն այդ մասին ասում է. «Ոչ այլ ինչ է մարդկային այս կեանքը, եթէ ոչ՝ ծնուել և մեռնել միայն»: Ուրեմն եթէ մարդու կեանքն այդքան կարճատև է, ապա որքա՛ն աւելի կարճատև պիտի լինի նրա ձեռքով ստեղծածի

կեանքը: Յիրաւի, ազնիւ մետաղ է ոսկին, սակայն այն աւելի թանկ չէ, քան մարդու կեանքը:

3. Ուրեմն՝ ինչու՞ ենք միայն այս անցաւոր կեանքի մասին հոգ տանում, եթէ չենք կարող վստահ լինել, որ վաղն իսկ չենք մեռնելու, մինչդեռ անանցի հանդէպ անհոգ ենք մնում: Երբ տուն ենք կառուցում, հաստատուն հիմք ենք դնում և հոգում շինուածքի ամրութեան մասին, որպէսզի այն երկար ժամանակ կանգուն մնայ, քանի որ մտածում ենք՝ գուցէ երկար ապրենք ու բնակուենք այդտեղ: Եւ նոյն կերպ, երբ մեզ համար երկնքում դրախտ ենք ստեղծում, կրկին մտածում ենք, որ այն հաստատուն հիմք ունենայ, որպէսզի այնտե՛ղ ապրենք ու վայելենք: Ինչպիսի՞ յիմարութիւն՝ չարչարուել ու տառապել այս աշխարհի անցաւոր բարիքների համար, իսկ ճշմարի՛տ բարիքների հանդէպ անհոգ գտնուել: Վաճառականներն իրենց շահի համար զանազան երկրներ են գնում, մեծամեծ ջանքեր են թափում ու անգամ մեռնում են, իսկ մենք՝ հոգևոր վաճառականներս, ծոյլ ենք մնում. չէ՞ որ քրիստոնեան ևս վաճառական է, որ գեղեցիկ մարգարիտներ է փնտրում (*հմնտ. Մատթ. 13. 45*): Հակառակը՝ տգեղն ու անարգը փնտրելուն

ենք հետամուտ լինում: «Նա, ով Արքայութիւն է փափագում,- ասում է Յովհան Ոսկեբերանը,- արհամարհում է ազահութիւնն ու ծառան է դառնում Քրիստոսի»:

Ծառայ մի՛ դարձիր մամոնային. այն որևէ մէկին այնքան չի պատում, որքան իրեն արհամարհողներին, և որևէ մէկին այնպես ամօթահար չի անում, որքան իրեն ցանկացողներին: Եւ ոչ միայն ամօթահար է անում, անգամ սպանու՛մ է: Ի՞նչն էր, որ Յուդային խեղդամահ արեց ու գեհենի բաժին դարձրեց, ո՛չ արդեօք արծաթը: Արծաթսիրութեան մոլուցքն էր պատճառը, որ Յուդան իր մեծ Վարդապետին երեսուն արծաթի դիմաց մատնեց հրեաներին: Տեսէ՛ք, ուրեմն, արծաթի տուած վնասը ոչ թէ նիւթն է, այլ նրա հանդէպ մոլի ցանկութիւնը:

4. Երեք գլխաւոր մոլութիւններ կան, որոնք մարդուն մեծ սխալների են դրդում: Առաջինը մարմնի ցանկութիւնն է, երկրորդը՝ ցանկութիւնը փառքի, երրորդը՝ ունեցուածքի ցանկութիւնը: Կամ, այսպէս ասեմ, հեշտասիրութիւնը, փառասիրութիւնը և փողասիրութիւնը, որը հենց ազահութիւնն է: Այս երեքի մասին խօսելով՝

Յովհաննես Աւետարանիչն ասում է. «Այն ամենը, ինչ աշխարհի մէջ կայ, մարմնի ցանկութիւն է, աչքերի ցանկութիւն և այս կեանքի ամբարտաւանութիւն» (*Ա Յովհ. 2. 16*): Այս երեք սխալներն հետևեալ կերպ են գործում. հեշտասերը մեծ ոգևորութեամբ ցանկանում է տենչալիին, սակայն զգուանքով հետ է դառնում: Փառասերը յօժար կամքով հասնում է փառքին, սակայն յետոյ սիրտը տրտմութեամբ է լցւում, իսկ ազահն էլ հոգու տանջանքով երբ հասնում է մամոնային, այլևս հետ չի դառնում իր ուղուց, այլ միաւորւում է նրա հետ ու իր յոյսը հիմնաւորապէս մամոնայի վրայ է դնում: Եւ եթէ անգամ իմանում է, որ այն, ինչին ինքը ձգտում էր, անհրաւութիւն է, ամենևին չի մտահոգւում այդ մասին, այլ ամբողջովին դէպի այդ մոլութիւնն է ընթանում ու մոլորւում:

Դրա պատճառն այն է, որ մամոնան մարդու սրտի մէջ չէ, ասես դրսում մի արկղի մէջ է, և քանի որ ազահ մարդը չի յագենում այդ դրսի «բարիքից», ուստի տենչում է իր սիրտը մօտեցնել իրենից դուրս գտնուող մամոնային ու, ասես իր սիրտը հանում դնում է մամոնայի արկղի մէջ, որպէսզի

լիացնի ու յագեցնի սիրտը: Սա կռապաշտութեան մի նոր օրինակ է, ինչպէս ասում է սրբազան առաքեալը (*Կորնթ. 3. 5*): Ասացի նոր օրինակ, որովհետև կռապաշտները արջառ են զոհում կուռքերին, իսկ ագահները Քրիստոսի արեամբ գնուած իրենց հոգիներն են իբրև զոհ մատուցում, ուստի և դառնում են սատանայի բաժին ու ոչ թէ Քրիստոսի, որի մասին Բարսեղ վարդապետը ասում է. «Անհնար է, որ ընչասէր մարդը տեսնի Քրիստոսի երեսը»:

Շատերը հարստութիւն ունեին, ինչպէս, օրինակ, Աբրահամը, Իսահակը, Յակոբը և միւսները, սակայն նրանք հոգով աղքատ էին, այսինքն՝ խոնարհ ու ողորմած: Եթէ դու մօտդ թոյն պահես, դրանից ինքդ չես վնասուի, ինչպէս որ դեղավաճառները, որոնք թոյն ունեն՝ չեն վնասւում, բայց եթէ այն խմես, արդեն կը վնասուես: Այսպէս էլ հարստութիւն ունենալու դէպքում չես վնասուի, բայց եթէ երազես դրա մասին ու յոյսդ դրա վրայ դնես, շատ մեծ վնասներ կը կրես: Այսպիսի՞ն է գանձեր դիզող մարդու վախճանը, նրա վերջը դժոխքի խորքն է: Իսկ նա,

ով կամենում է Աստծո՛վ հարստանալ, և՛ այստեղ, և՛ հանդերձեալ կեանքում երանելի կը լինի:

5. Ուրեմն՝ միայն Աստծոյ վրա՛յ դնենք մեր յոյսը: Սարգիս Շնորհալին ասում է. «Աստուած մեծը տուեց մեզ և փոքրը չպիտի՛ տայ»: Նա մեզ հոգի ու մարմին տուեց, որը մեծ բան է, և մի՛թէ այն, ինչ պետք է հոգուն ու մարմնին, որը փոքր բան է, չի տայ: Մի՛թէ Աստուած մեզ ստեղծել է այն բանի համար, որպէսզի լքի մեզ: Լսե՛ք, թէ ինչ է ասում մարգարէն. «Ինչպէս որ հայրը գթում է իր որդիներին, այնպէս Տէրը պիտի գթայ իրենից երկիւղ կրողներին» (*Սաղմ. 102. 13*): Նաև սրբազան առաքեալ Պետրոսն է ասում. «Ձեր բոլոր հոգսերը նրա վրայ դրե՛ք, որովհետև Նա է, որ հոգում է ձեր մասին» (*Ա. Պետր. 5. 7*):

Այս ասուածները երկու օրինակով է հաստատւում. մէկը ազգաների օրինակն է, որոնց Աստուած կերակրում է, և միւսը վայրի շուշանի օրինակը, որին Աստուած գեղեցիկ զգեստաւորում է: Ուրեմն՝ որքա՛ն առաւել մարդկա՛նց կը կերակրի ու կը զգեստաւորի Նա:

Քրիստոսը, համեմատելով շուշանը Սողոմոնի հետ, ասում է. «Ասում եմ ձեզ, որ Սողոմոնն իր ողջ

փառքի մեջ այնպես չհագնուեց, ինչպես այդ շուշաններից մեկը», այսինքն ասում է, որ վայրի շուշանին որևէ մեկը չի մշակում, մինչդեռ Սողոմոնի շուրջ բիւրաւոր սպասաւորներն էին շրջում, շուշանի մասին որևէ մեկը հոգ չի տանում, մինչդեռ Սողոմոնի կարիքներին էին ծառայում երկրի հանքերը, ծովի մարգարիտները և ծառաները, այդուհանդերձ շուշանի «զարդերը» շատ աւելի գեղեցիկ են, քան Սողոմոնինը, որովհետև Աստուած է խնամում շուշանին: Հեթանոսներն իրե՛նք են հոգում իրենց պետքերը, իսկ ճշմարիտ Աստծուն պաշտողները չպիտի՝ հոգան այդ ամենի մասին, քանի որ ճշմարիտ Աստուած գիտի այն ամենը, ինչ նրանց անհրաժեշտ է: Ինչպես երեխաները, որ անկարող են հոգալ իրենց կարիքները և անգամ չգիտեն, թէ իրենց ինչ է անհրաժեշտ, սակայն ծնողները գիտեն այդ ամենն ու հոգում են իրենց զաւակների մասին, ուրեմն որքա՛ն առաւել երկնաւոր Հայրը, որ ամենքի Արարիչն է, գիտէ և հոգում է Իր զաւակների մասին: «Բայց դուք,- ասում է,- խնդրե՛ք նախ Աստծոյ արքայութիւնն ու Նրա արդարութիւնը, և մնացեալ ամեն բան ձեզ կը

տրուի աւելիով»: Այսինքն՝ դուք միայն Աստծոյ արքայութիւնը խնդրէք և Նրա արդարութիւնը գործէք, իսկ մարմնաւոր բարիքները ձեր ցանկացածից աւելի կը տրուեն ձեզ:

ՊԷՏՔ ՉԷ ԱՐՀԱՄԱՐՀԵԼ ՈՐԵՒԷ ՄԷԿԻՆ

«Զգո՛յ՛շ եղէք, մի՛ արհամարհէք»:
(Մատթ. 18. 10)

1. Յիսուսի աշակերտները, իրենց անկատարութեան պատճառով, իրենց վիճակին անվայել մի բանավէճ սկսեցին, թէ «ո՞վ է նրանցից մեծը»: Մօտեցան Յիսուսին և ասացին. «Մեզնից ո՞վ է մեծ երկնքի արքայութեան մէջ»: Մանկական մի հարցում էր սա, քանի որ տակաւին մանուկ էին մտքով, այդ պատճառով էլ Յիսուս մտքով ոչ հասուն Իր աշակերտներին նիւթական օրինակով ուսուցանեց. Իր մօտ կանչեց մի փոքրիկ երեխայի, որն ըստ վարդապետների Իգնատիոս Աստուածազգեացն էր, կանգնեցրեց աշակերտների առջև և ասաց. «Ճշմարիտ եմ ասում ձեզ, եթէ չդառնաք ու չլինէք մանուկների

պէս, Երկնքի արքայութիւնը չէք մտնի» (*Մտթ. 18:3*)՝ կամենալով ասել, թէ. «Դուք պարտաւոր էք հեռու մնալ գահասիրութիւնից և պետք է ջանաք յաղթել ձեր բոլոր անօրէն ցանկութիւնները, հակառակ դէպքում ոչ միայն չէք կարող մեծ լինել Երկնքի արքայութեան մէջ, այլև անգամ այնտեղ մտնել չէք կարող»:

«Իսկ մեծ կը լինի նա,- ասում է Յիսուսը,- ով իր անձը ամենքից փոքրը կը համարի, քանի որ Աստծոյ խոստումներին արժանի է նա, ով յօժարակամ և պատրաստ է ծառայել ամենքին: Ով իր անձը խոնարհեցնում է, ինչպէս այս մանուկը, որը ամենքից փոքր է և որևէ մեծութեան չի ձգտում, որը որևէ մէկից փառք չի սպասում, նա՛ մեծ կը լինի Երկնքի արքայութեան մէջ և առաւել բարձր կը լինի նրանից, ով այս կամ այն փառասիրութիւնից մղուած՝ կամենում է բարձրացնել իր անձը»:

Այս նիւթի մասին երկար խօսելուց յետոյ Յիսուս յաւելում է՝ ասելով. «Չգո՛յշ եղէք, որ այս փոքրիկներից որևէ մէկին չարհամարիէք» (*Մտթ. 18:10*):

2. Մարդը երկու ձևով կարող է արհամարհել ուրիշներին. առաջինը՝ խօսքով, ինչպէս հրեաները

արհամարհեցին Քրիստոսին՝ անուանելով Նրան հիւսնի որդի, սամարացի կամ դիւահար: Երկրորդ՝ վարմունքով, այսինքն՝ Նրա դէմքին անգամ չնայելով կամ նշանացի ցոյց տալով, որ չեն ընդունում Նրան, և կամ ծաղրելով Նրան: Տէրն իր աշակերտներին զգուշացնում է հեռու մնալ այս ամենից. որքան էլ դիմացինը չար մարդու համբաւ ունենայ, երեխայ լինի, մտքով ոչ հասուն կամ էլ աշխարհի աչքին արհամարհելի մէկը լինի, ինչպէս օրինակ՝ ունեցուածքով աղքատները, հոգով աղքատները, այսինքն՝ խոնարհները: Ուստի և Յիսուս փոքրիկ մանկանն է մէջտեղ բերում և նրան իբրև օրինակ ցոյց տալիս, որ թէև տակաւին մտքով հասուն չէ, բայց չի կարելի արհամարհել նրան:

«Դաստիարակի կարիք ունեն, և դու՛, տէր Աստուած, իբրև դաստիարակ, սովորեցրու՛ ինձ, որ Քո արդարութիւնը չմոռանամ»: Նա, ով խնդրեց, ստացաւ Աստծուց, քանի որ արդարև իր անձն ընծայեց Աստծուն և ինքն իրեն մանուկ ու արհամարհանքի արժանի մէկը համարեց այնժամ, երբ իրականում կատարելութեան ու թագաւորութեան վիճակում էր: Իսկ ահա ինչպէս Աստուած չի արհամարհում որևէ մէկին, նոյնպէս և

մենք՝ աստուածասերներս, ո՛չ միայն փոքրերից որևէ մեկին չպետք է արհամարհենք, այլև պետք է սիրենք ու խնամենք նրանց:

Ոչ ոք, միայն արտաքին տեսքին նայելով, թող չդատի որևէ մեկին: Չէ՞ որ մեր Տերը ևս, մանուկ լինելով, մեզ համար արհամարիունց հրեաների կողմից, և ո՛չ միայն աւագակների շարքին դասուեց, այլև աւագակներից աւելի մեծ արհամարհանքի արժանացաւ, երբ ժողովուրդը պահանջեց ազատութիւն տալ Բարաբբային, և ոչ թէ Նրան:

Ուրիշներին դատելը անձի չարութեան մեծագոյն արտայայտութիւնն է: Օձն է, որ թոյն է քաղում այն ծաղիկներից, որոնցից մեղուն մեղր է հաւաքում: Նոյն կերպ նաև ապականուած ստամոքսն ամէն ինչ մաղձի է վերածում, ուստի դու ջանայ մաքրել քո ստամոքսը: Եթէ մի կողմ դնես քո անձի նկատմամբ ունեցած սերդ և ուրիշների աչքերով նայես քեզ, բազմաթիւ պատճառներ կը գտնես քեզ ամենից յետին շարքում դասելու համար: Քանի անգամ որ տեսնես ուրիշների սխալները, այդքան անգամ ուշադրութիւն դարձրու քո՝ անձին ու որպէս զգաշուցում

ընդունիր դա և պատկերացնելով, որ դու ևս այդ նոյն տկարութեան մէջ ես, սովորի՛ր զգուշանալ այդ ախտից, որպէսզի երբ իրապէս սայթաքես, ծաղրի չարժանանաս:

3. Դաւիթ մարգարէն Հօր հետ խօսելով՝ ասում է. «Ում որ դու հարուածեցիր, նրանք հալածեցին և իմ վերքերին ցաւեր աւելացրին» (*Մատթ. 68. 27*): Հօր հաճութեամբ էր Քրիստոսի հալածուելը, այսինքն՝ չարչարուելը մարդկային ցեղի փրկութեան համար, սակայն խստասիրտ հրեաները, որ չարակամութեամբ ձեռնամուխ եղան Քրիստոսին տանջելուն, արժանի դարձան պատժի, քանի որ թէև անհրաժեշտ էր, որ այդ չարչարանքները լինէին, բայց վա՛յ նրան, ով դրանք կիրականացներ, ինչպէս Տէրն ասաց. «Մարդու Որդին աշխարհից կը գնայ ըստ սահմանուածի, բայց վա՛յ այն մարդուն, ում ձեռքով կը մատնուի» (*Ղուկ. 22. 22*):

Իսկ հրեաները այդ սահմանն էլ անցան, քանի որ ոչ միայն չարչարանքի մատնեցին Քրիստոսին, այլև խաչեցին, աւելին՝ մահուանից յետոյ համարձակուեցին խոցել Նրա կողը: Այս մասին էր խօսքը, թէ. «Եւ իմ վերքերին ցաւեր աւելացրին»: Նաև Համբարձումից յետոյ Յիսուսի վերքերին

ցաւեր աւելացրին՝ չարչարելով Նրա աշակերտներին, քանի որ այն ամէնը, ինչ հրեաներն ու հեթանոսներն արեցին Քրիստոսի աշակերտներին, հենց իրեն՝ Քրիստոսին արեցին, ինչպէս որ Տէրը ասաց Սաւուղին. «Սաւո՛ղ, Սաւո՛ղ, ինչո՛ւ ես հալածում ինձ» (*Գործ. 9. 4*): Սա ասաց նաև Չաքարիա մարգարէն. «Այսպէս է ասում ամենակալ Տէրը, որ ով մօտենում է ձեզ, նման է նրան, ով հարուածում է իր աչքի բիբին» (*Չաք. 2. 8*): Եւ ինչպէս որ վրեժ է պահանջում այնպիսի մէկից, որն ասես հարուածում է իր աչքի բիբին, այդպէս էլ Աստուած «վրեժ պիտի լուծի» փոքրերին արհամարհողներից: Եւ եթէ մէկը սովոր է արհամարհել ուրիշին ու չունի լսելու ականջ, նա ինքն իրեն է արհամարհում, և նրա անձին յանցանք պիտի վերագրուի Աստծոյ առաջ:

Եթէ մարդ ուրիշների յանցանքների մասին խօսի, ոչինչ չի շահի, այլ դեռ մի բան էլ կը դատապարտուի, իսկ եթէ իր յանցանքները պատմի Տիրոջ առաջ, արժանի կը դառնայ թողութեան: Այսպէս արեց երանելի Դաւիթը. «Ասացի, թէ կը խոստովանեմ մեղքերն իմ, և դու թողութիւն կը տաս իմ մեղքերի ամբողջ

ամբարշտութեանը» (*Մատթ. 31. 5*): Դու ևս նոյն կերպ վարուի՛ր և մեծապէս կը շահես ու օգուտ կունենաս:

4. Այս զգուշութեան մասին մեր Տէրը երեք պատճառ է բերում:

Առաջինը՝ ասում է. «Ասում եմ ձեզ, որ երկնքում նրանց հրեշտակները մշտապէս տեսնում են երեսն իմ Հօր, որ երկնքում է» (*Մտթ. 18. 10*)՝ կամենալով ասել, որ եթէ ամենավերին հոգիները, որոնք մշտապէս վայելում են Աստծոյ երանելի տեսութիւնը, միշտ խնամք են տանում ձեր կողմից փոքրիկ համարողների նկատմամբ, անփոյթ չեն նրանց յանդէպ և նրանցից որևէ մէկին չեն արհամարհում, որքա՛ն առաւել դուք իրաւունք չունէք անփոյթ լինել մանուկների նկատմամբ ու արհամարհել նրանց, որոնց հետ դուք նոյն բնութիւնն ունէք, բայց ինքներդ աւելի ցածր էք հրեշտակներից:

Երկրորդ՝ **հրեշտակները, որ կանգնած են Աստծոյ առաջ, աղօթքներն են խոնարհների,** որոնք նախքան Աստծոյ մօտ գնալը նախ իրենց աղօթքներն են ի վեր առաքում, որոնց միջոցով յանդիպում են Աստծուն, իսկ երբ արդէն իրենք ևս

վերանում են այս աշխարհից, այնժամ լցում են անսահման երջանկութեամբ: Այս մասին մարգարեն նախ ասում է. «Ես արդարութեամբ կերևամ քո առաջ», ապա շարունակում. «Կը յագենամ՝ տեսնելով փառքը քո» (*Մաղմ. 16.15*)՝ կամենալով ասել, որ «թե՛ Ես կորուսեալներին գտնելու համար Երկնքից երկիր իջայ, ո՞վ կարող է յանդգնել արհամարհել մարդկանցից որևէ մէկին»: Իսկ իր այս խօսքն էլ Նա մեկնում է այն հովուի օրինակով, որը, ունենալով հարիւր ոչխար, թողնում է իննսունինին անապատում և գնում է կորած հարիւրերորդին փնտրելու, և երբ գտնում է, առաւել շատ է ուրախանում, քան բոլոր նրանց համար, որոնք կորած չէին: Եւ եթէ մարդն այդքան պատուական է բարերար Փրկչի աչքին, ուրեմն երբեք չի կարելի արհամարհել մարդկանցից որևէ մէկին:

Փոքրերին չարհամարհելու երրորդ պատճառն այն է, ինչպէս Յիսուսն է ասում. «Իմ երկնաւոր Հօր կամքը չէ, որ այս փոքրիկներից մէկը կորչի» (*Մաթ. 18:14*), քանի որ երկնաւոր Հօր կամքն այն է, որ ամենքն էլ փրկուեն, ինչպէս Տէրն ասում է Եզեկիելի շուրթերով. «Ես ամբարշտի մահը չեմ ուզում, այլ՝

նրա հետ կանգնելն իր չար ճանապարհից» (Եզեկ. 33. 11): Եթե Աստուած ամբարշտի մահը չի կամենում, ապա առաւել ևս չի ցանկանում մահը տկարների և անգէտների, ուստի նոյն կերպ մեղանշում են բոլոր նրանք, որոնք արհամարիում են նրանց:

5. Աստուած օր սահմանեց՝ դատելու բոլոր մարդկանց, իսկ արհամարիող մարդիկ յանգոգնում են յափշտակել Աստծոյ այդ իշխանութիւնը՝ դատելով իրենց ընկերոջը: Սա հպարտութեան ախտն է: Սակայն մարդ թող չհպարտանայ իր ուժով, քանի որ առիւծը մարդուց աւելի ուժեղ է, իր գեղեցկութեամբ, քանի որ, միևնոյն է, սիրամարգից աւելի գեղեցիկ չէ, իր քաղցրաձայնութեամբ, քանի որ սոխակն աւելի քաղցրաձայն է մարդուց, իր սրատեսութեամբ և իր լաւ լսողութեամբ, քանի որ այծեամն ու արծիւն առաւել սրատես են, իսկ Էշն աւելի լաւ լսողութիւն ունի, իր հարստութեամբ և մնացեալ բաներով, քանի որ այդ ամէնը պարզապէս աւանակի բեռ է, և ոչ աւելին, իր զարդարանքներով, քանի որ դրանք ձիերի վրայ ևս կարելի է տեսնել:

Չափազանց ամօթալի է մեծամտանալ այնպիսի քաներով, որոնցով ընտանի կենդանիներն ու գազաններն աւելի «հարուստ» են մարդուց:

Քրիստոնեաները մի այսպիսի սովորութիւն ունեն. երբ զարթնում են քնից, լուանում են իրենց ձեռքերն ու երեսը, և այդպէս են աղօթքի կանգնում. սա չափազանց բարի ու վայելուչ մի սովորութիւն է, սակայն **ձեռքերն ու երեսը լուանալուց առաւել հարկ է լեզուն լուանալ**, և այն էլ ոչ թէ ջրով միայն, այլ նաև հրով և առաքինութեամբ, որպէսզի այն մաքրուի հայհոյութեան, բամբասանքի, խեղկատակութեան և արհամարհանքի ախտից: Եթէ կեղտոտ ձեռքերով որևէ մէկն ուզում է մօտենալ քեզ, դու թոյլ չես տալիս և չես էլ հանդուրժում, որ նա քեզնից ինչ-որ բան խնդրի, իսկ եթէ նա անգամ համարձակւում է, դու ոչ միայն չես լսում, այլև բարկացած մերժում ես նրան, ուրեմն ինչու՞ ես անմաքուր լեզուով Աստծոյ ոտքերն ընկնում և համարձակւում Նրանից բարիք խնդրել: Չէ՞ որ լեզուն աղօթողների ձեռքն է, որով մենք հալում ենք Աստծոյ ոտքերին և Նրանից բարիք խնդրում, սակայն այդ դէպքում ինչպե՞ս կը լսի մեզ Աստուած, և արդեօ՞ք չի դառնայ ու չի ասի.

«Եթե բազմապատկեք էլ ձեր աղօթքները, չեմ լսելու
ձեզ» (Եսայի 1. 15):

**ՄԵՂՔԸ ԱՌԱԴԵԼ ԴԺՈՒԱՐ ԳՈՐԾԵԼԻ Է,
ՔԱՆ ԱՌԱՔԻՆՈՒԹԻՒՆԸ**

*«Որովհետև Իմ լուծը քաղցր է և Իմ բեռը՝ թեթև»:
(Մատթ. 11. 30)*

1. Որքան մեծ է մեղքի վնասը, նոյնքան մեծ է առաքինության օգուտը, քանի որ մեղքը դժոխք է իջեցնում, իսկ առաքինությունը երկինք է բարձրացնում: Մեկը ճանապարհ է դեպի ցած, իսկ միւսը՝ ճանապարհ դեպի վեր: Անմիտները, չխորհելով նպատակի մասին, այս երկուսից աւելի դիրքին են համարում դեպի ցած տանող ճանապարհը, իսկ խելացիները, խորհելով նպատակի մասին, դեպի վեր տանողն են դիրքին համարում: Եւ քանի որ աշխարհում անմիտներն աւելի շատ են, քան խելացիները, այդ պատճառով էլ շատերն են մեղքի ճանապարհով գնում, և քչերն

են միայն, որ գնում են առաքինութեան
ճանապարհով: Մեզ սա՛ է ուսուցանում մեր
մարդասէր Փրկիչն՝ ասելով. «Ինչքա՛ն լայն է դուռը
և ընդարձակ՝ ճանապարհը, որ դէպի կորուստ է
տանում, և բազմաթիւ են նրանք, որ մտնում են
դրանով: Ինչքա՛ն անձուկ է դուռը և նեղ՝
ճանապարհը, որ տանում է դէպի կեանք, և
սակաւաթիւ են նրանք, որ գտնում են» (*Մատթ 7. 13-14*):

Բայց «լայն է դուռը և ընդարձակ՝ ճանապարհը»
բառերը լսելիս որևէ մէկը թո՛ղ չկարծի, թէ այդ
ճանապարհը դիրին է, կամ «անձուկ և նեղ
ճանապարհ» լսելիս թո՛ղ ոչ ոք առաքինութեան
ճանապարհը դժուարին չհամարի, քանի որ
առաքինութեան ճանապարհն անցնելն աւելի
դիրին է, քան մեղքի ճանապարհն անցնելը:
Տեսե՛ք, այդ երկուսից մեղքի դժուարութեան
մասին Դաւիթն ասում է. «Սաստիկ բեռան պէս
ծանրացան վրաս» (*Սաղմ. 37. 5*): Իսկ
առաքինութեան դիրութեան մասին ասում է մեր
Տէրը. «Իմ լուծը քաղցր է, և Իմ բեռը՝ թեթև»: Լուծ և
բեռ լսելով՝ ոչ ոք թող չվիատուի, քանի որ թէպէտ

լուծ է, բայց քաղցր է, և թեպետ բեռ է, սակայն թերևս է:

Մեր Տերը երբ մեզ յորդորեց առաքինութեան, խօսեց ոչ միայն դժուարութեան կամ միայն դիւրութեան մասին, այլ երկուսի մասին միաժամանակ. լուծ ասաց, բայց այն քաղցր կոչեց, բեռ ասաց, բայց այն թերևս անուանեց, որպէսզի ամենքը փափագեն վերցնել ու կրել այն: Իսկ եթէ դեռ տակաւին դժուար է թուում քեզ առաքինութիւնը, մտաբերի՛ր, որ մեծ մեղքն առաւել՝ դժուարին է:

2. Այն, որ դժուար է մեղք գործելը, յայտնի է այն քանից, որ մեղքն ակամայ չի գործուում, այլ բխում է չար կամքից: Հրամայուած է չսպանել, բայց նաև ի՞նչ հարկ կայ սպանելու, չէ՞ որ ոչ միայն Օրէնքից, այլև բնութիւնից է բխում չսպանելը, քանի որ ըստ բնական օրէնքի, ո՛վ կուգենայ եղբօր արեամբ ներկել իր սուրը, ոչ ոք: Աստուած մեր բնութեան մէջ սերմանել է խնամք ու սեր միմեանց նկատմամբ. մինչև անգամ գազաններն են սիրում իրենց նմաններին: Ուրեմն, տեսնու՛մ ես, որ առաքինութեան սերմը հենց մեր բնութիւնից ունենք, իսկ մեղքը բնութիւնից դուրս է:

Հրամայուած է չգողանալ, և ի՞նչ կարիք կայ գողանալու: Գուցէ ասես՝ «աղքատութիւնից դրդուած». սակայն աղքատութիւնն աւելի շատ աշխատանքի է դրդում, այլ ոչ՝ գողանալու: Ու չասես, թէ աշխատելը դժուար է, իսկ գողանալը՝ դիւրին: Ասա՛ խնդրեմ, ո՞րն է աւելի դժուար, ողջ գիշեր շրջել, վախից դողալ ու հոգին բռնի մէջ առնել՝ ինչ-որ բան գողանալու համա՛ր, թե՛ հանապազօրեայ աշխատանք կատարելով՝ վայելել ամէն բան առանց որևէ մտավախութեան: Իհարկէ, այս աւելի դիւրին է, իսկ այն՝ չափազանց դժուար: Եւ դա ակնյայտ է, քանի որ շատերն աշխատանքի այս տարբերակն են նախընտրում, ոչ թէ գողանալու:

Տեսնու՞մ ես, որ առաքինութիւնները տրուած են բնութիւնից, իսկ մեղքը բնութիւնից դուրս է, ինչպէս առողջութիւնը և ցաւերը՝ առաջինը բնութիւնից է, իսկ երկրորդը՝ ոչ: Դարձեալ հրամայուած է չերդուել, և ի՞նչ հարկ կայ երդուելու: «Քեզնից պահանջում են երդուել», - ասում ես: Ուրեմն պիտի երդուե՞ս անպայման, սակայն չե՞ որ նաև բարի կամք է պահանջում քեզնից, որը եթէ ունենայիր, խօսքերիդ հաւատարիմ կը լինէիր

բարոյական արժեքների շնորհիւ, այլ ոչ թէ երդումից դրդուած: Երդումն անհրաժեշտ է, որ հաւատան քո խօսքին, բայց տեսնում ենք, որ ովքեր չեն երդում, նրա՛նք են հաւատարիմ խօսքին, իսկ ովքեր հաճախակի երդում են, ստախօսի համբաւ ունեն, քանի որ նման մէկը վարժւում է երդում տալուն և այլոց մօտ լաւ կարծիք չի ստեղծում, իսկ ով չի երդում, նրան ամէն ոք հաւատում է: Տեսնու՛մ ես, որ բնաւ էլ չկայ երդման անհրաժեշտութիւնը:

Նաև հրամայուած է թշնամանալ որևէ մէկի հետ: «Այո,- ասում ես,- սակայն ցասումը յորդում ու բորբոքում է և թոյլ չի տալիս հոգուս հանդարտուել»: Ոչ թէ ցասումից է թշնամանքդ, ո՛վ մարդ, այլ կարճամտութիւնից, այլապէս ամէն ոք, երբ բարկանար, կը դառնար թշնամի: Սակայն ինչպե՛ս է, որ առաքինի մարդիկ, թեպէտ բարկանում են, բայց չեն թշնամանում: Կարելի է բարկանալ, սակայն չի կարելի թշնամանալ: Այս է ասում մարգարէն. «Եթէ բարկանաք, մի՛ մեղանչեք» (*Մատթ. 4. 5*): Աստուած մարդուն իբրև տէր ստեղծեց և ոչ թէ գերի. «Մարդ ստեղծենք,- ասաց,- ըստ մեր պատկերի և նմանութեան»: Իսկ

ի՞նչ է նշանակում «ըստ մեր պատկերի և նմանութեան». Տերը պատկեր անուանում է իշխանութիւնը, և ինչպէս երկնքում Աստծուց վեր ոչ ոք չկայ, նոյնպէս և երկրի վրայ չկայ որևէ մէկը, որ մարդուց աւելի բարձր լինի: Բայց եթէ մարդը տրուի ցասումին, կը կորցնի տիրոջ իր այդ դիրքը և գերի կը դառնայ, եթէ անգամ քիւրաւոր ծառաներ ունենայ:

Գուցէ ասես՝ պատճառ կայ բարկանալու, քանի որ այս մէկը կամ միւսը բարկացրեց ինձ, սակայն ամենից շատ հենց այդժա՛մ է պետք ցոյց տալ քո հանդարտութիւնն ու հնազանդութիւնը, քանի որ եթէ չլինէր քեզ զայրացնող մէկը, ինքդ քեզ ինչպէ՛ս կը զայրանայիր: Կենդանիները, որ բնագոյային զգուշութիւն ունեն, բայց բանականութիւնից զուրկ են, ևս զայրանում են, սակայն միայն այն ժամանակ, երբ կատաղում ու խոցւում են, և ինչո՞վ է մարդը պակաս կենդանիներից: Աստուած մեր մէջ դրեց ցասումը՝ իբրև խթանիչ, որպէսզի ընդդէմ սատանայի՝ զայրանանք և սարսափազդու դատաւոր ու մոայլ դահիճ լինենք մեղքերի՝ դէմ: Աստուած ցասումը մեր ձեռքն իբրև զէնք տուեց ոչ թէ որ թշնամանանք ուրիշների հետ, այլ որ դարձի

բերենք յանցաւորին: Յասումը սրա՛ համար է անհրաժեշտ, և դա մեր բնութեան մէջ է, այլ ոչ թէ թշնամութեան համար, ինչը մեր բնութիւնից դուրս է:

3. Առաքինութեան դժուարութիւնը միայն սկզբում է, յետոյ ամէն բան դիւրութեամբ յաջողում է: «Սատանան,- ասում ես,- մարտի է դուրս եկել իմ դէմ և զանազան նետեր է տեղում ինձ վրայ»: Իսկ **դու մէկ անգամ միայն քո ձեռքն առ առաքինութիւնը, և իսկոյն Աստուած կը կանգնի քո թիկունքին**, միայն թէ Նա քեզ առաքինի գործերին կազմ և պատրաստ տեսնի: Այդժամ Նա դիւրութեամբ կը պաշտպանի քեզ ամէն վտանգից ու անվնաս դուրս կը բերի կրակների միջից, ինչպէս որ Բաբելոնի հնոցը նետուած երեք երիտասարդներին դուրս բերեց. չէ՛ որ նրանք էլ ոչ մի ուրիշ բան չունէին, այլ միայն՝ պատրաստակամութիւն: Մեծ նահապետ Աբրահամն իր կամքն իբրև պատարագ ընծայեց Աստծուն, քանի որ իրապէս կամենում էր պատարագել իր որդուն: Տե՛ս, թէ որքա՛ն դժուար էր դա, քանի որ հայրը պետք է իր միաձին, սիրելի որդուն իր իսկ ձեռքով ողջակիզէր: Սակայն

Աստուած փոխանակեց Իսահակին սաբեկ ծառից կախուած խոյով: Տե՛ս, թէ Աբրահամի այս չափազանց դժուար գործը որքա՛ն դիւրացրեց Աստուած: Այս օրինակը միշտ մտքումդ ունեցիր՝ իմանալով, որ եթէ Տէրը քո կամքը կատարեալ տեսնի, քեզ համար դժուարը դիւրին կը դառնայ, իսկ ծանրը՝ թեթև:

4. Քանի դեռ մեղքի մէջ ենք, մեզ համար խիստ ու դժուար է թւում առաքինութիւնը, իսկ մեղքը՝ քաղցր և հեշտ, սակայն եթէ փոքր-ինչ հեռանանք մեղքից, այնժամ մեր աչքին կերևայ մեղքի զարշէլիութիւնը և առաքինութիւնների քաղցրութիւնը: Այս մասին կարող ենք համոզուել կատարելապէս առաքինի անձանց օրինակին նայելով: Սրբազան առաքեալ Պօղոսը գրում է նորադարձ հաւատացեալներին. «Ի՞նչ պտուղ ունէիք,- ասում է,- այն ժամանակ, որի համար այժմ ամաչում էք» (*Հռմ. 6. 21*): Տեսնու՛մ ես, որ քանի դեռ նրանք մեղքի մէջ էին, չգիտէին՝ ինչ է ամօթը, բայց մեղքից դէպի արդարութիւն դառնալուց յետոյ ամօթ զգացին ու հասկացան, որ մեղքի պտուղը մահն է, իսկ Աստծոյ շնորհը՝ յաւիտենական կեանքը: Ուրեմն, այսուհետև ամէն հնար գործի

դնենք առաքինութեան մէջ առաջ ընթանալու համար և կանգ չառնենք այդ ճանապարհին, քանի դեռ կեանքի ու ապաշխարութեան օրեր ունենք մեր առաջ, քանի որ ե՛լ կեանքի, ե՛լ ապաշխարութեան օրերն արագընթաց առաջ են սլանում:

Արեգակը, ամէն օր կատարելով իր ընթացքը և մայր մտնելով, իր բարձունքից մեզ քարոզում է առաքինի դառնալ, քանի դեռ մեր կեանքի օրերը չեն սպառուել: Հողն ու ծառերը, իրենց ժամանակին պտուղ տալով, յորդորում են մեզ առաքինութիւնների բարի պտուղը բերել: Եթէ մենք ևս այդ ժամանակին ենք սպասում՝ այդ ժամանակը սուրբ պահքի ընթացքն է: Նիւթական ծառերն իրենց յստակ ժամանակն ունեն պտուղ տալու համար, և այդ այն է, ինչ նրանցից պահանջում է, մինչդեռ բարոյական ծառերը պէտք է մի՛շտ պտղատու լինեն, հակառակ դէպքում արժանի են կտրուելու: Այս խորհրդով Տէրն անիծեց անպտուղ թզենուն: Ինչու՞ անիծեց. քանի որ ժամանակին պտուղ չէր տուել, ուստի մենք ևս սովորենք ամէն ժամ պտղաբերել:

5. Ծուլութիւնն այսուհետև թող վերանայ մեզանից, արիանանք և արթուն լինենք: Եթէ այս ամէնը լինի, այնուհետ կը դիւրանայ առաքինութիւնների ընթացքը: Սրբերը ի սկզբանէ մեզ նման մարդիկ էին և ոչ հրեշտակներ, բայց արիութեամբ և արթնութեամբ այնպէ՛ս առաքինացան, որ մինչև իսկ տօնելի սրբեր հռչակուեցին կաթողիկէ եկեղեցու կողմից և գահակալեցին երկնքում: Գուցէ ասես. «Նրանք մեզ նման չէին, քանի որ հրաշքներ էին գործում», սակայն Յուդան ևս հրաշքներ էր գործում, բայց քանի որ նաև անօրինութիւն գործեց, այդ պատճառով տանջանքների մատնուեց, որովհետև **ոչ թէ հրաշագործելու կարողութիւնն է մարդուն երջանիկ դարձնում, այլ առաքինութիւնը:** «Յովհաննէսը որևէ նշան չարեց» (*Հովհ. 10. 41*), բայց նրա նման ուրիշ մէկը չեղաւ սրբերի մէջ: Ինչու՞ զարմանալի դարձաւ Եղիա մարգարէն, ո՞չ արդեօք Աստծոյ հանդէպ ունեցած նախանձախնդիր նուիրումի շնորհիւ: Յոքը որևէ նշան չգործեց, բայց զարմանալի եղաւ բոլոր մարդկանց և ահարկու՝ սատանայի աչքին, քանի որ առաքինի վարքի տէր էր, և նրա համբերութիւնն աւելի կարծր էր, քան

ադամանդը: Այս պատճառով նաև Ինքը՝ Տերը, երբ Իր աշակերտներին պատուիրաններ էր տալիս, չասաց, թե՝ «հրաշքներ կը գործեք», այլ՝ «որպեսզի տեսնեն ձեր բարի գործերն ու փառաւորեն ձեր Հօրը, որ երկնքում է» (*Մատթ. 5. 16*): Նաև Պետրոսին չասաց. «Եթէ սիրում ես Ինձ, հրաշագործութիւններ արա», այլ ասաց միայն. «Արածեցրո՛ւ Իմ ոչխարներին» (*Յովհ. 21. 15*):

Տեսէ՛ք, զաւակներ, անհրաժեշտ է առաքինի վարք ունենալ, այլ ոչ հրաշքներ գործել. քրիստոնեան իր վարքից է ճանաչուում, ըստ այն խօսքի, թե՝ «Իրենց գործերի՛ց կը ճանաչեք նրանց» (*Մատթ. 7. 16*): Հրաշագործութիւն է դներին հալածելը, սակայն առաւել մեծ հրաշագործութիւն է մե՛ղքը հալածելը: Դեւ տրտմում է, երբ դուրս է ելնում մարմնից, բայց առաւել տրտմում է, երբ մարդու հոգին մեղքից ազատուած է տեսնում: Այդ նպատակով մեռաւ Քրիստոսը, որպէսզի մեղքը վերացնի: Եթէ մեղքը քեզնից հեռացնես, ուրեմն իմացի՛ր, որ թուլացրել ես սատանային, ջախջախել ես նրա գլուխը և ցրել նրա բանակները, ու այդպիսով մեծագոյն հրաշքն ես գործել:

Ուրեմն, այսուհետև զգուշացե՛ք մեղքից, եկե՛ք արիությամբ ընթանանք առաքինությունների ճանապարհով, որպեսզի հասնել կարողանանք մեր նպատակին՝ Երկնքի արքայությանը՝ մեր Տեր Յիսուս Քրիստոսի շնորհներով և ողորմությամբ:
Ամեն:



ԱՇԽԱՐՀԻ ՄԵԾՈՒԹԻՒՆԸ ՍՆՈՏԻ Է

«Երբ Յիսուս իմացաւ, որ գալու են իրեն բռնել տանելու, որպէսզի իրեն թագաւոր անեն, դարձեալ միայնակ դէպի լեռը գնաց»։ (Յովհ. 6. 15)

1. Սուրբ Աւետարանում Յովհաննէս Աւետարանիչը պատմում է. «Երբ Յիսուս իմացաւ, որ գալու են իրեն բռնել տանելու, որպէսզի իրեն թագաւոր անեն, դարձեալ միայնակ դէպի լեռը գնաց»։ Յիսուսի այս վարմունքը իմաստուն վարդապետները տարբեր կերպ են մեկնում:

Նախ՝ Յիսուս, երկնաւոր Թագաւոր լինելով, չկամեցաւ մարդկանցից թագաւորութիւն ստանալ և Իր աստուածային Թագաւորի ծիրանու վրայից մարդկային թագաւորութեան քուրձը հագնել, արեգակի օրինակով, որը լուսաւորում է ամենքին և որևէ մէկից լոյս վերցնելու կարիք չունի:

Երկրորդ՝ որպեսզի սպասուելիք իրադարձութիւնները մարդիկ մարմնաւոր թագաւորի չվերագրէին: Տէրը ձկնորսների՝ն ընտրեց քարոզիչներ, ինչպէս հովիւներին Եր ընտրել քարոզիչ-մարգարէներ: Այսպէս Է ասում Սողոմոնը. «Դու զօրութեամբ ես տիրում, բայց դատում ես հեզութեամբ» (*Իմաստ. 12. 18*):

Երրորդ՝ Յիսուս չկամեցաւ թագաւոր լինել որկրամոլ մի ժողովրդի, որը թէև լսել էր Նրա աստուածային խօսքերը և տեսել Նրա գործած հրաշքները, սակայն չէր հաւանում Նրան: Այն բանից յետոյ միայն, երբ տեսան, որ Յիսուսը հինգ զարեհացով և երկու ձկով կերակրեց հինգ հազար մարդու, չհաշուած կանանց և երեխաներին, և տասներկու սակառ էլ կտորտանք աւելացաւ, նրանք կամեցան Նրան թագաւոր դարձնել, որպէսզի իրենք առանց աշխատելու մշտապէս կերակուր ունենան:

Չորրորդ՝ Քրիստոսը չկամեցաւ լինել միայն հրեաների թագաւորը, այլև աշխարհի միւս մասի, քանի որ Հայրն ասել էր Նրան. «Հեթանոսներին Քեզ կը տամ որպէս ժառանգութիւն, ու իշխանութիւն՝ երկրի բոլոր ծագերում» (*Մատթ. 2. 8*):

Շատ խորիմաստ են այս մեկնութիւնները, բայց մի իմաստուն վարդապետ նաև այլ մեկնութիւն է տալիս՝ ասելով. «Յիսուս ա՛յն քանի պատճառով չկամեցաւ թագաւոր դառնալ, որպէսզի այդպիսով մեզ ուսուցանի փախուստ տալ աշխարհի սնոտի մեծութիւններից, որոնք մեծ արգելք ու խոչընդոտ են երկնային փառքի և անսպառ մեծութեան ճանապարհին»:

2. Գիշեր է այս աշխարհը, և նրա բոլոր մեծութիւնները երազ են, քանի որ, օրինակ, նրանք, որոնք մեղքի մէջ են, երբ իրենց տաժանակիր աշխատանքից հոգնած քուն են մտնում և երագում իրենց հարստութեան, ճոխութեան մէջ են տեսնում, յետոյ զարթնելով քնից՝ քնաւ գոհ չեն լինում, որ դա երազ էր: Այս օրինակով նրանք, որոնք ապրում են այս կեանքում, պետք է երազ համարեն աշխարհական մեծութիւնները, որոնց մասին մարգարեն ասում է. «Եղան ինչպէս քնից արթնացող մարդու երազ» (*Մատթ. 72. 20*):

Յիրաւի, արդարների մահը քուն է համարւում, ինչպէս գրուած է. «մինչ Նա քուն է տալիս իր սիրելիներին» (*Մատթ. 126.2*): Այս իսկ պատճառով քրիստոնեայ մեռեալին ննջեցեալ ենք անուանում,

իսկ մարգարեն մեղաւոր մեռեալին զարթնած մեղաւոր է անուանում. «Եղան ինչպէս քնից արթնացող մարդու երազ», որովհետեւ մահը մեղաւորների համար ոչ թէ արթնացում է, այլ քնից արթնացողի պէս պիտի բացուեն նրանց հոգու աչքերը, և նրանք իրենց պիտի տեսնեն զրկուած աշխարհի բոլոր բարիքներից և մատնուած դժոխքի անհամար չարիքներին: Ճշմարտութիւնը ճանաչի՛ր փորձով, գնա՛ Աւետարանում յիշատակուած հարուստի շիրմին և նայի՛ր այնտեղի փոշուն, մոխրին ու որդերին: Եւ երանի՛ թէ այս վայրով սահմանափակուէին նրա վնասները. պատկերացրո՛ւ ապա անշէջ հուրը, ատամների կրճտոցը, արտաքին և շոշափելի խաւարը: Ո՞րտեղ կը լինեն այնժամ կուտակած հարստութիւնը, ծիրանին կամ հանապազօրեայ ուրախութիւնը: Այնժամ նա մի կաթիլ ջրին անգամ կարօտ պիտի մնայ:

Ի՞նչ եղան, ուրեմն, այն վայելքները, որոնք հարուստն ունէր այս աշխարհում, կամ ու՛ր կորաւ նրա հրճուանքը: Եթէ մինչև իսկ խոր ծերութիւն հասնէին այդ վայելքները, կրկին ոչինչ էին, Էլ ի՞նչ ասենք այն դէպքում, երբ վստահ չենք կարող լինել,

թէ այդ վայելքները կարող են երբևէ բաւականութիւն տալ: Քանի որ աշխարհի ուրախութիւնները կարծես ջրի պղպջակներ են, որ եթէ ցանկալի ու պատուարժան են նոյնիսկ յիսուն տարի շարունակ, այդուհանդերձ երազ պիտի համարուեն անհուն ու անմահ յաւիտենականութեան առաջ, որովհետև այստեղ քաղցն էլ, ամեն տեսակ չար երևոյթներն էլ վախճան պիտի գտնեն, իսկ հանդերձեալ կեանքում ամեն բան անվերջ ու անվախճան է:

3. Եթէ, արդարև, այս աշխարհի մեծութիւնը երազ է, ինչպէ՛ս է, որ Սուրբ Գրքից մեզ դէպքեր են յայտնի, որ շատ անգամ մեծ տեսիլքները երազների միջոցով են յայտնւում: Երբ Յովսէփը տեսաւ Եգիպտոսում իր մեծ պատուի արժանանալը, մի՞թէ երազի միջոցով չէր. «Լսեցէ՛ք,- ասում է,- իմ տեսած երազը: Թւում էր, թէ մի դաշտում հասկերի խրճեր էինք կապում: Իմ խորճը բարձրացաւ, կանգնեց ուղիղ, իսկ ձեր խրճերը դարձան ու երկրպագեցին իմ խրճին» (Ծննդ. 37. 6-7): Քանի որ սովի բերումով լինելու էր երկրպագութիւն, Աստուած նախապէս դա ցոյց տուեց խրճերի երկրպագութեան օրինակով:

Կամ արդեօք Սողոմոնը երագու՞մ չտեսաւ, որ ինքը իմաստութեան ու հարստութեան մեծ պատուի է արժանանալու, քանի որ գրուած է. «Տէրը Սողոմոնին երևաց գիշերուայ քնի մէջ և ասաց նրան. «Քեզ տալիս եմ հարստութիւն ու փառք, այնպէս որ քո ապրած կեանքի օրերին թագաւորներից ոչ ոք չի լինելու քեզ նման» (*Գ Թագ. 3. 13*):

Սա է ակնարկում Սողոմոնը իր թագաւորութեան մասին պատմելիս, երբ ասում է. «Ես՝ Ժողովողս, Իսրայէլի թագաւոր եղայ Երուսաղէմում» (*Ժող. 1. 12*): Երբ Սողոմոնն այս ասում էր, դեռ թագաւոր էր, բայց անցեալով է խօսում՝ ասելով «եղայ», և ոչ թէ՝ «եմ», որով կամենում է ցոյց տալ, որ աշխարհի մեծութիւնը երազի պէս սնոտի է, ինչպէս ակնյայտ ասաց. «Ունայնութիւն ունայնութեանց. ամէն ինչ ունայն է» (*Ժող 1. 2*): Թերևս նաև այս մեծութեան մասին էին Յիսուսի աշակերտները ճանապարհին վիճում միմեանց հետ, թէ՝ «ո՛վ է մեծը» (*Մարկ. 9. 33*): Մեծութեան մասին վիճաբանելու խորհրդաւոր վայր է այստեղ ճանապարհը, քանի որ աշխարհի մեծութիւնը ևս, անցնելիք ճանապարհի նման,

անկայուն և անցողիկ է: Այս միտքն է ամփոփուած նաև այն դրուագում, երբ սատանան աշխարհի բոլոր թագաւորութիւնները «մէկ վայրկեանում» ցոյց տուեց Յիսուսին, քանի որ այդ բոլորը վայրկեանական երևոյթներ են միայն և իրականում ոչինչ են:

4. Այսպիսով՝ հարկ է իմանալ, որ մի բան է մեծութիւն ցանկանալը և այլ բան՝ մեծութիւն ունենալն Աստծոյ ընտրութեամբ:

Առաջինի օրինակը կայ Սուրբ Գրքում (*Դատ. 9. 8*), որտեղ գրուած է, որ երբ ծառերը գնացին իրենց համար թագաւոր օծելու, ո՛չ ձիթենին յանձն առաւ թագաւոր դառնալ՝ պատճառաբանելով իր պարարտութիւնը, ո՛չ թզենին՝ պատճառաբանելով իր քաղցրութիւնը, և ո՛չ որթատունկը՝ պատճառաբանելով իր ուրախութիւնը, իսկ երբ դժնիկ փշի մօտ գնացին, նա յանձն առաւ ծառերի թագաւոր լինել: Ձիթենին, թզենին և որթատունկը խորհրդանշում են առաքինի մարդկանց, որոնք չեն ուզում թողնել իրենց առաքինի պարարտութիւնը, աստուածային խոկումների քաղցրութիւնը և հոգևոր ուրախութիւնը և գնալ աշխարհի սնոտի

մեծութեան հետևից, մինչդեռ փառամոլ փշերը հետամուտ են այդ «ուրախութիւններին»:

Իսկ երկրորդի լաւագոյն օրինակը Աբրահամն էր, որը թելւետ հարուստ էր, սակայն ծառայ չէր դարձել իր ունեցուածքին և հարստութեանը, ո՛չ աչք ուներ ուրիշների տների վրայ, ո՛չ էլ ուրիշ մէկի ունեցուածքով էր հետաքրքրուում: Այլ, դուրս ելնելով նայում էր շուրջը՝ տեսնելու, թէ չկա՞ արդեօք որևէ հիւր կամ աղքատ, որպէսզի իր վրանում հիւրընկալի նրան և օգնի աղքատներին՝ նրանց կարիքները հոգալով: Աբրահամը, սակայն, թանկարժէք նիւթերով չէր պատել իր վրանը, այլ սոսկ Մամբրէի կաղնու մօտ էր այն հաստատել, և անգամ ծառի սաղարթի հովանին շատ էր թւում նրան, քայց նրա իջևանատեղին այնքա՛ն գեղեցիկ համարուեց, որ անգամ հրեշտակները իջևանեցին նրա մօտ: Թագաւորներից ոչ ոք երբէք չհիւրընկալեց հրեշտակներին, մինչդեռ կաղնու մօտ պատրաստուած Աբրահամի այդ վրանը պատուի արժանացաւ, քանի որ հրեշտակները ո՛չ թէ տան շքեղութիւնն էին ցանկանում տեսնել, այլ հոգու առաքինութիւնը: Տեսէ՛ք Աբրահամի այս

հարստութեան գեղեցկութիւնը և, նրա օրինակին հետևելով, դուք ե՛ւս այդ փափագէք:

5. Ուրեմն մարդը, փախչելով սնոտի մեծութիւնից, կը հասնի յաւիտենակա՛ն մեծութեան, ինչպէս այն աղքատ Ղազարոսը, որ այս կեանքում աղքատ էր, իսկ հանդերձալում հարուստ՝ ո՛չ թէ ոսկով ու արծաթով, այլ անմեկնելի բարիքով, որը մարդու աչքը չի տեսել, ականջը չի լսել և սիրտը չի զգացել: Իսկ ահա մեծահարուստը, որ արհամարհում էր Ղազարոսին, նրանից աւելի աղքատ դարձաւ՝ այն աստիճան, որ մի կաթիլ ջրին կարօտ մնացած՝ տանջւում էր խորը աղքատութեն մէջ, քանի որ այստեղի մեծութիւնն այնտեղ չի կարող առաջ շարժել, անգամ մարդուն ճանապարհի ուղեկից լինել չի կարող: Շատ յաճախ այն դեռ այստեղ՝ երկրի վրայ է լքում մարդուն ու հեռանում: Այդ մեծութիւնը փախստական ու անշնորհակալ մի ծառայ է, անհաւատարիմ մի ծառայ, որի հետ թեպէտ երկար ճանապարհ կարող ես անցնել, բայց որը յանկարծ քեզ լիովին մենակ թողնելով՝ կը փախչի քեզնից: Ի՞նչը կարող է սրանից աւելի անհաւատարիմ լինել, և ինչքա՛ն խղճուկ են

նրանք, ովքեր այսպիսի մեծությամբ են պարծենում: Նման հարստութիւն կուտակելը յայտնապէս է լինում, մինչդեռ այն վայելելու մասին ամէն բան անյայտ է: Եւ այնպէս է ստացում, որ մարդը, մեծ ջանքեր թափելով հարստութիւն ձեռք բերելու համար և ի վերջոյ տիրանալով այն բանին, որի համար այդքան չարչարուել է, այդպիսով տիրացած է լինում մեղքին միայն: Հարստութիւն ունենալն արգելուած չէ, եթէ մէկը ճիշտ տնօրինի այն, ինչպէս, օրինակ, չար բան չէ գինին, այլ հարբեցութիւնն է չարիք, նոյնպէս և հարստութիւնն ինքնին չար չէ, այլ ազգահոլութիւնն ու արծաթսիրութիւնն է չար: Ուզում ես շքեղ ու մեծ տուն ունենալ. դա արգելուած չէ, սակայն դա մի՛ ունեցիր երկրի վրայ միայն, այլ և երկնքում հաստատիր քո «վրանի» հիմքերը՝ աղքատների մասին ևս հոգ տանելով, քանի որ այդպիսի վրանների մասին է մարգարէն ասում. «Վրաններ, որոնք չեն շարժուելու» (Ես. 33. 20): Դուք ա՛յդ փափագէք, որպէսզի յաւիտեան երանելի լինէք:

ԱՄԷՆ ՍՈՒՐԲ ՄԻ ԱՐԵՊԱԿ Է ԵՐԿՆՔՈՒՄ

*«Այն ժամանակ արդարները երկնքի արքայության մէջ կը ծագեն, ինչպէս արեգակ»:
(Մատթ. 13. 43):*

1. Յայտնի է, որ բանական արարածների մեջ գերազույնը հրեշտակներն են, իսկ մարդիկ նրանցից փոքր-ինչ ցածր են, ինչպես ասում է սուրբ Դավիթ մարգարէն, թէ՛ «Քո հրեշտակներից փոքր-ինչ ցածր դրի՛ր նրան» (Սաղմ. 8. 6): Այս ցածր լինելը ոչ թէ այն պատճառով է, որ մարդը մահկանացու է, բայց դա էլ Քրիստոսը հատուցեց Իր գալստեամբ, երբ մահով մահին յաղթեց, ապա նաև մարդկանց համար ճանապարհ բացեց, որ, մահկանացու լինելով հանդերձ՝ ընթանան դէպի վեր, դէպի անմահութիւն:

Եթե մարդիկ մահկանացու չլինեին, մարտիրոսներ չէին լինի և անթառամ պսակի չէին արժանանայ, որով փոքր-ինչ բարձրացան և հրեշտակներին հաւասար դասուեցին, քանզի մարտիրոսներն ու հրեշտակները միայն անունով են տարբեր, իսկ գործով հաւասար են. հրեշտակները երկնային բանակներ են, մարտիրոսները նոյնպէս, հրեշտակները բնութեամբ անմարմին են, մարտիրոսները նոյնպէս, թէև մարմնով զգեստաւորուած եղել են, բայց անմահութիւնից առաւել գեղեցկացան նրանց մարմինները, քանզի երկինքն անգամ այնպէս չի փառաւորուել լուսապայծառ աստղերի զարդարանքով, ինչպէս սրբերը՝ իրենց լուսաւոր վերքերով:

Երկինքը թող պարծենայ անհամար աստղերի բոյլերով, իսկ երկնքի արքայութիւնը պարծենում է անհամար արեգակների պարսերով: Քանզի այնտեղ ամէն մի սուրբ մի արեգակ է, և դա իմ խօսքը չէ, այլ մեր Տէր Յիսուս Քրիստոսի, որ ասում է. «Այն ժամանակ արդարները Երկնքի արքայութեան մէջ կը ծագեն, ինչպէս արեգակ»:

2. Պարսից Շապուհ արքան, որ պատուհաս էր, իրեն եղբայր հռչակեց արեգակին ու լուսնին, որով բոլոր մարդկանցից գերազանց անուն ստացաւ: Սուտ համբաւ ու համարում էր դա, քանզի երկրային էր նա, մահկանացու և մի տիղմ, բայց վնասները միայն այդքանը չէին, այլ դժոխքում նրա «որդը չի սպառուելու, և նրա հուրը չի յանգչելու» (Եսայի 66. 24): Կեղծիքն այս օրինակով վերջացաւ, սակայն արդարներն իսկապէս պիտի ծագեն երկնային արքայութեան մէջ:

Ո՛վ մարդ, տես ինչքա՛ն շքեղ է հանդերը, երբ սրբերը մտնում են երկնային արքայութեան մէջ: Եթէ սրբերից մէկի նշխարը օտար աշխարհից մեր քաղաքը բերուի, ամեն տեղից ժողովուրդը խոնուած կը հաւաքուի նրա շուրջը հոգևոր ուրախութեամբ զննելու համար, և ինչքա՛ն առաւել մեծ կը լինի այն հանդերը, երբ սրբերը վեր՝ երկինք ելնեն, քանզի վերին գօրութիւնները կը հաւաքուեն նրանց շուրջը՝ վերքերը դիտելու, և բերկրալի սրտով իրենց գիրկը կ'ընդունեն նրանց, ապա մեծ հանդիսաւորութեամբ կը տանեն երկնային արքայի մօտ:

Եւ ի՞նչ կը լինի այնուհետև: Անմահ արքան հրեշտակներից առաւել պատուի կ'արժանացնի նրանց, և ոչ իբրև հաւատարիմ ծառաների, այլ սիրելի բարեկամների. «Դուք,- ասում է,- իմ բարեկամներն էք»: Աւելին, Նա Ինքն ասաց, որ «Աւելի մեծ սեր ոչ ոք չունի, քան այն, որ մէկն իր անձը տայ իր բարեկամների համար» (*Հովհ. 15. 13*): Եւ քանի որ մարտիրոսներն այս աշխարհում իրենց անձով մեծ սեր ցոյց տուեցին՝ Տիրոջ անուան համար մեռնելով, դրա համար Տէրը հաղորդակից է դարձնում նրանց Իր փառքին հանդերձեալ կեանքում՝ որպէս Իր սիրելիների, որ իրենց կեանքը չափազանց անարատ անցկացրին:

3. Արդ՝ մարտիրոսներից շատերի մէջ գերազոյն եղաւ սուրբ Սարգիսը, որ Արարչի հանդէպ ունեցած սիրուց արհամարհեց աշխարհը և իրեն ընծայեց՝ որպէս Նրան պատարագ: Հաւատի սիւն Կոստանդիանոս Մեծի, ինչպէս նաև նրա որդու կենդանութեան ժամանակ սուրբ Սարգիսը վարում էր իր իշխանութիւնը հայրենի Կապադովկիա գաւառում: Շրջում էր իր իշխանութեան սահմաններում ոչ ի շահ իրեն կամ իր իշխանութեան կամ փառքի համար, այլ հոգևոր

և աստուածային պաշտամունքով կառավարում էր բնակիչներին ու հետևում կարգ ու կանոնին, բայց նաև առաքեալների նման աւելի շատ ջանում էր տարածել քրիստոնեական սուրբ հաւատը, սրբում էր երկիրը կոապաշտութեան գիտելիքներից և ամենքի համար բացում էր աստուածնաչութեան ճանապարհը: Եւ քանի որ Հին և Նոր Կտակարանների գիտակ էր, ինքն անձամբ էր քարոզում կենաց խօսքը, իր օրինակով բազում անհաւատների դէպի Քրիստոսը դարձի բերեց, շինեց եկեղեցիներ և բազմացրեց Քրիստոսի սպասաւորների դասերը: Բայց երբ Աստծոյ արտօնութեամբ թագաւորեց պիղծ Յուլիանոսը, սուրբը տեսիլքով Քրիստոսից ընդունեց պատգամ՝ Աբրահամի նման ելնել իր հայրենի երկրից և մեկնել այնտեղ, որտեղ իր համար պատրաստուած էր մարտիրոսութեան պասակը:

Թողեց այնուհետև երանելին իր հայրենի ժառանգութիւնը Կապադովկիայում, թողեց իշխանութեան պատիւն ու փառքը, ողջ ունեցուածքը բաշխեց ու բաժանեց աղքատներին, մի աղքատ թափառաշրջիկ դարձաւ օտար

վայրերում, իր Մարտիրոս որդու հետ Աստծոյ հոգածութամբ եկաւ-հասաւ Հայաստան աշխարհը, խօսքով ու գործով սատար դարձաւ բազում մարդկանց բարեպաշտութեանը: Ապա ըստ դէպքերի ընթացքի՝ սուրբը դիմեց Պարսից Շապուհ արքային, իր քաջագործութիւններին արժանի կերպով չափազանց սիրելի դարձաւ նրա աչքում: Բայց այնուհետեւ Քրիստոսի հաւատքի համար բազմաթիւ դաժան տանջանքներից յետոյ սուրբը գլխատուեց, ինչպէս իր փոքր որդի Մարտիրոսը իրենից առաջ և տասնչորս զինուորներն իրենից յետոյ նոյն կերպ նահատակուեցին, չհաշուած զօրքի բազմութիւնը, որ սուրբ Սարգսի քարոզութեամբ հաւատաց Քրիստոսին:

Այդպէս բազմավաստակ մարտիրոս դարձաւ սուրբ Սարգիսը և իր գործերով փառքով ու պատուով պսակուեց ու արեգակի նման ծագեց երկնային արքայութեան մէջ:

4. Մեր այս սրբերին տօնախմբելու առաջին պատճառն, այսպիսով, փառաւորեալ Աստուած է Իր սրբերի մէջ: Երկրորդը՝ սրբերին բարեխօսութեամբ դիմելը մեր անձերի համար:

Երրորդը՝ նրանց աստուածահաճոյ կենցաղավարութեանը նմանուելուն յորդորելը, որպէսզի կարողանանք հասնել նրանց պսակին: Այս վերջինն է հատկապէս մեր փնտրածն այս աշխարհում, քանզի ի՞նչ շահ պիտի ունենանք սրբերին տօնելով, եթէ նրանց լուսաւոր շաւիղներից հեռու մնանք:

Սուրբ մարտիրոսներն այս երանաւետ փառքին արժանացան անհաւանական ճիգերով, բայց մեզանից թեթեւն է պահանջուում, նրանք կեանքն արհամարհեցին, մենք գոնէ արտասուք հեղենք, քանզի արտասուքն անգամ բաւական է մեղքերի հրդեհը մարելու և այն բանի համար, որ հոգին պայծառ փայլի, իսկ սրանից աւելի դիւրին ի՞նչ ճանապարհ կարող է լինել երկինք բարձրանալու համար: Սուրբ մարտիրոսները դժուարին ճանապարհով երկինք բարձրացան, բայց մեզ համար դիւրին ճանապարհ կայ, որի նպատակը նոյնն է:

Տեսէ՛ք, թէ նահատակների յիշատակը նշելը որքա՛ն օգտակար է մեզ համար. նրանց պատուելը ցոյց է տալիս Տիրոջ սէրը ամենքի նկատմամբ, որովհետև ով նրանց է պատուում, Աստծուն է

փառաւորում, քանզի Աստուած փառաւորեալ է իր սրբերի մէջ, և ով մեծարում է նրանց, իր վարձքին արժանի կը լինի՝ առանց հալածանքի, առանց հրի և առանց տանջանքների:

5. «Իմ Հօր տան մէջ բազում օթեաններ կան» (*Հովհ. 14. 2*): Եւ իւրաքանչիւրին ըստ իր վաստակի տրուած կը լինի պարգևը, և ամենքը գոհ կը լինեն, ամենքի փափագը կը կատարուի: Մի օրինակ կայ. եթէ տասը եղբայրները միատեսակ ոսկերթել հագուստ հագնեն, եղբայրներից փոքրը, փոքր հագուստ կրելով, չի դժգոհի ու չի նախանձի միւսներին, քանզի գիտի, որ իրեն դա է վայել և դա բաւական է: Այդպէս և Երկնքի արքայութեան մէջ ամենքը, նոյն փառքը հագնելով, գոհ կը մնան յաւիտեան և բերկրանք կապրեն ու կը զմայլուն անճառելի խնդրութեամբ, և մեզ համար այնտեղ՝ երկնքում, յաւիտենական պսակը պատրաստուած կը լինի: Բայց այն պատրաստուած չէ չարերի համար, քանի որ ձրի չի պարգևում, այլ վաստակի փոխարէն է որպէս վարձ տրուում, և միայն առաքինիներին է Տէրն ասում. «Տնծացէ՛ք և ուրախացէ՛ք, որովհետև երկնքում ձեր վարձը շատ է» (*Մատթ. 5. 12*):

Երկրի տուած սփոփանքն ունեն թե՛ մարդիկ, թե՛ կենդանիները, իսկ երկնքի բերկրանքը մեզ տրուում է՝ հրեշտակների կարգը մեզ դասելիս: Եւ ուրեմն՝ պիտի ձգտել վերինները փնտրել, իսկ ստորիններն արիաբար ոտնատակ անել: Մեր մարմնի կառուցուածքն արդէն իսկ մեզ սովորեցնում է դէպի երկինք նայել՝ ցոյց տալով, որ ամէն ինչ, որ երկնքի սահմաններից դուրս է, արժանի է ոտնատակ լինելու: Ուրեմն՝ դէպի վեր ընծայենք մեր մտքերը, քանի որ այն է մեր հարազատ բնակավայրը, որին հասնել արժանի թող անի մեզ ամենքիս մեր Փրկիչ Յիսուս Զրիստոսը՝ բարեխօսութեամբ բոլոր սրբերի և մանաւանդ սուրբ Սարգիս Զօրաւարի և նրա Որդուն՝ Մարտիրոսի:

ԳՐԱԿԱՆ ՈՒԹՒՒՆ

Կարապետ Եպս., Լապտեր հոգևոյ, Կ. Պոլիս, 1826 թ.,
57 էջ:

Կարապետ Արք. Պալաթեցի, Ծանուցում քահանա-
ներին՝ ապաշխարութեան խորհրդի վերաբերյալ,
թարգմ. և ընդ. խմբ.՝ Ա. Դիլանյան, Ս. Էջմիածին,
2012 թ.:


Հրանտ Ասատուր, Կոստանդնուպոլսոյ հայերը եւ
իրենց պատրիարքներ, Ստամպուլ, 2011:

Մաղաքիա Պտրք. Օրմանեան, Ազգապատում, հտ. Գ,
Երուսաղէմ, 1927:


Պօղոսան Նորայր, Կարապետ Արք. Պալատեցու Տա-
րեկան Քարոզգիրքը, «Էջմիածին», Ս. Էջմիածին,
2018, թիվ Թ, էջ 72-80:

«Ոսկեդենիկ» մատենաշարով տպագրուած գրքեր


1. Յովհան Ոսկեբերան, Ապաշխարութեան պտուղներ (Քարոզներ և ճառեր), 2019



2. Յակոբ Նալեան, Առաքինի կեանքի ուղին (Հոգեւոր գրոյցներ), 2020



**3. Յովնան Արք. Տերտերեան, Պատգամներ
(Աստիճաններ և Թևառոր խօսքեր)**



**4. Կարապետ Արք. Պալատեցի, Տարեկան
Քարոզգիրք (Ընտրանի), 2021**

Ծրագրուած գրքեր

5. Բարսեղ Կեսարացի, Մեծ Պահք

6. Գեորգ Մեղրիկ, Աղօթագիրք

7. Պաղտասար Դպիր, Գրքոյկ շահաւետ

*ԱՄՆ Արևմտեան թեմի
«ՈՍԿԵՂԵՆԻԿ» մատենաշար - Դ*

**ԿԱՐԱՊԵՏ ԱՐՔ. ՊԱԼԱՏԵՏԻ
ՏԱՐԵԿԱՆ ՔԱՐՈԶԳԻՒՔ
(Ընտրանի)**

Գրաբարից աշխարհաբար փոխադրեցին՝
Նորայր Պողոսեան
Գեորգ Սրկ. Կարապետեան

Լոս Անջելէս – 2021

*

**ARCHBISHOP KARAPET PALATETSI
ANNUAL BOOK OF SERMONS
(Selection)**

Translated from Classical Armenian:
Norayr Poghosyan
Deacon Gevorg Karapetyan

Los Angeles – 2021